

Apat nopod toun-oku sid Gorija Protestant sid Sabah

1956-1997

Traugott A. Forschner

Apat nopod toun-oku sid Gorija Protestant sid Sabah

UMPATOD

Sabap tu a-ko piro Kristian di solumpak vagu sid PCS minongonsug dohon dot mongusul di hiza om gama-ku i sid tanga do PCS, tumiim-oku diti do posurat sid karatas di pangalaman di koposizan-ku. Minsanko hopod no om duvo toun biano dit amu-oku kadapat magandaha vagu sid Sabah sampai amu-oku kopipomoros dot boros do Momogun, mamakai-oku di boros Momogun, supaya i kogumuai do suni vagu kadapat mamasa om humarati do kuran i dohon o gama posurut di kazazadan di Habal do Kivosihan sampai nokembulai i PCS.

Bahagi keso: I kinosukadan om kinosikuran bahagi ko i gamaon sid Sabah

Sumukod-oku sid kampung do Germany

Ioku diti, i komulakan dot onom songobpinai di kusai-nopo, nokosino i toun 1927, i hiza do banalko agazo o kosusaan sid sompomogunan, tu norungoi i ekonomi. I kogumuai dit ongoulun gumaji dara, nga amu kadapat do karaja. Musikim-nopo i jinutaan dot ongoulun do riniba. Na i ama-ku, modsupu di pakakas pangaganti dit ongokurita om tompa dit ongokuda dit ulun mukabun. Topot it muukabun diri okonko ulun di kisiin, ino nga ong mamarai ioti dit utang do kurita ko i gama mangatag do kurita, ino-no i vaza mamarai, manahak do gandum ko totodukon antad sid kabun dioti. Iti- no o sabap do banalko apagon i molohing-ku mansahari do kakanan om kosulungan dahai songobpinai di hiza diri. Na minsanko mosikim-okoi banal diri, kodung korikot it ondu di mongorukut bahagi di Basel Mission, ino kumpani di posurut di kazazadan di Habal do Kivosihan sid pentongkop do pomogunan, varo-no laid nosodia dit idi-ku it a-ko piro siin bahagi di rukut dino. Ino-no i gama dit idi-ku, minggu-minggu posodiri dot a- ko piro siin, supaya nosodia-no laid i kosukupu di rukut. Iri-ogi, toduvo-duvo vulan it ondu mongindukut di rukut diri sid kampung dahai sampai pokirim sid Basel Mission. Inot ondu dino minamahagi-po di Habal do Basel Mission di minanarang di gama dit ongomissionari sid Kalimantan, Kina, India om Afrika. Na ioku, minsanko amu-po elo mamasa, sera it idiku minamasa di Habal do BM, nga agazo o kenginan- ku mongining di habal antad sid ongopomogunan diri.

Turu-ogi toun it umul-ku sinumuvang-oku sid sikul, hiza dot i Hitler nokotimpuun do momorinta do Germany dot araat o hoturan om murut- surut i dau do gama mangaraat dit ongobansa vokon, lobipo ong it ulun Yahudi, retanko bai iso o bansa o monoruntud do riniba, ino-no i Germany, tu i raha dot ulun German banalko tanid mantadko i raha dit ongobansa vokon

Na i dahai dot ongekob, tu Kristian-okoi i, amu ozi dino hoturan om iri kiroon. Rontob- nopo, kopihiza dino hoturan om karaatan, murut-surut om minaju i ekonomi sampai it ongoulun kadapat gumaji om dumagang do barang. Kagi i ama-ku i nokosojal di rumpak dunia keso sampai nadamat- no siri do songihing do hakod norungoi, mad kakali minongitung dot avantang ong i Germany pengkakat vagu do tentara, tu ka di ginavo dit ama-ku, ong sumuhut di hoturan do Kaiser, ino-no jumadi do sojal di mangajaga di pomoguna di Kaiser, ino-no i kenginan do Kinoringan. Sabap i Kaiser ko it ulion do pomogunan, nga mad sinuhu om mad uripon do Kinoringan.

Kodung hopod-no toun it umul-ku, varo no hoturan dot a-milo-milo mamung om jumadi do suni vagu di Hitler. Sid kinumpugan diri varo tudukan do kuran it atag o gama di German momorinta di sompomogunan, isuhut di boros di Hitler: ong solumpak vagu do German, ino-no, atarom iadko basi berani, alanut iadko kulit om alangkas iadko asu dit elo magasu, ka dau..

Kasalaan-nopo, it ongoulion do gorija protestant om i di RC mad amu atarang o gama mangagazad om mongira dit ongoulun Kristian. Banalko apagon dot toriso-iso Kristian mongitung ombo it avantang om ombo it araat sid hoturan di Hitler diri. Mad tinumohiang-no it ongorija om pondita manaud dit ongopiumpugan.

Hopod ogi om duvo toun minamung oku-no sid rombongan do konfirmasi, dot sid saralom do duvo toun, induvo songminggu miumpug mokiajal di harati di kosipan dot ulun Kristian sampai minamasa om minongohondom di Kitab om it ongolongoi dot ulun Kristian. Nopongo i tudukan diri, iri-ogi varo kapamerkatan dahai dot i harati, nosukod-no sid Kristian sampai kadapat no mamung di poginakanan di Tuhan Yesus.

Hiza di Rumpak Dunia Koduvo om hiza do misingilo do kumaraja sampai sojal-oku

Nopongo-no i valu toun sumikul, a-milo-milo it suni vagu mongitung di vaza sumukod tantu sampai misingilo do karaja di kigaji om kikoposizon-ogi. I hiza diri it ulion do Nazi banalko minongogorot dohon do lumombus sumikul sampai atahakan- oku do biasiswa. Topot sinumaap-oku dinot onsug dino, gam tinumipuun-ogi sid German Lufthansa i kikadai sid padang tarabang, it osomok sid kampong-za, do misingilo mamasang do tarabang dit okonko bai kazu om kumut o ginama. Sabap ino hiza diri bai hopod toun antad kinembulazan di gama do mamakai aluminium bahagi dit ongotarabang, nga kakali omulok i gama mamasang dit ongotarabang do iadino. Oruhai-oku kumaa sid kadai dino mimbosikal do bai hopod minit. Topot i kogumuai do tarabang dit ipasang, nga tarabang do rumpak, tu i hiza diri (1942-1944) i Germany sid tanga di Rumpak Dunia Koduvo. I limo ongoobpinai-ku, napanggih-no kavi do sojal sampai nizazad-no sid Francis om Russia, gam it obpinai Paul, napatai- no, tu norungoi i tarabang dau sid Russia, om i Ludwig om Theo, nga POW (prisoner of war) do USA om i Martin, nga POW sid Russia. Sampai it obpinai Gotthard, nga natanus-no sid Hungary di sinumuri-no i tentera do German . Amu-okoi nokelo do sionggo-nopo om sera banal i kinapatazan dau, antawa nolobong-no i buntung dau ko amu.

Ong ioku, hopod ogi om turu toun it umul-ku, nokodim-oku-no do porinta sumojal sid iso rombongan di kakali kitugas do mongumbasih do pomogunan om it ongohimbaan. I dohon dot ulion sid Lufthansa minangaplai sid porinta do popung dohon sid dau do kumpani. Topot ka di administrasi do tentera, I kuvo dino nakadaftar- no di Nazi, supaya sumojal iosido om mozo sid rumpak. Ong itungon-ku biano, minsanko araat dara o kiroon do porinta dahai diri, ino karaja sid rombongan dino, nga banalko kiguna i palajaran-ku diri bahagi dit tahudi ot adau. Tu i hiza di nakamung sino, varo tugas dahai do mangagama dot alun alun sid himbaan. Iri-ogi, kodung nosodia-no i rombongan-ku do moling ponong sid Francis do tomod mangagama do parit di iadko ansal di moniag do kurita di tentara do USA sumuvang sid Germany, nosuhu oku-no vagu dot amu mozo, gam, pinanggih-oku sid sikul do jumadi do maangagazad dot sojal om monuduk dioti di vaza miparang. Rontob-nopo, i hiza diri suvab- suvab, asadapan nga varo tarabang di di mangada do bomb ko monimbak dit ulun di mirimpanau. Iti-o o sabap apagon o gama sumuhut di training do sojal. Ong i dohon do pongitungan, tanid-no o tudukan-ku sid ongosolompok diri. Kangku dioti, Kadan-kou-no misingkasang om misingpandangan, inoi nga tiimai dikou do masi-kou, supaya ong otoliban i rumpak, kakali-kou kadapat lumombus om sumurut. Kagi ino hiza dino, mad atalahas-no dot amu songkuro mingkod-no i rumpak.

Ino-no rontob, bai sombulan-po om engkod-ogi i rumpak, tu norungoi tantu i Germany om i sojal do USA mininsamung di sojal do Russia sid tanga do Germany om minsanko sangkaki o tana nga asot obebas, kakali kinodim-oku vagu do mamung dit umpug do sojal di retanko, i sojal di monunsub dit ongosangod antad sid Kuta Berlin. Na adau dit kinosuhuan dahai do kumpani do sumaap di tentera do Russia ponong sid timor - tu i Russia nokensomok-no sid dahai- minamanau-no it ongoruhang-ku do minsamung om mangahavud dara dit sojal do Russia, nga a-ko piro adau, napatai-no kavi ioti di bajil do Russia. Bai ioku, tu nanangan-oku di sakit dot ahali banal, kadapat mogidu ponong sid Barat. Ong i dohon do rikoton om kolobusan, ino-no i kamp do British. Labaan do 750,000 sojal-okoi sid kamp diri sid tanga do himbaan sid saralom do tolu vulan. Iri-ogi sinuhu-okoi di British muli sid valai. Suvai nokuli oku sid valai di molohing-ku ong kiumul-oku dot hopod om valu toun.

Topot i Germany, nga norungoi tantu. Norungoi it ongo bandar om ongojambatan om it ongoalun-alun, gam ensanan i hoturan om administrasi, nga mad natanus-no. Aso- no karaja-ku vagu mangagama do tarabang, tu tiniag di USA om British i gama do iadino. Tinumiim-oku do tumabang dit ama-ku do modsupu om iri-ogi gumaji mansahari sampai mongitung do nunu banal o tugas om gama, ong engin-oku sumhut di hoturan di Tuhan Yesus

Tumimpuun vagu

Suvai November 1946 nening-ku antad sid pandita-ku dot i Basel Mission tumimpuun vagu do monodia dot ongoulun ponong sid gama pazazad di Habal do Kovosihan sid tanid o pomogunan sampai papanau dioti sino. Turus-oku minangapalai sampai notorima-oku di Basel Mission om sinumuvang-oku sid sikul do missionary ontok di vulan April 1947. Suvai September 1955 om nopongo-no i sikul diri sid Anglican College Durham, sid School for Oriental and African Studies

London om i Kurus do Bible Translators do Wycliff. Napanggil-oku-no laid di Basel Mission ontok di April 1955 do sumodia ponong di mission sid Kudat, gam i potugas dohon do momuka di mission sid Pitas, ka di panggil diri. Iti-no o sabap do misingilo-oku di bahasa Melayu sid London do tolu vulan. Kodung notontuan-no i tugas-ku dino, minongoduat-oku sid koubasan-ku ino-no i Kathryn Sheila Carty do mangakun iosido ko amu do kumuruhang dohon sid Sabah, ong kodung opongo i dau do sikul om pongonovan do degri sid universiti. Nakaharati-oku laid dot inot ondu dino ulun di banalko aparum atarang o kosipan dau dot amu ogolivong iosido pavalang di dau do orotizan do ombo it atag o gama ong sumuhut di ralan di Tuhan Yesus dot amu mohiang-tohiang. Suvai i hiza di minuli-oku antad sid England sid molohing-ku, minangakun iosido sampai miniupakat-okoi diri do suvai Kristmas 1955 mirait om mitunang ogi, sampai suvai opongo i degri om sumusuhut ogi iosido mozo sid Sabah ontok di toun 1958.

Bahagi koduvo: Hopod om duvo toun sid Sabah

I kotimpunaan-ku sid Sabah

Adau ko 28 Disember 1955, minungkazut-oku mamanan kumaa sid Sabah, nga tinumuhun-oku antad sid kapal Kimanis sid Kudat adau ko 9 February 1956. I nokotindal-po sid Singapura, atalahas-no do suvai duvo minggu om varo-ogi kapal kumaa sid Sabah. Manjadi i kakal-oku sid Singapura, mad varo kopurimanan dot banalko tanid o hoturan om kobuatano do pomogunan mantad di koubasan-ku laid. Minsanko i gambal do sompomogunan amu miabal di dahai do gambaran. Ong sid dahai, i Europe om i Germani, nga sid savat om sid tanga sampai banalko agazo do minsanko i kogofoo do Europe nopusingani. It ulun di nokogulu minongolukis di sompomogunan, ino-no o kiroon, ong ponong sid selatan bai ogumu o vaig om ais dot okonko pomogunan di kiriniba, atagal do pembulai ino sid lukisan dino. Iti-no o sabap, i retan do equator ko pintanga do pomogunan, nisimban dau ponong sid utara. Iri-ogi ombo ponong sid selatan, nga minodok om i-po ponong sid utara, ginumazo. Topot ong i lukisan sid Singapura, pengkaa dino, i Singapura sid tanga do gambal, topot ong i Europe sid sunduk ponong sid vanan om sibak do banalko opodok, isuhut di kogofoo di Europa. Topot ong Afrika ponong sid savat sampai agazo mantad-ko i sid map do Europe. Nemot-ku po ino, minuog-uog-oku do, kaluto varo-po hal vokon siti ponong di tanid o kobuatano om harati mantad di kinelaan-ku laid diri. Atag do montupat, supaya onining om onimot dit ongohal dot amu oduruk mumbongut, inoi nga minud om tumimpa ko mangambat ogi. Manjadi iaditi i pongitungan-ku di linumazag sid Kimanis kumaa sid Kudat om tinumuhun-ogi antad sid kapal diri.

Sasarap do pukul 6 i kinotindalan-ku sid Kudat dot i Pandita Bienz, muksu sid gorija Kina, sinumamung dohon om pinatod dohon sid Batu Dua do sumarapan sino. Na i Haeusermann, i koruhang-ku laid sid Basel, nga sinoi. Iri-ogi minozo-oku di Honegger kumaa sid station sid Sikuti. Sid agazo o valai, varo nosodia it iso onkob i ponong sid kulam om it onkob do rumah sakit diri. Sid lombus di valai dot agazo, nga initoronon di Sigris om i savo dau. Ioti nokopiupakat di Honegger dot ioku kadapat miilang di Sigris makan do i savo dau o magazau om monodia do kakanan antad sarapan sampai minum-inum do sodop.

Ponong minsosodop dit adau diri, tinumimpun-oku **misingilo do Momogun** do pengkaa dino: Nouog-ku-no do nunu it oruhai o vaza misingilo do Rungus. Tu nening-ku-no i pangalaman dot ulun vokon di misingilo do boros ivaza do tanid o boros di mad lingua franka. Kokirai, ong it Inggeris misingilo dara di boros Kina, misingilo-po laid do German, supaya i German monuduk di boros do Kina. Ong iadino o harati, mamakai di lingua franka iadko jambatan. Topot i pangalaman dit a-ko piro it ulun minanarang dot apagon banal i vazaan di iadino, tu mad okilong o ralan.

Netung-ku-po i iadino, tumiim-oku do iadko bobou-oku, ong varo ulun mamakai di bahasa Melayu ong momoros iosido sid dohon. Iti-no o sabap, minindamo-oku di Honegger to poriat di Majimil do kumuruhang dohon do sangjaham dirit adau dino. (Ong i hiza diri, I Honegger om it ongoulun Kolonial kakali minomungaran di Rungus om i sokoviai i Momogun do Dusun.) Ong i Majimil Tuorong, nga ulun di tumabang di Honegger om i savo dau sid valai do magazau om mobpupu ko monorika do kumut.

Nokosuvang-nopo i Majimil sid onkob-ku, mad mongo-vongo do nunu o kogunaan do mamung sid dohon. Bai i palad-ku minonuduk di Majimil do mogom sid sampaping di meja-ku om tumoguvang

dohon. Nosodia-ku-no dit a-ko piro barang, ongovatu, kazu ko roun do kazu i nanu-ku-no laid sid govuton. Manjadi, kakali i Majimil mimpan-timpan sid dohon om momu-homu-nopo, nigili-ku it iso vatu sid meja sampai minonuduk it unturu-ku sid vatu dino. Amu songkuro minumbongut-no i Majimil sampai minomoros dot, Vatu iti, ka dau. Na tinumimpa-oku dot, Vatu iti, kangku. Oo, ka di Majimil om Oo, kangku. Iri-ogi nigili-ku i somputung o kazu sampai minonuduk vagu sid kazu. Amu songkuro, Kazu iti, ka di Majimil om, Kazu iti, kangku, do turus tinuduk-ku vagu sid vatu sampai minomoros-oku dot, Kazu iti, kangku. Amu, ka di Majimil, Vatu iti, ka dau. Ioku-no minongimbuliti dot, Vatu iti, kangku sampai minonurat-oku sid buuk-ku dino pongoretan dino, Vatu, kazu, iti, oo, amu, sampai minomongo-oku, mamakai di roun do Rungin. Nosodiri-no- po i pongoretan roun om roun do Rungin, bai roun do kazu, tinumiim-oku di gama mongizap sampai pinopirompit dot a-ko piro vatu sampai misingkiro dit ongovatu dino dot tumutu laid dit iso, om iri i koduvo om kotolu om apat sampai labaan do hopod. Turus i Majimil minangambat dot Iso vatu, ka, duvo vatu, ka, tolu vatu, ka sampai hopod om iso vatu, ka dau. Nokotiim-po dot minsanko it ongoroun kadapat mongizad do iadino, minonurat-oku vagu dino rumbul iso sampai hopod om iso sid buuk-ku. Iri-ogi minonurung-oku di vagu ponong sid di Majimil, ko minongoi-no vagu ponong sid dohon, nga i Majimil minavalang dino gama monurung ko manganu om manahak ko mongumpug om i iadino sampai tigogi, minongimbulai-po i pitonidan dot i dau do gama ko i dohon do gama, i pitonidan dot agazo ko opodok i vatu, ko anaru ko onibak i putung do kazu ko alaab antava opiit i roun om i iadino, sampai i hiza dot otoliban i sangjaham diri, labaan do limo nopod pongoretan sid buuk-ku sampai sid utok-kui.

Manjadi hiza i linumabus i Majimil sid ongekob-ku, banalko tanid i vuoros mirak-irak sid di Sigris, tu i Sigris nakamung sid dahai, retanko iosido ozi memot di dohon do vaza misingilo do boros Momogun. Iti-no i dau do boros sid kinapangan, Ong ioku, tau-ma do kuran-ko kadapat monurat-nopo, ong ioku, amu-po osodiri it ongopongoretan, topot ikau minaliu sid pongoretan vokon. Tantu amu-oku kengkosup di Majimil mumbongut, ka dau.

Nokuli-po i Majimil, tinumimpun-oku-nobo do monodiri dit ongopongoretan di sid buuk-ku, nga varo pongitungan-ku dot amu apagon ong mamakai i typewriter i kihurup do Latin ong monurat do Momogun, tu banal avalang it ongouni di boros dino..

Manjadi adau-adau do kosombol i Majimil sid ongekob-ku, nosodia-ku-no laid it a-ko piro barang ko soalan-ku tu monginsosok di Majimil om momongo monodiri di vaza momoros. Na ombo i nening-ku-no laid minamakai-oku-no vagu, supaya ouji dot nokonong ko amu i pongohorotizan-ku diri. It adau minggu, kinumuruhang-oku di Honegger kumaa sid Masangkung, tu sumambayang sori. Minsanko bai a-ko piro adau-oku sid Sikwati, nening-ku-no it a-ko piro pongoretan di nagamit-ku-no laid sampai hinumarati-oku dot okudik di khotbah om i gama dit ongoulun kumiboros di Honegger. Nopongo-po sumambayang, iningutan- okoi monginakan sid valai di OT Tuorong. Sinod valai dau nokotiim-oku dot insan-ogi monginakan do ginazau di banalko oripupuw, om it taduk-ku, bai ontolu dit inansak-no sid lanjang kopihiza di ginazau. Sabap navi-no laid it inumon-ku dit inovit-ku sid tirapus-ku, banalko apaganan-ku monolon di ginazau om it ontolu, na tinahakan-oku di Inai Setia, i savo di Tuorong. I kiniro dau, avantang dot i ombuvoi varot ikana di noubasan-no laid. Ong i dioti dot ikana diri, lomiding om bilis.

It ongoadau di minggu vagu, okonko bai i Majimil o koruhang-ku sid gama pavalang di harati dit ongopongoretan, inoi nga tinoguvang-oku dit ongoulun di mokiubat sid Inai Honegger, di kakali monginud di kotibangan di Inai. Ioti songingkakat-nopo sid somok dit ongekob-ku sid parapad. Vokon-no ioku minongoduat dit ongoulun, vokon-no ioti kumiboros dohon. Manjadi iadino oruhai-oku mamakai ombo it nening-ku sid di Majimil om varo nomungan vagu i pongoretan vokon om i kumuro popisuput dit ongopongoretan. Na amu songkuro minomurimon-oku dot amu enizo i dolou dit ongoulun momoros. Mad tatanid it ongoulun mamalang di rumbul “tolu”, varo ong “terldu” varo-no ong “tochu” dot iri-no ko iri o harati. Manjadi tigogi, sabap niduat-ku dit inantadon dit ulun dino, varo, Antad sid Kimihang, ka, varo-no antad sid Lodung, ka, varo-no antad sid Lajong, ka, kaharati-oku dot mad it inantadon dot ulun o kembulai sid vaza dioti mumbongut di rumbul tolu ko i pogoretan valai. Alaid-nopo minongitung-oku dot osuhul mamakai di hurup “1” sid uni di iadino. Ong sid tohudi it ongoulun kondiri kadapat mamakai di dau do vaza monguni ong mamasa ioti di hurup sid dau do koubasan. Alaid-no po nokelo-oku dot ino pitonidan, ino-no i dila do Rungus om Nuluw

ko Gonsomon. (I hiza do varo buuk do Longoi, banalko oruhai dot it Ongogonsomon minangavalang di hurup “l” sid buuk dino iadko “ch” om i vokon sinumuhut di dau do vaza monguni, nga kakali iseso o longoi om iseso o buuk.)

Na ontok dit adau minggu koduvo sid Sikuati, minoling i Honegger sid Lodung minozo di baas sid Kudat om tumupak mingalud antad sid Kudat sampai minodop sino. Topot i dohon do kiroon, mad ogumu i hiza sid tanga ralan om okudik o kasampatan kumiboros sid ongoulun. Iti-no o sabap, mininton-okoku sid Kuati om minamung sid piumpugan di sid station. I Sigris om i Majimil minangagazad di sambayang siri. Ponong minsosodop, minapit i pandita Bienz, i minanahak do khotbah sid gorija Kina do Sikuati, i sid somok di station-za. Na minanahak-okoku dau dot inumon iadko koubasan, iri-ogi minonginsosok iosido dohon kananganko i sovoon-ku sid England. Tu ka dau, i sikul Lok Yuk do Kina sid Kudat, banalko amu miuma i gama monuduk di bahasa English. Ong it ongoguru Kina, amu tantu elo dot Inggeris. Kuran-ma dot ioti monuduk dino boros dot amu-po napaas-i kondiri. Manjadi minanarang-okoku sid di Bienz di upakat-za di sovoon-ku do suvai toun 1958 om sumuhut dohon sid Sabah, tu engin i sovoon-ku monuluk di janji sid porinta dau do monuduk-po laid duvo toun sid England, gima varo biasiswa antad sid porinta dau, kangku. Nening-po di Bienz i iadino, kakali minongogorot iosido dohon do monimban di dahai dot umba, gam minindamo dohon do monurat om manarang sid sovoon-ku di kosusaan di sikul Lok Yuk. Iri-ogi minuli i Bienz sid Kudat. Na kondiri di Bienz minindamo di kommittee di Basel Mission do mongoho dot i sovoon-ku poriat do humago rumikot sid Sabah sampai monuduk sid Lok Yuk School om ioku minonurat sid sovoon di dau dot umba. (Sid sibak varo-po habal kananganko iti.)

Manjadi minoniim-okoku dot alankas mongindukut di kogumuai do pongoretan om i vaza do mamakai om popiamung dit ongoboros dino. I minggu vagu, minozo-okoku di Sigris sid Lajong do sumambayang sino. Nokorikot-po sino, nakasamung-okoku dit iso anak vagu, i Abbah Mongimbal. Iosido tinumoguvang dohon sampai minamakai dit a- ko piro boros dot English, i nokelo iosido sampai nakaharati-okoku dot agazo o ginavo dau misinggilo di boros Inggeris. Nopongo-po sumambayang, minonginud i Abbah dohon sid valai dit ama dau sampai minanahak dohon dot pazas di banalko agazo. Nopurimanan-ku i dau do kenginan do monginggeris, minongoduat-okoku di Abbah do moriat dara tumabang dohon misinggilo do Rungus sid Sikuati. Na turus miniupakat-okoi dot iosido tumabang dohon suvab-suvab sid gama monodiri om sumaralom sid boros Momogun. Antad diri kiontok-no banal i gama-ku miboros om mongubas do Rungus om monginsosok om momeda di harati dit ongopongoretan om i hoturan di boros Momogun, gam miniupakat-okoi- po do monoruvang dit ongobinatang dit osodu, it amu-po norikot dit ongomissionary ko vokon ot Orang Puteh. Ino-no o tomodon dino: nopuriman-ku sid ongoulun dit asarok kosombol sid station Sikuati do mad sumusui-nopo di dolou om uni di koruhang-ku ong mumbongut ioti. Ino-no o kenginan-ku: mongining do Rungus dit kakali atarang om apasok banal dot amu linumuu do Boros Swiss. Minggu minggu i Abbah mangagazad dohon sid ongopiumpugan sid Merebau, Kimihang om Kumbatang sampai minamung-okoi sid sambayang sino do tomod mongubas dit ongoulun do kampong sampai mongimot do kuran it ongopiumpugan sumambayang, minsanko aso missionary nokorikot om bai i susuhuon di Honegger mangahatul sumambayang.

Manjadi, it insan-ogi **nokorikot sid Kumbatang**, minomoros-no it ongoulun dot sid saralom dot apat minggu, iso nga aso ponulung nokorikot ko minangagazad di sambayang. Sabap ino, ioti kondiri tumiim do sumusui sumambayang do minindolongoi di longoi sid Bahasa Melayu sampai it iso it elo mamasa, minamasa sid Kitab Vagu di dang Melayu, minsanko amu kaharati it razat do boros Indonesia dino, lobipo ong it ongondou om it anganak. Natarang-po ino, minindamo ioti di Abbah om yoku do monuturan dot okudik sid dioti. Na i Abbah om ioku tumiim do manarang sid piumpugan do kuran-okoi misinggilo do boros do Rungus sampai mokitutun dioti om pentutun sid dioti di dahai do tomodon minsosomok sid ongoulun.

Manjadi ino pangalaman sid Kumbatang minanalahas sid dohon do kodung magandaha vagu sid siombo-nopo, suvai osodia-no laid do mongontok di ponulung, kaluto ong a-nokorikot i notugasan do mangagazad do sumambayang sino.

Amu songkuro antad diri, minungkazut-okoi no di Abbah do **monoruvang dit ongobinatang** ponong sid selatan. Minimbaas-okoi kumudat om tumupak sid Lodung mingalud, tu mamung sori sumambayang. Nopongo-po minozo-okoi dit ulun antad sid binatang Kusilad sampai minodop sori. I sodop diri sampai tanga sodop varo i monuturan om varo-po manangon iadko i koubasan sid binatang ong kodung varo ombuvoi. Bai ino sodop diri nening-ku-no dot kensan-ogi it ongotangon om it uni di maanangon sampai ohigak-oku banal di mongining-oku dino tangon om i tanid ot uni di gama manangon.

Susuvab-i linumombus-okoi minozo di ralan do porintah i retanko ralan do kuda ponong sid Matunggung, tu ong i DIO (District Officer) ong kodung mamananau om mangaraun do pomogunan, nga mamakai-no do kuda. Iti-no o sabap dot ino ralan dino, varo ulun di sinuhu di porintah do mongoluvras dino ralan monikid vulan, supaya oluvras i panahon di DIO ko i OCPD (it ulion di mata-mata). Ino-no rontob, i kutad banalko anaru. Amu songkuro ot apanau, ozopos-okoi no sampai sid kangkab antad sid bolobou do sodop, gima alaid dot a-insan kapampangai. Minapit-okoi sid Nangko om minodop sori. Pengkaa dino sid Togumamal Na hiza do sodop nening-ku-no vagu it ongotangon om i vaza dit ongokusai miboboros om mivovongo-vongo dot varo ombuvoi di misinggilo di boros dioti. Na sid Togumamal, minongoduat-oku no dot ombo i kampong ponong sid Matunggung. Ino-no it ambat dioti, Ino binatang sino ponong, ino-no Lotong, ka di Orang Tua. Manjadi kodung nening-no di Abbah i ngaran Lotong, okikip ogi it ulu dau sampai turus minomoros sid dohon dot, Ioku diti, amu-oku mozo dikau ong lumombus-ko sid Lotong, amu-oku mangagazad ko kumoruhang dikau sori, tu araat it ulun sori dino. Nengat-no laid di Abbah do sid Lotong varo Orang Tua di kisindaat, it elo do posirod dot ulun sampai matai ko sumakit iosido.

Sabap i Abbah amu tantu mozo sino, tinumompik-okoi kumaa sid Pinavantai om iri sid Garau, Bonduk om Kumbatang, Merebau, om Rampai koguli sid Sikuati hiza dot avi i minggu diri. Tikid binatang, nga avantang it ongoulun tumorima di kinandahaan-za sampai kadapat-oku vagu dot ogumu i pongoretan dit amu-po insan kening. Antad-okoi sid Garau kinumaa ponong sid Bonduk, nga nemot-no di Abbah sid simpangan do tanga ralan i tanda di kingaran KAZAKAP, ino-no it okorop o roun dot Enggaton. Ino roun dino tanda di moniag dahai do minsomok di binatang Bonduk, tu sid binatang varo agazo o gama mongohormat dit ongorogon. Sabap dino, ombuvoi amu kavasa sumombol sid binatang salaid do varo sambayang sid rogon sino, ka di panarangan di Abbah. Turus minozo-okoi dit antasan do ralan sampai rinumikot sid Kumbatang om minintoron om minodop sid valai di Oduzan. I Oduzan o minanarang sid dahai di gama sid Bonduk, do varo bobolizan di kihak banal di minangahatul dot agazo o sambayang sino sid saralom do labaan songminggu. I saralom dino minggu, amu kavasa it ongoulun sid binatang do mindahu sid tana, ka dau. Om ogumo-po i hal vokon tinuturan om tinarang di Oduzan sid dahai dino sodop dino. Sabap susuvab diri i hari enam, minuli-okoi turus sid Sikuati.

Manjadi, sid saralom dino minggu sid tanga ralan, banalko ogumu ot ongopongoretan om pibabarasan inumpug-ku-no sid buuk-ku do miuma no timpunaan do monurat do pongodumparan di hoturan di boros Rungus. Pengkaa dino i sokovia i it ongopongoretan inumpug-ku sid pongodumparan do Kamus dot ino-no i vaza-ku: bai i puun dit ongopongoretan o pinopiamung-ku sid Kamus, okonko i sokovia i it ongopongoretan di mamakai di varo ongosuput sid gulu, ko sid tanga ko sid pompod do puun dino. I harati, sid Kamus diri nokosurat dot > imot, memot, mongimot, kematan, imatai, imatan, (om i iadino). Ong opompon dara posuvang sid Kamus i sokovia i pongoretan di mad raan sid puun imot, varo dara sampai labaan do hatas om limo nopod pongolombusan di kiharati imot. (Suvai i Hoturan do boros Momogun o manarang di kogumuai i kapamakazan di tosompuun-puun do boros... i ginama-ku sid tohudi't adau).

Kouli-nopo antad dino kinapanahan-za diri, minomongo-okoi di Abbah do minggu- minggu monodia do tuturan do Kitab om i khotbah, tu i kiniro dahai, Ong magandaha sid tasantanid-tanid o piumpugan, kaluto ong tigogi aso ponulung nokorikot do mangagazad sumambayang, nokosodia okoi no laid do mongontok dioti. Kagi, i hiza diri antad dit ongoulun di retanko ponulung varo di mad ohuzan ko malan do mamananau sid sodu dot aso tantu o sagu hati. Ong itungon banal ino iadino, inot ongoponulung diri amu-po kovit di dau do tugas do monuduk dit ongokoruhang. Vokon-no ong amu-po elo banal do mamasa dit Injil do Melayu. Kagi ong it ongopiumpugan okonko ulun di

nokosikul-no do bahasa Melayu. Bai oubas ioti kumiboros Malazu sid ongoKina ko i Sama hiza do dumagang do sada sid tuhanan. Ong sino,mamakai ioti di bahasa Melayu do banalko oribau, i retanko Melayu-Pasar..

Nakaharati-oku po di iadino, minansadang-oku sid ongokoruhang-ku do mongimbulai do tudukan dit ongoPONULUNG di pengkaa dino, Kodung sasarap do hari enam, miumpug it ongoPONULUNG dot i tomodon, mamasa om humarati di tuturan do Kitab bahagi dit adau Minggu. Ino tuturan dino, nasalin-no om nosodia-no laid do miuma i solinan. Iri-ogi miovoli-voli it ongoPONULUNG do mamasa di tuturan dino om mongubas mamasa do Momogun. Iri-ogi varo katarangan di harati om it onsi di tuturan om tudukan di Tuhan Yesus sid gama miduat-duat om mitimpa-timpa. Opongo-po, miovoli-voli momili dit iso ponulung, dot iosido mingkhotbah dino tuturan dino. Kagi, miupakat-po i sokovia i ombo i longoi (lobipo ong dang Rungus)om ombo i pomintaan dua kopionong sid tuturan dino. Sid gama di iadino, humarati ioti dati dot ong minta dua ko mindolongoi do mamakai Momogun, minsanko i Kinoringan nokelo di boros Momogun dit antad kavi laid sid Kinoringan. Nening-po dioti ino sadangan-ku dino, nokoho ioti, om sabap ioku kakali sid Sikuati, minamung-oku no sid miting dino. Kodung nokotimpuun-okoi do iadino, atalahas-no i kogunaan di vaza di iadino. Keso, it iso anak vagu di retanko ponulung randavi, di mad gaji penuh i sagu hati dau, tu asarok-no iosido kakaa sid ongopiumpugan, tigogi, tinumatak-no dot aso habal do nunu-nopo. Iri-ogi varo habal dot nokosuvang-no iosido sid Hari Enam (SDA).

Bai valu i ponulung tikid hari enam nokosodia om minozo di tudukan dino. Sinumurut i gama dioti mamasa om humarati dot ombo-nopo i nabasa. Vokon-no ong elo monodiri dit onsi ko tinomod do tuturan om kuran kadapat do polombus sid piumpugan, inot ongoulun di nopodsu-no laid ko it ulun di bai nokosuvang do Kristian. Bai it iso ponulung, banalko tanid. Nening-ku-no laid it ulun dino do mangagazad do piumpugan sid Lajong di minamasa iosido sid Injil Malazu antad di surat di Petrus do banalko opuhod om apatong i dolou dau. Topot i dau do posondoton di tuturan dino, banalko osodu antad di surat di Petrus, bai mongimbulit- nopo do kodung Kristian, kadapat it ulun mangakan do vogok om monigup sampai minum do kinomol sampai amu rumosi vagu dit ongorogon, gima I Kinoringan manamod di tokou, ka dau.

Manjadi, varo insan o hari enam dot i tuturan di nosodia diri, ino-no i gama di Yesus tumimpa di duatan dot atag ko amu do manahak do sukoi sid porinta. Na i sid solinan di tuturan varo nokosurat it ulu di tuturan, ino-no I kokuasaan do Kinoringan om i kokuasaan di Kaisar. Rontob-nopo, ino ponulung dino, kaluto ong bai amu kosonsob banal i mato, ko bai kakali amu-po osodiri koduruk i pitonidan dit ongohurup, nga minamasa-no iosido dot apatong dot, I kosusaan do Kinoringan om i kosusaan di Kaisar, ka. Kakali mamasa iosido di iadino, mad ogolivong it ongoPONULUNG vokon om minotos no ioti, tu minud do mongining di tudukan dau. Nabasa-po om niatag-no i solinan dau, tinumimpuun iosido do mengkhotbah iadko ulun dit elo banal monguza do vagas monguji- nopo di kosusaan do Kinoringan om iri-ogi i kosusaan di Kaisar. Minsanko songlinsou di pinibabaran dahai kananganko i gama di Yesus mamalang di pitonidan i hal di sukoi di porinta om i gama mongohormat do Kinoringan sid gama manahak do persembaan, amui kembulai di miningkhotbah iosido dot apatong banal o boros. I vokon diri sisiri mongirak om mongo-vongo do iadino i kinopolidan dau, tu amu nonong i gama dau mamasa dit ongohurup dino. Ong sukul minongimot om monongontupat iosido dit ongokoruhang mongining di tudukan dau, a- milod humarati iosido dot varo hal dit amu nokonong. Topot iosido dino banalko kiharapan dot apatut ombo i kembulai sid kabang dau.

Ino pangalaman minonuduk dahai missionari do mongitung do kuran kadapat posurut di kosikuran dit ongoPONULUNG om kuran mongontupat om mangagazad dioti do mihiza monuduk om mangagazad dioti om tumabang ioti dahai sid gama manaud om monunda dit ongopiumpugan.

Nopongo-po mongomot it ongoulun di toun 1956, nimbilitan-no i kursus do misingilo mamasa om monurat, nga duvo nopod o suni vagu miniumpug sinod Sikuati mokituduk do sasarap. Vokon-no ong bai sasarap sino, vokon antad sid sodu, minodop sid Sikuati. Ong i minosodop, i Sigris potii dioti do mangaradu do tana sino, do karabau o manarik di radu. Ino gama kumavid di radu om mangagazad di karabau do mangaradu dot otulid, mad misimomoi, tu vokon, tinumangkus i karabau, vokon-no ong tinumongkihal i radu ko hinumaba it mangagazad om i iadino. Songirak- irak no i sokovia i om nabasan miguli-guli moniim dot varo katagan di gama mangaradu.

Iri-ogi i mananom do kasang o nituduk dau, ino-no piro kasang om songkuro i pialatan om i

korolomo, nga iso-no ot alantas sid gama dino, ensanan i tana di station Sikuati okonko orombung o tana, inoi nga pantai- nopo iadko sid tampak dit osomok sino. Navi-po i kursus, ong robuton i nokosuni i kasang, bai okudik om opodok-po it ula di pinatanaman dino.

Nokouli-po it anganak dino, amu songkuro, duvo it anganak antad sid Tiga Papan di banalko elo sid kursus, minongogorot di molohing dau **mokisikul dot atatap** sid sikul sid Kudat. Na i hiza diri varo iso sikul do porinta, ino-no i Government Primary School sid timbing do rahat om pangkalan. Manjadi i OT Madalag, i ama di Manjil om i Manahil, it ama di Ibing, minangagazad dit anganak rumikot sid di Haeusermann sid Batu Dua sampai minindamo di Haeusermann do momuka do sikul bahagi dit anganak dino. Kiroon-ku amu netung banal dioti do kuran kadapat mongimbulai do sikul dioti. Topot i Haeusermann, i kitugas ponong sid Kudat Utara, nakapanganu- no laid do tudukan di bahasa Melayu sid guru di GPS, Sinumamung-no iosido di sigu dino om minokikovosihan dialo do nunu o timpa dau sid dioti Madalag. Na boros di Sigu, Avantang ino kagi, tu varo a-ko piro anganak do Sama dit amu koguli vagu sid sikul hiza dot otoliban i suti. Tiimai inot duvo anganak Rungus pogom sid ogomon dinot anganak Sama do songkuro-nopo ohorotizan dioti do pengavi diti toun diti, ka dau. Manjadi minangakun i Manjil om i Ibing om i molohing, gam miupakat i Madalag do minggu minggu ong muli it anganak sid kampong, mongoi ioti tasanggantang-gantang o vagas bahagi di kakanan sid Batu Dua. Om i Haeusermann minangakun do sid rompit do ropuhan ot odopon dioti dino om iosido mogihim dot ikana di duvo it anak dino. Amu-po navi banal i toun dino, nakanaik no ioti sid grade kaapat, tu i Haeusermann om iri-ogi i Inai Forschner, kodung nokorikot sid Kudat, miniovoli manamba do tudukan di bahasa Melayu om rumbul om it Ingeris.

I sovoon-ku Kathryn Sheila Carty tinumindal sid Kudat

It amu-po nokorikot sid Sabah i sovoon-ku rinumangkat-oku sid Batu Dua i September 1956 sid intoronon di Bienz. Tu nokoling-no i tuan Bienz sid Hongkong. Na i sasakaan dau kadapat oku-no mamakai, ino-no Landrover K 009. Ong i Haesuermann nopo varo motosikal bahagi dit ongopanhon ponong sid Utara, ino-no sid Suangpai, Tiga Papan om Kimihang. Nakapangakun-no i Basel Mission dot i sovoon-ku mad ihago-no mamung sid dohon. Iri-ogi minonurat-oku sid dialo dinot umba om kenginan di Bienz om i Basel Mission sampai i sikul Lok Yuk om pinoromot sid dau dot osuhul mangapalai sid Education kunsil sid England dot okonko sid England monuluk-ko di janji do biasiswa do duvo toun mangajal sid England, inoi nga sid British Colony North Borneo o monuluk dino janji dino. Nakakun-no i porinta sid England, iri-ogi sinumodia i Miss Carty do mozo dit ongokapal kumaa sid Kudat. Suvai 28. September tinumindal i sovoon-ku sid Kudat sampai minisavo okoi sid upis di DIO dit adau 4. October om minogontong- okoi sid gorija Kina sid Sikuati ko 5 October sid tanga do kinogumuai do labaan limo natus Rungus om limo nopod Kina do BCCM. Susuvab-po, minonginud-okoi di komitee di Lok Yuk School om i BCCM Kudat sid valai sid Batu Dua do tomod miintutun -okoi om sumodia i savo-ku di kosikuran dau. Ino kinumpugan dit ongokina di mad ensanan ulun dit otuo banal, mad avangaan-no, gima i savo-ku, minsanko omulok-po do bai 22 toun ot umul, nga kogoos do pohigak om povongo dit ongolumohing it ongoKina om elo-no iosido mongonsug dioti do sumusui di dau do longoi om popibabarasan monugirak dot ulun.

Susuvab diri, i dohon do tugas, manambayang sid piumpugan Kumbatang. Iti-no o sabap, miningalud-okoi kumaa sid Dialog om minintana lumombus sid Kumbatang iadko i koubasan-ku laid. Nopongo-po sumambayang om minonginakan sid valai di Oduzan, minozo-okoi di Asagong om i savo dau Onjirim kumaa sid valai dioti sid Dahi. Tu sori-no tinumimpun i savo-ku do momurimon do vaza miamung dit ongoulun sid kampong om modop sid palampag do sulap. Sasarap-po diri, tinumulak-okoi no antad sid pangkalan Dialog minuli sid Kudat sampai minonodia i savo-ku di tudukan bahagi di susuvab vagu.

Antad diri, kodung hari dua sampai hari lima, i kurita di Yong Thiam En mongoi di savo-ku om patod sid Lok Yuk School ontok do pukul 7.30 AM. Opongo-nopo i limo jaham monuduk, iri-ogi i kurita dino pouli-no vagu dau sid valai-za. Na i hiza diri, okonko bai i savo-ku nokotimpun sid sikul, inoi nga i principal minonimpun no di dau do tugas. Iosido mad kopihiza nokorikot antad sid Hongkong. Manjadi ino guru besar banalko avantangan-no dot varo guru antad sid England, i mamakai di tanid o

tudukan mantadko i vaza dit onogoguru vokon monuduk. Ino-no i koubasan dioti guru monuduk: mamalang dot iso ko duvo i pongoretan English, iri- ogi it murid sumusui dot tosonglinsou-linsou o boros iadko mangkahak. Ino guru besar vagu gam minogkovosihan di savo-ku om hinumarap sid dau bahagi di kosimbanan do sistem mangajal. Rontob-nopo, tigogi, nengkod- no i kopiupakatan dioti dino.

Varo isot adau do nokosombol i Mr Tsang sid dahai, tu varo hal dot osusa manalasai.

Abarou-barou-po, minuli-no iosido mimbosikal. Nakapanau-po, amu songkuro nening- za it ongoasu di simbol sid alun- alun mongusig dot ahatul banal. Rontob-nopo, asarok-no varo kousigan dit ongoasu do iadino sampai aso pongitungan-za di nunu- nopo kananganko it inusig dit ongoasu. Suvai tanga sodop, nokorikot i mata-mata monginsosok dahai do kumuro i sigu dino. Sera korikot iosido sid dahai om nunu o naakan ko noinum dau sampai sera minuli iosido, ka di mata-mata. Tinimpa-za no i rontob di dahai do nelaan. Iri-ogi minamalang di mata- mata dot mad naratu i guru sid bosikal, gima it ongoasu minongogusa sampai nakasabap di kinopunavatan dino. It ulu dau nadamat tu nokodumpau-no sid vatu om, novunusan i guru dot amu-po tanga sodop, linumombus minatai. Tigogi, i savo-ku najadi do guru besar, i retan dot acting principal, gam osusa-po do mangagazad di kinogumuai dit ongomurid mozo di buntung kumaa sid pangalabangan sampai minongimot do kuran it ahli di comitee pinagazo-no di lobong. Tu it ongokuli di nosuhu-no monodia di lobong, mad ginumorot do pogofoon di gaji pongolobong, nga nokentoron manangkul. Iri-ogi miniganti-no it ongoahli do komitee manangkul sampai kouma-no i tuung sid lobong. Suvai nokosuvang-no i tuung sid lobong, iri-ogi i muksu Kina minangahatul di kasambayanan mongolobong do mintuduk-no i kogumuai dit ongomurid mihad-ihadi. Minsanko iokoi, nga mad osusa o ginavo, tu minongitung do kumuro momongo monuduk i savo-ku om mangahatul-po di sikul, it onogoguru om i komitee do sikul.

Na i Lok Yuk minonodia do gaji bahagi di savo-ku do hatu ringgit sombulan iadko tanda do monorima kaseh, to ong otopot, iokoi missionari diri, varo bai balanja dot okonko gaji o pongoretan, ino-no, bai kosukupu do balanja pamasi, ka. Ong kisavo-no, varo-po nakamung dot duvo pitoluvon dot aso bida, varo kitugas vokon ko aso. Na banalko avantangan-okoi dino gaji di mad tanda do sikul, tu ino hatu ringgit miuma do balanja bahagi dit Manjil om Ibing, i kosulungan om ongobuuk do sikul om i-po siwa do sikul. Kagi, kodung korikot i toun 1957, okonko bai i Manjil om i Ibing sinumikul, inoi nga varo-no vagu valu anganak do Tiga Papan om Suangpai tisikul sampai minintoron ioti sid Batu Dua sampai osusa-no do dumagang di dioti do kosulungan om ongobuuk om ponulisan. Ontok di Toun Baru, varo koubasan dot sokoviai it ongosikul sid Kudat mimbaris-no sid padang it osomok sid Upis di DIO. Sabap ioti Manjil om Ibing, nga nakagavul siri, minsanko iokoi di Haeusermann minamung sid padang, supaya mongimot di kinogumuai dit ongoanak dit ongosikul: GPS, St. James om St. Peter om Lok Yuk-po. Manjadi, nakasamung-po di tuan DIO sino, minanarang-okoi sid dau dot bianco, minsanko anganak do Rungus nokosuvang sid sikul sampai ginumavul sid padang, kanza. Na avantangan-no di DIO ino habal. Iti-no o sabap, minamalang-okoi sid dau do varo umba di Basel Mission do momuka do sikul bahagi dit anganak do Rungus sid vatas do Sikuati, ong kadapat dara, mamakai di boros Momogun sid kotimpunaan. Nening-no di Mr Hedley, mad ozi iosido dinot umba-za, gam minansadang do kopiumpungan di miupakat banal dinot umba dino. I boros dau, atag do misamung tokou sid valai dikou do ingutan-ku-po i native chief Dato Mustapha, tu iosido kihak bahagi dit Ongodusun, ka dau. Duvo minggu antad diri, rinumikot-no i DIO om i Mustapha sid Batu Dua do tomod miupakat di pengkakan do sikul sid Sikuati. Na minongonsug i DIO dahai do pogili sid dioti i dahai dot umba om i kavazao mongumpai di sikul dino. Ino-no i dahai dot ambat: Ino sikul dino, suvai varo kotibangan do valu vulan om osodia-ogi i puvalazon om it ongobuuk om i vokon o kosukupu sikul, kanza. Iri-ogi varo a-ko piro duatan om panarangan-za, kananganko di kogunaan dinot sikul om i kosompitan dot sampai i hiza diri, iso nga aso-po pongitungan di porinta do pembulai di psikuran dit anganak do “Dusun” ko natives, i pomungaran di porinta bahagi dit ulun di pasok Momogun. Alaid-nopo, minumbongut-no i Mustapha sampai minamalang-no dot, Ong ioku tantu i vulan April o momuka-oku di sikul sid Sikuati. Tu ong minud sampai September, mad oholian kalaid minud-inud it anganak di dikou do sikul, ka dau. Banalko nokovongo okoi dino boros dino sampai minongoduat-okoi do nokokuro tu iadino, tu sampai bianco, a- insan kening-za do varo umba dau ko umba di porinta ponong di kosikuran dit anganak do

Rungus. Iri-ogi i DIO om i Mustapaha enizo o boros dot, *We go ahead* - Iokoi i o mangagama di sikul diti, ka sampai miningkakat ioti miduvo sampai minuli-no antad sid Batu Dua-no. (Ong otopot, banal-no i boros di Mustapha diri do suvai vulan April i kinotimpunaan di sikul dau. Rontob-nopo, okonko i toun 1957, inoi nga toun 1960, i harati, apat toun antad di ginaratan dau dot oholian alaid it anganak minud do varo sikul, ong bai September 1957 obuka-no i sikul di Basel Mission.) Ino-no ot atalahas sid boros di DIO diri, ong i porinta British amu koho do varo-po sikul do Basel Mission sid tanga dit ongokampung sid daerah do Kudat.

Iti-no o sabap, it anganak antad sid ongokampung di tisikul, nga rinumikot sid Batu Dua sampai nokotimpun-no do varo hostel sampai osusa-okoi mogihim dot ogomon sid ongosikul do Kudat, sid GPS, sid Lok Yuk om sid St. James om miupakat dit ongoguru besar dit ongosikul dino, supaya otorima it sokoviai it anganak di tisikuli banal. Toun toun vagu, varo nakamung it a-ko piro anganak sampai noumpug-no i apad nopod ongohostelites ontok di toun 1961.

Iti-no o sabap a-milo-milo poturug do puvalazon bahagi dinot anganak dino dit apapag o ginama, gumanti di mad binatang nagama it inintoronon dit anganak. Kagi, varo sumbangan antad sid organisasi sid Germani di miuma do mangagama duvo valai to toduvo nopod anganak ot mizon om iso-po onkob dot agazo bahagi pangakanan do varo-po nakamung i ropuhan om it intoronon di tukang masak. Tanid mantadko ino sumbangan bahagi di puvalazan, varo-po vagu sumbangan bahagi di kosukupan dit anganak, ong kodung nening-no di koubasan-ku sid Germani i kosompito sid asrama. Iosido om i koruhang dau pinembulai-no di organisasi do **Kindernothilfe Duisburg (KNH)**. Ino organisasi monulung di siombo-nopo amu miuma i balanja om kosukupan do ponumad om pakazan dot anganak. Manjadi mad kisurupu-okoi sid asrama, sabap ino toun 1961 a-nokopud i parai dot minsanko it ulun sid kampung, nga aso kakanan tanid-ko runti, lobipo it anganak sid asrama, tu aso koposizon antad sid ongomolohing.

Na ino kotulungan antad sid Duisburg minomongo do vulan-vulan pokirim do balanja bahagi dit anganak. Kodung varo iamung dot anganak, iamung-po i balanja dino do ong alaid, hiza di 1990, 237 anganak ot nokiro sid sumbangan bahagi dit ongoasrama do PCS, i kingaran do Duisburg, Titiu, Pinavantai, Kota Marudu om Pitas di minanaud do labaan do turu natus ot anganak.

Na i musim manampangi do 1956/57, vokon-no dot banalko apagon magandaha dit ongokampung. Varo-no dot amu-po nakasampai sid gorija sid kampung, ensanan-no it kosulungan ozopos. Ong aso darun, a-ko piro it anganak minozo sumambayang sid kampung, tu minioosiat i dot ogomon sid Landrover-ku. Songkuro kensomok sid rikoton i Landrover, iri-ogi minintana-okoi lumombus. Manjadi, varo iso pangalaman dot amu-oku oolingian sampai bianco, ino-no: Minsanko a-ko piro vulan-oku nokentoron sid Batu Dua, nga amu-oku-po nokemot di sokoviai i harta di varo sid tana di Basel Mission. Topot i Manjil om i Ibing, gam kengkosup dot mansak it uva dit Mampalam sid sampaping do ropuhan. Turus miim-tiim ioti dinot ongouva dino, di naratu-no sid kazu, do bai ioti ioti milang mangakan om pada di linsou sid sahau di kazu dino. Amu songkuro antad diri, nemot-no i Abbah, i ponulung-za sid valai om bahagi di boros Momogun, dot ino linsou dino sinumuni-no sampai ogumu suni do mangga mili-gili sid sahau di kazu dino. Nahabaran-oku-po dau i iadino, gam minansadang-no iosido dot, Ong sid dahai do kampung Lajong dino, iso puun dot mampalam, nga aso. Ong varo mampalam dara sid himbaan ko govuton, amu-po mansak it uva, inanu-no laid it uva dino, tu rumosi it ulun di manganu dot ong monginud-po sampai mansak, vokoni ot ulun mogulu mongupu sampai avi-no.

Kuran-ma ong mangatod-okoi di bibit mampalam sid kampung om ibahagi sid ongoulun di gumorija? ka dau. Na kiontok-kagi inot sadangan dino, tu i minggu diri, i dohon do tugas sid Lajong.

Minongoho-oku dit umba di Abbah, om iosido minongumpug di bibit om posuvang sid agazo o mundam di kikokovidan. Minonodia-po iosido do tangkai, supaya kadapat monompuzung dino mundam dit oponu do labaan do turu nopod bibit. Adu po do minggu, inovit-za no dioti Manjil om Ibing i mundam kumaa sid Lajong. Bai sangvatu-po sid Lajong, nga aso-po ralan di miuma mamanan i Landrover dot osusa ioti monompuzung di mundam. Na sid duvo i bantaran dot sompi bai iso batang, banalko apagon do monompuzung ioti tumupak, om i savo-ku, nga tu amu-po milo do sumunsui sid iso batang, mad rumosi do tumongkihal om rumato sid bavang.

Nokorikot-po sid gorija, avangaan it ongoulun di nemot-no i bibit do turus mindamo dot, Ioku engin,

ko ioku engin, ka. Suvai nopongo sumambayang om minamahagi-okoi di bibit do toriso iso ko toduvo-duvo i bibit sampai minongimuhun-okoi dot kadan-no do bai mongoluvang do ngaran om momopol di tana, inoi nga suvai agazo o luvang, supaya oruhai i gamut di mampalam sumurut om numaru om lumombon, kanza. Ino gama dahai mongimuhun do iadino, ino-no o tomodon: Hiza dot amu-po nokosuvang do Kristian, rumosi it ongoulun do mongukad do tana do bai ngaran, gam varo poniagan dot, Isai-nopo i mangadamat di tana do mamakai do kitarom, ino-no kisala sid Kuasa do Tana, ka di kodori. Iti-no o sabap suvai mananom do dalai, mamakai dot alavis o kazu om mangasok do parai, pengkaa dino. Topot kodung nokosuvang do Kristian, ino-no o kaharati, i tana, nga dang Kinoringan, tu Kinoringan o minongimbulai sampai i Kinoringan minangahatul di riniba do mananom om monunda di tana dot aso gama Dau moniag.

Varo-po pangalaman di minongonsug-oku di Majimil do mananom do koliabas. Ai, ka di Majimil, ong i dahai do koubasan tanid. Suvai mangakan do koliabas om iri-ogi tumai sid govuton. Iri-ogi sumuni it ongonlinsou do koliabas. I harati, amu-po oubas it ongoulun do mananom om monunda dit ongokazu di kiuva, Kagi ong kakal-po mintoron sid binatang, ombo i mampalam di nokosurat sampai monguva, aso sanganu ko ensanan it ongoulun mongutu dit uva dit amu-po mansak. Ong mangakan, omungan-po asin, supaya varo rasa. Mad amu-po kopitiim banal di komiso om kavantango dot mampalam.

Manjadi hiza di 1980 kodung maza-oku sid Lajong, kadapat mongizap dit ongopuun do mampalam di banalko agazo om kiuva, Vokon-no gam i saganu kadapat mongujuval dit ongomampalam sid pasal sid Kudat om sid Sikuati, tu banalko orombung i kazu om asapou it uva dau.

I gama mongumba di tugas do Basel Mission sid daerah Kudat

Ontok di April 1957 minagandaha it supervisor do Basel Mission bahagi Asia Selatan, ino-no i Pandita Witschi, i ginumanti di Rev. Kurtz. I Kurtz diri i minangahatul-no di kinorikatan di savo-ku, supaya varo guru di boros Ingeris sid Lok Yuk. Amu songkuro antad diri, minaliu i Kurtz sid tugas vokon sid Switzerland om i Witschi, i kihak laid ponong sid Kalimantan, rinumikot sid Sabah, tu mangaraun om mongimot di mission sid Kudat. Na i Witschi dino, ulun di kakali sumuhut di tradisi laid do Basel Mission sampai mongitung dot i dau do tugas, momorisa di gama- za sid Sabah. Iadino laid o tugas dau i kakali i Mr Honegger kinumaraja sid Gorija Dayak sid Kalimantan sid saralom do limo toun.

Songminggu minangaraun i Witschi dit a-ko piro kampung om tempat do Dusun om Kina. Nopongo-ko ino, pinanggil-no it ongosukod dit ongopiumpungan sid Sikuati, iadko koubasan-ku laid di toun katalib, tu miupakat di kosurutan om i vaza mangahatul dit ongopiumpungan sampai minsamung dit ombuvoi antad sid Switzerland, ino-no it pandita t'agazo Witschi, tu agazo-no kagi iosido. Inot umpug dino kiguna bahagi di Witschi momurimon do kuran it ongosukod mongining di tudukan do Kitab, kananganko i gama mangagazad om manaud di piumpungan. Kondiri di Witschi minanahak do tudukan sampai minongusul di dau do pangalaman sid Dayak. (Ong otopot, sid kinumpungan diri varo-po ulun di minangagazad di ongorombongan dot ulun di bai navalang-no dot engin sumuhut di hoturan do Kristian, nga amu-po nopodsu-no ioti. Ioti rombongan dino nokorikot antad sid ongobinatang di kakali varo bobolizan. Vokon ioti bai duvo, tolu ongakob, vokon-no intanga do kampong nakamung-no sid rombongan dino. Kodung mamalang it ulun dot, Masok sembahyang ko sumuvang- oku sambayang, nokosurat-no i ngaran dau. Manjadi kodung varo a-ko piro ulun ko ongakob di iadino, tinumimpuun-okoi do mangahatul do sumambayang sid dioti ontok do minggu, vokon-no sid binatang, vokon-no sid sulap dot ulun, ong nakatanid-no laid it ulun dino. I ponulung ko i missionari minagandaha sid dioti. Minsanko ioti, nga nakamung sid kinumpungan dit ongoosukod diri).

Nopongo-nopo it umpug dit ongowakil di piumpungan, minonginud iosido dahai minsamung sampai miumpug do koduvaan, do tomod mongimpuras om mongitung do kumuro-okoi momongo di mission sid daerah Kudat. Na i Honegger iadko ulion-za mogulu minanarang do kuran i kolombusan di mission sid daerah Kudat. It umba laid dot ioku maliu om tumimpuun do mission sid Pitias, alaid-nopo notutup-no, gima amu koho i Mustapha do tumupak i Basel Mission sino. Ino-no minongohodtol i Honegger. Iti station Sikuati, ino-no i puun di Basel Mission bahagi di Dusun. Ong

otopot, i Sikuati nopili-no, tu bai sampai sid Sikuati varo alun-alun di novotuvan. Sid Sikuati varo-po iso kadai Kina om varo kadai do mamapan do kazu sampai sino i dundung di ginama do pagong, inintoronon di baas di induvo sangadau misoguli kumudat. Sid dundung dino kinumpugan diri it ongo orang tua om ioti Bienz om Honegger i hiza di nokorikot i Honegger sid Sabah adau ko 11 di Vulcan Desember 1952. Na varo-po ralan kuda ponong sid rahat (sid tungkang om i pampang do bobolizan) i noluvasan di Jipun. Ohubang-no vagu i ralan dino sampai amu kavaza o kurita. Antad sid Sikuati suvai mintana kumaa ponong sid Lajong, Rampai, Merebau, Kumbatang. Ponong sid Barambangon, Masangkung, Bangau om Kimihang, kadapat mamakai do kurita rontob sid simpangan om iri-ogi mintana ponong sid gibang ko vanan dit alun-alun di kumaa sid Kudat.

Banal-no amu-po navi i toun 1956, noluvasan-no i ralan kumaa sid rahat, tu varo Kina di kikabun sampai iokoi nga minongonsug dit ulun Lajong do tumabang mamampang di ralan dino.

Ino-no it umba di Honegger, momuka do sikul do ponulung iadko Bible School om varo-po sikul dit ongomomodsuni bahagi i tudukan do ropuhan om monombil om varo-po sikul do mukabun.

Sid miupakatan dahai ino-no it ohodtol banal, a-milo milo i keso o tugas ponong di kosurutan dit ongopiumpugan sid kosipan om i gama mongimbulai dit uva do kosipan. Mad aso tinganan do monoruvang di kogumuai dit ongobinatang do mimpuun-timpuun do pazazad dot injil, ong amu maju i kosipan, gima minud-inud it ongoulun do varo tudukan om gazadan ponong sid kopomodsuan om it atantu o koposizan dit amu tumohiang ko mivaliu-valiu do kenginan. Atalahas-no kagi dot it ongosuni vagu di mulai-mulai minagavi mononoruvang dit ongobinatang om minonginjil-no diri, vokon mad abasan om varopo di miningkod-no sid kobuatano di iadino, tu mad oluvau om amu aralom i dau do kosipan. Ombo i ponulung dit atatap, nga kakali suvai agazad-no banal om otudukan sid hal do kokoristianan. Iri-ogi miuma do polombus sid ulun vokon di Habal do kovosihan. Inot ongokursus di bai sasarap do hari enam bahagi monodia di tudukan dit adau minggu rumikot amu miuma, minsanko i kursus do sombulan ko duvo vulan iadko toun 1955 om 56, hiza do nopongo mongomot, nga amu miuma, kanza. Ino-no o kinapangan, monodia do kursus Kitab do onom vulan antad November sampai June 1958 sid Sikuati. I valai di pagong o taap om pongorinding it antad sid sanganu laid di station Sikuati, apakai mula-mula, nga i Sigrist mongumpai do valai banal di varo apat ongkob bahagi dit apat sirang di ponulung om varo-po ongkob bahagi di sikul om ropuhan om popodsun. Iosido monuhu di tukang do Kina poturug dino puvalazan, ka.

Nopongo-po it upakat do tempat om it inintoronon, tinoguvangon-za it onsi di tudukan om isai i monuduk. Ong i Honegger, bai somvulan-po om muli-no ioti songongkob sid Switzerland (Mei 1957). Na boros di Haeusermann; ong ioku, tu sid Batu Dua ot intoronon, bai kadapat mamung monuduk do sasarap di hari empat sampai tanga hari, ka dau om i tudukan, ino-no Bahasa Melayu om i gama mongiro om monurat-po. Iri-ogi minamalang-no i Sigrist dot iosido suvai monuduk do hal do longon, mutanom om misingtukang do mamakai do garagadi om sangkap, ka dau. Ino dino, nga osuhul i minsosodop di hari empat. Na bai ioku-po sino om i-po it agazo o tugas kananganko i tinomod di Sikul Kitab: Ino-no i palajaran do Kitab Vagu om Kitab Laid, i kosipan om i hoturan dot ulun Kristian om i tudukan do kuran poromot sid ongoulun di Habal do Kovosihan. Suvai kiontok i sikul dino ong ikid minggu i murid tumabang magandaha dit ongopiumpugan. Kouli-po hari satu, mihahabal om mongimpuras sid sikul di pangalaman di sumambayang sid piumpugan. Na iti-no it onsi dit ongotudukan antad tanga hari hari satu sampai tanga hari hari enam. Kagi, i vaza sumambayang do mamakai do longoi sid boros Momogun om kuran kadapat do mongubas mindolongoi om monuduk do longoi vagu sid piumpugan, ino dino nga osusa mongitung om pamung sid ongotudukan. (Ong sid hal diti, varo uunizon antad di Bienz, i tiuli sid Switzerland dot amu-po avi i toun, ino-no i dau do Amerikan Organ. Dinumagang-oku di organ dino sampai insan songminggu, miniumpug-okoi sid valai-ku do miubas-ubas mindolongoi mamakai di organ dino.)

Nokiro-no ino kavi, atalahas-no dot iokoi minisavo, a-milo-milo rumangkat sid Sikuati, tu monodia di sikul om manaan dino tugas dino. Topot i gama di savo-ku sid Lok Yuk nga opongo-i.

Na varo-po kopiupakatan do tanid, ino-no, kuran mamahagi di **tugas do manaud dit ongopiumpugan** om i rombongan dit ulun di nokosuvang do Kristian dit amu-po opodsu-no, ong kodung kouli i Honegger Mei 1957. Na i **Haeusermann**, tu sid Batu Dua ot inintoronon, minomoros dot iosido-no laid mamanau ponong sid utara, ino-no Gumandang, Tipa Papan, Suangpai om

Kimihang. Ong sid Kimihang miumpug it ulun antad sid Bangau, Loro t'opodok om agazo om Longgom-po. Iosido pamung sid dau do tinaud i gorija sid Lodung, do sid Lodung miumpug it ongoulun antad sid Pilang, Kusilad, Pinurat om Kodungkung. Sabap iosido sid Batu dua, oruhai mingalud kumaa sid Lodung, om iosido-po o momiara dit anganak Rungus di sumikul sid Kudat. Na i **Sigrist** minongumba do project mutanom do parai sid ovoigan sid Rondonon, pinavalang-no dot iosido momili di piumpugan sid Lajong, Handal, Vingolon om Angkob sampai Rondonon bahagi di dau do tinaud. (Ino-no rontob, kodung nokouli-no i Bienz sid Switzerland, rinumangkat-no ioti Sgirst sid Batu Dua, tu i kiniro dioti, agazo ot intoronon dot osukup it ongoongkob. Antad diri, kavi-avi it ongopanahan di Sigirst sid ongopiumpugan dau om sid putanaman sid Handab, tu sid tana di BM diri, minoniin iosido do mananom do parai sid vaig, ko i project sid Rondonon, nga lobipo osodu i panahon dau).

Ong i ongopiumpugan vokon, ino-no, Rampai, Popot, Merebau, Kumbatang, Dahi, Barambangon, Masangkung om Dompinit, nga a-milo- milo, **dohon do vatas**.

(Ong itungon biano do kuran i nibahagi i tugas om it inintoronon diri, banalko ogolivong. Tu kaluto i sikul Kitab, i noumbaan diri sid Sikuati, nga sid Batu Dua-no ot kinengkakatan, i Kudat i tanga banal do mission, dot oruhai miamung dit ongogama do monuduk sid sikul Kitab om manaud di asrama om guru i savo-ku sid Lok Yuk, gam kihak i savo-ku mangajal dit anganak do asrama om kiontok banal sino do kopiamung dinot ongosuku do mission. Minsanko i toun 1963-64 banalko apagon do monimban dit kinapangaan di komitee sid Basel do pengkakat sid Sikuati i sikul dot ongondou bahagi palajaran do ropuhan om monombil om i mananom do totodukan . Tu banalko aso guna sinod Kuati mananom do nunu-nopo, gima araat i tana di bai pantai-nopo. Topot i hiza diri, tu retanko i Sikuati o puun do mission sid Dusun, nakalandu-no banal i gama mongumba di kosurutan sampai minongimbulai i kogumuai dot ongokilangan).

I hoturan dot ulun Kristian iadko Adat vagu

Sid kopiupakatan di Witschi varo-po hal vokon, ino-no, Kuran kadapat mongonsi antad sid Kitab do hoturan dit apatut bahagi di kengkakatan di Gorija Rungus, supaya ino hoturan dino monulung dit ipat-ipat it ulun Kristian, ko it ongongkob om ensanan i piumpugan om gorija do sumusui di Tuhan Yesus om monuluk di kenginan do Kinoringan sid saralom do kopolisan suvab-suvab. Ino-no ot alanta diri, it adat laid di minangahatul di kopolisan sid binatang amu mionong di kosipan ko i tudukan om kopolisan dot ulun Kristian.

Antad di kinotimpunan do varo a-ko piro ongoulun om ongkob do Rungus ko it ensanan o binatang di manantu do sumuhut dit ugama do Kristian, turus minimbulai i pongitungan om kopigogutan do kumuro i pitonidan dot kopolisan laid sid labus om sid Kristian. I kakali sid labus, varo ADAT i kinovidan dit ulion do binatang om i bobolizan, supaya ensanan it ongoulun sumuhut dinot adat dino. Ino adat diri minanarang dit ombo i kavasa om it amu kavasa.

Manjadi ino-no o minongoduat it ulun di nokosuvang do Kristian; Varo-ko adat vagu ko pengkuro ong biano? Nunu i harati i persembaan di varo sid gorija Kina? Kuran-ka i popisavo dit anak?

Kavasa-po-ka magapid? Kavasa-ka mamung sid sambayang sid rogon ko i gama mongoluvus do lobong do varis sampai miinum sino, ong nokosuvang do Kristian?

Manjadi sid a-ko piro pongumpugan dit ongoosukod do piumpugan minanalahas-no laid i Honegger ombo it atag om amu. Minonuturan-no i Honegger do kuran i dau do pangalaman di kakali iosido sid Kalimantan sid gorija Dayak om kuran sid dau do pomogunan sid Swiss. Ino-no i pinanarangan dau, I persembaan it nendukut hiza dot opongo sumambayang, mad tanda do monorima kaseh sid Kinoringan., dot i kogunaan, iso bahagi ponong di kapangatagan do panambayanan om iso bahagi ponong sid ponginjilan. Ong musavo, suvai miuma dot umul dot 18 toun. Topot amu magapid it ulun Kristian, gam ong kiapid-no laid, atag do mitongkizad.. Kodung Kristian it ulun, amu mamung-po sid sambayang sid rogon ko miinum do kinomol sid umpug sino. Manjadi nening-no dit ongosukod i iadino, mad buatan diri do mangakun ioti ong kodung minongoduat-no i Honegger dot, mongoho-kou-ka di vaza sid Dayak om Swiss ko amu? Mad ensanan-no i miumpug diri tinumimpa dot, Oh, ka. Rontob-nopo i pangalaman antad diri amu enizo. Varo di kakali popusavo dit anak dot ondu di banal omulok-po, Kagi i hiza diri, isot ulun nga aso do varo katarangan di kinosinaan (birth certificate). Ombo-nopo i kenginan di molohing monimban dit umul dit anak dau dot ondu. Pengkaa

dino, ong varo varis minatai, kuran-no dot amu mozo mongolobong om mongoluvas do lobong. Tu iti-no i tinungkusan do mongohormat dit kovorisasi di nokoling-no dot aso dangol. Antad dino mad kakali varo ogumu ot ongohal dit amu-po atalahas ko amu-po otorima ko ohorotizan. Iti-no o sabap dot ino-no i kinapangan dit umpug dahai di Witschi diri: Kodung varo vagu pongumpugan dit ongosukod, a-milo milo varo a-ko piro tudukan dit ipanau sid Kitab, lobi- po sid ongosurat di Paulus di minonuduk laid dit ongopiumpugan di Paulus. Iri-ogi kondiri dit ongosukod o mongitung om miupakat sampai mongoho dot ombo it atag om jumadi do ADAT KRISTIAN bahagi i gorija do Rungus. Suvai nosodia-no laid ino tudukan om pongodumapran di hoturan dino, i Haeusermann, ioku om ioti Majimil om Diyun miniumpug sampai minonodia dit ongotudukan om panarangan dino. Kondiri di Majimil om i Diyun minanarang sid umpug dit ongosukod do kuran i rasul Paulus minangahatul om minogkovosihan dit ongopiumpugan sid Tessalonika, Galatia om Korintus. Minsan sid ongopiumpugan kodori diri, varo-no laid kogolivangan dot ulun Kristian dot ombo i kavasa om amu miabal sid Ongorongus, ka di tudukan dioti. Inot umpug diri mad alaid-laid miduduat om mititimpa do gama manalasai ombo it amu-po atarang om i pitonidan dit adat laid om Adat Kristian. Iri- ogi minanantu-no it umpug dit ongosukod dot ino HOTURAN DOT ULUN KRISTIAN ino-no panarangan di kosipan om kposisi tokou ulun Kristian. Sid tohudi't adau, ino hoturan dino jodizon dot puun di Perlembagaan do Gorija Protestant sid Sabah (PCS).

I keso Sikul Kitab sid Sikuati

I gama monodia di posikiran dit ongoonulung sid Sikuati diri pengkaa dino, I Haeusermann om ioku minonodia dot opodok o buuk di iadko agenda. Sid buuk dino inumpug it a-ko piro longoi sid boros Rungus, tu it ongolongoi antad sid Indonesia di napakai-no, keso, amu kaharati it ongoulun, koduvo, i kogumuai bai solinan antad sid Inggeris ko German dot mad amu ohorotizan, gima kata demi kata o gama manalin vagu. Iti-no o sabap, alaid nokotimpun-oko di diri do mangagama di longoi di pavalang di kosipan dot ulun Kristian om i Tukuran di Tuhan Yesus, kopionong di lagu dino longoi antad sid Indonesia. Varo-po nakamung it a-ko piro ongopomintaan dua bahagi sodop adau, ko ontok do sumambayang bahagi dit adau dot agazo ko ontok mongolobong om i-po hoturan di manambayang sid minggu ko it ongoagazo ot adau Kristian sid saralom do toun. Ino buuk dino banalko kiguna sid kursus do mangagazad di kursus om iri-ogi jinumadi do pakakas dit ongoonulung sid tugas do mangagazad sumambayang.

I Sigrist minangahatul di koturugan di valai, supaya nonong-no i gama i tukang do Kina.

Minomili-oko di not apat ponulung di kipangalaman do mamung sid kursus dino, ino-no i Majimil Tuorong, I Diyun Madalag, i Angkangon antad sid Ronggu om i Osuman antad sid Rampai. Ioti songongkob rinumangkat ontok do Oktober 1957 sid Sikuati.

Oduruk nakaharati-oku dot osusa tumimpun sid kotimpunan, ino-no mongubas laid mamasa om monurat.

Sabap amu-po opongo it onkob dot agazo sid valai vagu, minonuduk-oku-po sid valai laid di sid station di bai pagong o taap om rinding. Na it anganak dioti kakali minonodiri di tempat vagu do siombo om nunu it atag mimomoi ko posurut. Amu songkuro mininsomok-no ioti sid valai laid sampai minongining do kuran it ongoama dioti miningubas mamasa. Sabap i pongoringing bai pagong om varo-kagi oruhak-no i rinding, miim- tiim it anganak do sumirot om sumusui do kuran it ama sinod onkop dino mamasa ko monurat. Manjadi, i minamasa dara i Angkangon ombo i nokosurat sid etom i rinding, do kakali amu tantu kosonsob ko bai ogolivong iosido do nunu banal it hurup sino dino, varo dolou antad sid lamas do rinding di minongodim dot, Ama, iti-no o "G", ka di dolou dino dit antad sid anak di Angkangon, ino-no i Sinahazin. (Naka panarang-oku diri di buatan dit ongohurup sampai kangku diri, ong i hurup "g" mad koluu dit iku do godingan. Iti-no o sabap do banalko oruhai mongohondom di hurup dino. Na i Sinahazin mad nakaharati dino pinarangan-ku sampai nokotiim iosido do tumabang dit ama dau di kakali okodou o bongut.) Topot i Angkangon gam hinumungot sampai minongogizak-no dot, Sinoooo, ka dau do minonunsub dit anak om i ongokoruhang di sid natad di valai diri.

Manjadi minogidu-no it anganak om sinumombol sid valai-za sampai minonuturan sid savo-ku di kinohungatan di Angkangon. Ino pangalaman dino o minonuduk di Inai Forschner om dohon dot a-milo mongitung do kuran kadapat mangagazad dit anganak, supaya amu mongunang ioti dit

ongoama om oonsug it anganak ombo i kiguna sid dioti. Na boros di savo-ku, Kuran-ma ong it anganak sumikul do misisingilo mamasa om monurat. Osuhul ioti miumpug sid agazo it apad-za (kaki lima). Ioku monuduk dioti dit ongohurup om i gama mamasa om monurat. Banal-no, kangku. Na sid sunsud di valai varo-po a-ko piro tombol do gondila dit amu apakai. Ino dino miurna do mangagama do meja om ogomon bahagi dinot hopod anganak.

Manjadi antad diri, adau adau, varo nosodia sangalad o karatas di manarang dit ongohurup om varo a-ko piro ongopongoretan di mamakai di hurup dit otudukan, do tomod pongubas mamasa. Ino kavi dino, nga boros do Rungus (ong sid ongokursus gulu diri, kavi-avi it ongosurat om ongobuuk, nga dang bahasa Melayu diri om iti-no o sabap dot kakali apaganan dit ongoponulung tumoguvang di gama mamasa di dau do boros. Sid ongo karatas dino varo lukisan di pemot di hurup om iso suntuan di popohondom di buatan do hurup iadko ino godingan om i hurup g ko i hurup p di varo tulang do pazas i niginin-no sid tulang dino.

Manjadi suvab suvab it anganak sumombol sid valai dot agazo sampai mokituduk di Inai mamasa om monurat dot a-insan mongunang vagu dit ongoama sid sikul. Ong minozo it anganak muli sid kampong ontok do minggu, minongovit ioti dinot ongonalad om minonuduk dit ongokoruhang sid binatang do kuran i kobuatano dit ongo hurup om i vaza mamasa om monurat. Ino gama dit anganak do polombus di kelaan sid koruhang, suvai nakaharati-oku dit insani nokovoza-oku-po sid binatang, mad varo pitonidan mantad di koubasan. Avangaan-oku, tu aso sino it anganak om aso kogangau iadko koubasan ong ogumu anganak miringtangkus sid binatang. Na minongduat-oku, pengkuro dot iadino ozom dot aso gulou dit anganak, kangku. Mad kerak it ongoulun sampai posirot dohon sid natad. Sinod natad songogom-ogom i sokovia i it anganak do enizo ioti parantai di tana om kikinavid do sompudung o kazu do tomod monurat sid tana dot ongohurup isuhut di tudukan dit anak di ponulung. I harati, it toriso-iso nalad di manarang di kobuatan do hurup mad nakazad-no sid a-ko piro binatang om pomogunan. Iti-no o sabap, kodung navi-no patarang i sokovia i it ongohurup di dang boros Rungus, nibuuk-za-no inot ongokaratas dino om pinungaranan-no i buuk dino dot, **Pangajaran do Mamasa keso.** Antad dino minonuhu-oku dit ongoponulung do monurat di tuturan di Asun om i Arun, ino duvo anganak di mimomoi sid binatang om mongimbulai di tasantanid-tanid o gama dot anak iadko magapon, moling, dumagang do barang sid kadai ko magasu om mamasang dot sungkoliu om i iadino.

Avantangan-no dit anganak i sikul sid apad dot i Inai minonuduk dioti hiza momiara dit anak dau i Michael di ragang-po, gam it ongoidi dit anganak nga sumombol mongimot do kuran it anganak sumikul om kuran i Inai pakan ko momodsu di Michael sid agazo o mundam. Inot ongondou nga varo anak dau sid kangkab ko sid likud dau, mad mongo-vongo ioti ong pakan i Inai di Michael do pazas ko punti i kakali bai tolu vulan ogi it umul dau. Ong iokoi, ka dit ongondou, amu pakan dot anak dit opodok do punti ko pazas, tu tumai-tumai, ka dioti. Iri-ogi kadapat manarang i Inai do suvai mansak banal it uva om miurna ogi ipakan dot anak, gam minongonsug i Inai dit ongondou do pakan dit anganak dioti do kouvaan. Pengka dino, ong kemot do kuran i Inai minonombil do soval om banat di Michael sid ponombiran, tumiim-po it ongondou monombil. Iri-ogi dinumagang i Inai di kosukupan do kumut bahagi do kosulungan dot ongo podok po it anak.

Topot iokoi kopihiza dioti sid apad sid sikul Kitab, it ongo ponulung opogos mamakai do ponuratan om popuhondom dit ongotuturan do Kitab sampai mongimbulit mamasa om monuturan ko monginsosok-oku dioti do nunu it ongoharati om kuran i vaza poromot dino kavi sid ongopiumpugan. Ino-no nga atalahas koduruk, Aso guna do bai onom vulan sumikul do iadino, suvai omungon-po do sontoun, supaya kiguna i gama monuduk om sumikul. Iti-no o sabap, minangplai-oku sid Basel Mission do obuli ponoruvon i sikul om i kosukupan do balanja bahagi di sikul. Om i Basel Mission minongoho om minongirim di balanja bahagi iso-po toun.

Na it enjin di pogumu do nalad di kisurat mad kakali dang kodori (ong itungon bianco), tu osusa do mongozopos do karatas do supirit, supaya rumaliu i warna sid nalad vokon. Ong avantang banal i warna, sampai hatus copi kadapat manalin, iri-ogi atanus-no i warna sid original. Manjadi sid saralom di 18 vulan kisikul, nasalin-no sino i Tuturan di Tuhan Yesus om it ongotuturan di Kitab Laid, di sompi limo nopod ongotuturan, dot okonko bai mamakai sid kursus, inoi nga bahagi-po it ongo ponulung vokon. Sabap i hasil sid kursus napakai-no om inanu-no inot ongotuturan di nasalin-

no sid Momogun do tudukan dit adau minggu sid ensanan it ongopiumpungan sid saralom do duvo toun.

Otoliban-po i kokotuan di toun 1958, banalnoko alaid dot aso darun sampai okorop i pomogunan om nasak it ongovaig sid bavang. Minsanko i vaig sid tangki do station, navi-no, sabap minilang-okoi kavi sid tangki diri. Mad aso kopurimanan dot tidarun, tu aso mituvong ko barat di porikot do darun. Minongitung-okoi do sionngo kadapat mongoi do vaig do bai inumon om bahagi magazau bahagi dit ongoongkob do ponulung om iokoi kondiri sampai i rumah sakit. Gam i naas naavi- po banal i vaig sid kulam, retanko osusa do momoug di rumah sakit.

Na i hiza di manampangi, nemot-ku-no dot ogumu vaig rumulun sid sampaping di dundung do Landrover, tu okubong i tana sampai minsanko i vaig antad sid tambak, muli sino. Nokotiim-oku laid do mongukad dot iso talaga, supaya kadapat moniram di pananaman do tomato om ongovusak. Rontob-nopo, ino vaig dino mad nosin-no, tu osomok-kagi sid tampak. Asarok-ogi varo mandahatan mimbulai antad sid ongotampak do manabpo dit ongomanuk om itik-za.

Minongoduat-oku dit ongoponulung do kumuro mogihim do vaig sid tempat sid sampaping do dundung do Landrover, tu kangku dioti, Ong sid dahai, kodung varo kosusaan do iadino, manalaga it ongoulun do mongukad do luvang sampai kosondot dot ovud. Tu minsanko okorop i tana sid soribau, a-milo-milo, varo-no vaig sid saralom, kangku. Na minonimpa-no ioti dot, ong sid Rungus varo pibabaran om pongitungan dot isai-nopo i mongukad di tana dot aralom, inot ulun dino mad monodia di dau do lobong. Tu it ongokuasa do tana amu koho do mangadamat di tana. Manjadi kaharati-oku dit ambat dino do tantu ioti amu tumabang dohon manalaga. Topot ahali i kosusaan dot aso vaig. Sionngo kadapat mongoi ko dumagang dot duvo nopod bandu vaig om kuran pengrikot sid Sikuati? Bai iso-po dinuat-ku dioti: Nunu sangkazu kiguna mamakai ong pongorinding do vaig, supaya amu karaliu i vonod do kazu sid vaig antava ko kiavau di mangaraat di vaig.

It amu-po avi i songhanggum oponu i vaig sid kulam, tinumimpun-oku mongukad ong kodung nopongo-ku-no mangajal tanga hari sampai nokosondot do sampai onom kaki karalom. Iri-ogi minangagama-oku do mad tuung dit aso rinantai dot apat kaki persegi om nisuvang ino tuung sid luvang. Songkuro-nopo mongukad vagu, murut-surut-ogi i tuung minsibak, nga minomongo-oku mongukad. Abarou-barou-po nokotorong-no i Inai om minonulung do manarik do boloji dit oponu do tana om iuza-no sid siring sino, gam minongoi-po do lampu pomp, supaya oimot-ko i gama-ku mongukad. Suvai valu kaki aralom, iri-ogi mimbulai dot okudik vaig miri tiri sumuvang sid luvang, nga minagavi-oku mongukad om pouza-po i vaig di noumpug sino do sampai tanga sodop. Varo kopurimanan dot aso tinganan momongo mongukad, tu kopihiza osusa managou di vaig om it tana dit noukad. Linumabus-oku antad sid talaga om minuli sid valai sampai minodop do banalko opogos om ohuzan. Dot osopung do sasarap, mogkodimot-oku di talaga sampai avangaan-ku, tu nokosurut no i vaig do sampai labaan dot apat kaki aralom i vaig. Kagi i vaig dino anau om okon-ko oosin.

Ino-no i kovongo-vongo, hiza di minagavi-oku mongukad di talaga do sampai tanga sodop dot i lampu pomp panavau di mintutuk sino, iso nga aso ponulung mininsomok di gama-ku di norindingan di dundung do Landrover. Topot kakali minomorisa-oku dot kiguna i vaig ko amu, rinumikot i Diyun do banalko mongo-vongo do varo vaig sid talaga sampai pinangahabal sid ongokoruhang sampai ioti kotoronong om tinumimpun do managou do vaig bahagi di ropuhan dioti. Gam a-ko piro tatau, minsanko i Kina sid simbol rumikot mindamo do managou sid talaga-za. Om ino pangalaman dino nakazasad sampai sid tohudi dot adau, ong kodung varo koruzahan do iadino, manalaga-no it ongoulun sid natad dit ongovalai, isuhut di dohon do suntuan. Antad diri varo vaig dot avantang sid ongoropuhan, tanid mantadko it ongopongonuvan do vaig sid bavang ko sid okubong o tana do okon ko bai ulun, inoi nga ongodupot iadko karabau minanagou do vaig dot inumon ko podsoun. Sabap i gulu diri, vokon-no minsanko sangvatu osusa mamananau it ongondou do ponuon it tangga do vaig om saanon muli sid valai. Sabap i tugas do monodia di kosukupan do vaig nga gamaon dot ongondou.

Nopongo-po i manalin di **limo nopod ongotuturan di Kitab Laid** antad di Kinotimpunan do pomogunan sampai sid ongonabi om limo nopod-po di Tuturan di Tuhan Yesus, tinumoguvang-okoi-po sid kursus di gama mamasa om manalin di keso i surat di rasul Paulus pakaa sid Korintus om iso buuk di Kita Laid, ino-no i nabi Amos.

Na sid saralom dit apat minggu gulu-ko opongo i sikul Kitab om momonguli-no it ongoPONULUNG sid kampung, minongimot ioti di koturugan di panambayangan sid Popot di banalko tanid mantadko i sokovia i it ongopuvalazon di napakai-no do pongumpugan dot ulun Kristian di dang Rungus. Sampai i hiza diri, it ongokristian pinengkakat do panambayangan iadko dundung do pagong. I babaal antad sid govuton miuna dot origi, suluw, vahat, imburulu om ponikagang di rinding om ipanaap. Topot i piumpugan dit ulun Kristian sid Popot, minongumba do pengkakat do panambayangan dit apapag om otiru, isuhut di kapapago di binatang dioti, tu ka dioti, ino valai dino kiguna, okonko bai duvo, tolu toun om orobuk-ogi sampai osusa mangaganti, inoi nga supaya tungkus-monungkus apakai om tanda do mongohormat do Kinoringan, tu valai do Kinoringan kagi ino dino, ka. Iti-no o sabap miniupakat ioti dit a-ko piro ulun do kampong dit elo mamapan, supaya ioti minonodia di kosukupan do papan om timburulu om ponikagang dit apasagi. I vokon minongoi-no sid himbaan om govuton dit ongolombon o batang bansalangan.

Amu ooling-an-ku do kuran it ongoulun Popot minonompuzung di duvo suluw bahagi di gorija dioti ontok di toun 1959. I konoruvo di suluw dino, labaan do 35 kaki om i kolombono, nga sakaki sid puun om kakali valu insi sid pompod. Labaan do tolu nopod ioti minonompuzung di suluw dino antad sid himbaan, dot i ralan dino varo atakad om varo oruhuk. Nokorikot-po sid tempat di puvalazan, kavi-avi it ongoavak dioti kidamat ko kiraha, tu nohontipan i kulit. Topot banalko otomon ioti diri, tu nakadapat do iadino o babaal bahagi di gorija dioti. Bai apat minggu sampai nopongo-no i panambayangan dino, i nengkakat sid puru sid pialatan dit ongoranau. It ongondou om it anganak minongoluvus dino puru om a-ko piro kusai minongukad do talaga, supaya oruhai sumagou do vaig sino dino.

I gorija dino nobuka-no it adau ko 18 Julai dot ogumu it ongoulun antad sid ongopiumpugan vokon nokorikot sid Popot, tu sumasi di kinopomukaan di gorija sino. Om i minggu vagu, i ko 25. Julai, varo-po sambayang do momodsu dit a-ko piro ulun do Popot om mongohormat-po di poginakanan di Tuhan Yesus dot insan-ogi sid piumpugan do Popot.

(Iso ot atag do manarang siti, kananganko i vaza manaap di panambayanan do Popot. I hiza diri varo hoturan do porinta do pingpaaman it sokovia i it ongotaap om valai dot ulun do DDT, ino ubat di pamatai di tukang. Indoson di porinta ong iadino kadapat popunso di Malaria. Kasalaan-nopo, ino ubat dino pinapatai di tukang om i lipos, topot ong it usus di mintoron sid pagong sampai mongorongoi do pagong, ino-no i nopung, gam amu-ko songkuro, navi-no muvu i pagong om taap, gima inakan-no do usus. Iti-no o sabap, i gorija do Popot tinaapan do Zink)

Na i tuan Honegger nokouli-no sid Sabah dot iseso iosido ontok di vulan tiga 1959 om i Haeusermann minuli sid Switzerland do sumuti. I harati, i Honegger minomongo mangajal sid kursus mongontok di Haeusermann sid saralom-po do tolu vulan sikul.

Na ino hoturan do Basel Mission do miganti-ganti do varo jadual dot a-ko piro toun sid Sabah om varo-po hiza do suti sid Europa minongimbulai do kinapaganan, tu atalahas-no dot i Haesermann, suvai koguli vagu sid Sabah ontok di vulan sembilan di 1960, Ong i Sigrist minamalang-no do suvai vulan Julai 1960 ozi iosido muli sid pomogunan dau. Kagi, amu-po alaid i Honegger nokorikot, nokopurimon-no iosido dot amu osihat banal sampai i kiniro dau do amu songkuro, mintoron-no iosido gumama sid Sabah sampai muli sid Switzerland dot amu koguli vagu. Na kuran it atag o kotukuran-za, ong iadino? ka di kiro-kiro dahai diri. Manjadi nemot-za i kanangan di pengkaa dino: I sikul Kitab ontok di Vulkan Julai navi-no. Suvai momongo i sikul do Kitab i hiza di kokotu-no vagu (April 1960. Mad pooriat i dahai do kalatangan. Osuhul iokoi minisavo muli sid Germani koduruk sumuti. Sori kadapat dot mokiubat it anak-za Michael, i nanangan do polio sampai norukung i hakod dau, oporisa do dokutul om oubatan om kemot do tompa di monukung di hakod dau. Iri-ogi turus miguli-okoi di vulan Febrauri 1960, tu pootibang di Honegger muli. Iokoi osodia-no vagu do momongo di sikul Kitab bahagi di sampai 14 ponulung. Nasalasai-po ino, dinumompipot-okoi-no kodung nopongo i kursus om i gorija sid Popot sampai minozo-okoi di kapal Marudu om linumombus antad sid Singapura sid kapal Asia. Ino hiza diri kakal somvulan-no sid tanga ralan muli mantad Europa.

Na **sid Europe** varo kotibangan do magandaha dit odu di Inai. Sabap i kakal-okoi sid Sabah, minatai

it idi dau ontok do Kristmas 1958 om iri-ogi i ama dau ontok di April 1959. Bai i-pot odu dau o kakali sid England minud dit kaandahaan dahai.

Sid Germani, nokodim-oku sid a-ko piro piumpugan di minokihabal do kuran i kosurutan di Mission sid Sabah. Vokon-no gam kinumiupakat dohon do manahak do sumbangan bahagi dit ongopiumpugan ong varo project dit avantang (iadko i gorija vagu sid Kumbatang - imatai sino). Kagi nemot-za do kuran i dokutul om i tukang di elo mamasang do kopihatan do tompa di Michael, supaya oruhai iosido mamananau om mingkakat minsanko orukungi it iso i hakod dau.

Nokouli-no vagu sid Sikuati February 1960

Manjadi i kinapanahan sid rahat kumaa sid Singapura, iri-no ko iri tolu minggu, do kodungko nokorikot sid Singapura, minudan-okoi sid tarabang, supaya oduruk-okoi kouli sid Sikuati. Sabap i kapal antad sid Singapura, vokon-no amu mamananau koduruk, vokon-no oboloti sid tanga ralan do a-milo-milo valu sampai hopod adau om kodompil-ogi sid Kudat.

Amu-po somvulan nokouli, minuli-no i Honegger, tu mad amu osihat iosido ko kogoos momongo di gama dau sid Sabah.

Kodung nokorikot, tinumimpuun-oku mongumpai di kursus koduvo di Sikul Kitab sid Sikuati, supaya osodia ontok di vulan April dot nopongo-no mongomot. Nokopomili-okoi do sampai 14 ongoponulung do varo kiongkob om varo-po kakali anak vagu. Minsanko i Abbah, i ponulung-za sid valai, minindamo do mamung dit ongotudukan do kopihiza iosido om i savo dau i Kiyoi, nga tumabang sid valai-za magazau om minggama-gama ombo it osusa mangagama iadko mobpupu, om monorika do kumut, monginsakot di natad om vokon-po. Ino-no i kenginan-za, ponginggumu do ponulung di nokosikul om nakapangajal di Kitab om i vaza mangagazad om manaud di piumpugan. Rontob-nopo, amu ogumu o balanja bahagi di kursus dino. Iti-no o sabap i gama keso sid kursus, poturug dot iso-po valai iadko binatang di miuma bahagi dot onom ongkob. Minangagama-okoi dino binatang do iadino, supaya oruhai mongohuzas om mangarangkat om pengkakat sid tempat vokon, siombo varo kogunaan. Iri-ogi miuma i pongintaranan di sokovia i it ongoongkob om i-po ongosuni vagu, tu varo-po it isot ongkob sid rompit di valai di Abbah bahagi dit ongosuni vagu.

Sid kursus dino minongimbilit-okoi-no mamasa om manarang di Tukuran di Tuhan Yesus om i-po Ongotuturan di Kitab Laid, i nialin om nipirin sid kursus keso. Iri-ogi tinumoguvang- okoi manalin om mamasa sampai mangaharati dit **Injil Markus**, inot keso onibak ot injil sid Kitab. Ontok di Advent 1960, okonko bai nopongo manalin di Markus, gam nakadapat-oku momirin do sampai hatas kopi di buuk Injil di Markus. Kodung nening-no sid ongopiumpugan do varo Injil Markus sid boros Momogun, rinumikot it ongoulun, tu engin dumagang dot iso kopi di kihorogo do soringgit. Ino-no rontob it hoturan-ku mongojual: Suvai it ulun dit engin dumagang manalahas sampai pembulai dot elo iosido do mamasa, iri-ogi atahakan-ogi iosido di buuk. Tu rumosi-oku dot kakali varo ulun di mamakai di Kitab iadko hojimat di mangajaga do rogon. Tu kakali varo ongoulun dit, ong engin sumuvang do sambayang, nga mindamo do gambar di Tuhan Yesus ko i Kitab Melayu, i kiroom dioti, ino gambal ko Kitab ipangajaga dit ongorogon sid valai ko ongkob dau sid binatang.

Manjadi, amu-po duvo minggu om navi-no i hatas Injil Markus dot i harati, labaan do hatas ongoRungus elo-no mamasa, minsanko i hiza diri aso-po sikul. Ogumu it ongoulun nokelo do ABC, vokon-no ong bai antad sid Buuk Longoi ko it ongotuturan di nituduk sid ongopiumpugan ontok dit adau do Minggu, ko i nituduk-no dit anganak do ponulung ko it anganak i sid asrama sid Kudat. Salaid i Sigris sino, minanahak iosido do palajaran mutanom, nga minuli sid Swiss ontok di vulan koturu. Ong i Haeusermann, i minanansavo di kakali iosido sid Switzerland, rinumikot-no vagu ontok di vulan September sid Batu Dua. Iosido minonuduk vagu sid sikul Kitab ontok dit adau hari empat do sasarap dot i dau do tajuk, i nabi Yesaia, nga minamakai- no vagu iosido di Bahasa Melayu sampai pinoromut-po sid ongoponulung do kuran atag o gama do mongiro do siin om i persembaan om patandon ino sid buuk do persembaan .

Topot iokoi, kodung opongo it Injil Markus, tinoguvang-za no it ongosurat di Paulus om Petrus do tomod manalin om mamasa sampai humarati, gam mongitung-po do kuran dinot ongopangalaman dit ongopiumpugan diri supaya kiontok bahagi dit ongopiumpugan biano. Iso-po o tudukan di netung-ku-no di banalko kiguna, ino-no i tudukan di Tuhan Yesus sid timpak do burul (Matius 5-7) om it

ongotudukan vokon i nokosurat sid Injil di Matius; Fasal 10, 13, 18 om 23-25.

Na it ongomurid, kodung adau do minggu, ko minsosodop do hari enam laid, muli- no sid dau do kampong, tu mangagazad di piumpugan di Minggu, sampai miguli-no vagu sid Kuati do hari satu. Bai tanga hari satu o kotimpuun i pangajaran. Vokon ioti osodu banal o ralan, iadko sid Gonsomon, varo tolu ko apat jaham mintana om korikot-ogi. Topot, kodung noumpug i hari satu, i gulu o gama sid sikul, mongining dit pangalaman sid ongopiumpugan om kuran it ongoulun tumorima dit ongotudukan di Kitab sid boros Momogun. Manjadi inot ongohabal antad sid ongopiumpugan kiguna banal bahagi di tudukan vagu, gima ino dino tinumabang dahai mongimpuras di panangan di kosikiran diri.

Ong it anganak om ongosavo dit ongomurid, iadko it insani, sinumombol- no vagu sid Inai, dot it anganak mokituduk om misimomoi sid di Inai om it ongoondu minongimot di gama di Inai momiara om monorundakai dit duvo it anganak, ino-no i Michael om i Martin, bai ragang-po diri, tu nokosino iosido sid rumah sakit sid Kudat adau ko21 di March 1960. Miovoli-voli it ongondou monombil do mamakai di ponombiran di Inai om mokibahagi do kumut do monombil do soval ko banat dit anganak dioti. Ong mamajak do kumut sid kadai, omura-ogi sampai inoriat i sagu hati di ponulung do monobus di horogo do kumut.

Ino hiza diri minonurat-oku do surat keliling sid Germany om minonuturan do kuran- okoi sid sikul dino momongo di tugas-za. Na varo timpa antad sid iso piumpugan dot, kodung nening-za dot kiontok ino ponombiran bahagi dit ongosavo do ponulung, engin-okoi pokirim sid dikou di kosukupan di miuma dumagang dot a-ko piro ponombiran, supaya sera ong muli it ongondou sid kampong, kakali kadapat ioti monombil om pemot dit ongondou vokon do kuran mangagama do kosulungan bahagi dit anganak, ka di timpa diri. Kahabal-po sid dioti, minansadang-oku dot osuhul mogihim do vaza, supaya ensanan ioti i kiongkob kadapat do ponombiran. Sabap amu miuma i siin di nokorikot bahagi hopod ponombiran, minongitung- okoi dot tasambahagi di horogo, kondiri it toriso-iso ongkob mongimbulai, supaya amu osusa do momili dit isai o kanu do ponombiran om isai ot bai monolos. Antad di pinobohogizan di sumbangan bahagi di ponombiran diri, I minuli-no ioti vagu sid kampong, varo-no hopod kampong do varo ponombiran om varo't ondu di nokelo monombil om minonuduk dit ongoruhang i monombil dot ongusulung dot anganak sino.

Na i janji di **kapangan di sikul Kitab**, ino-no i hiza do tumimpuun-no i toun do parai, ino-no Julai 1961, tu i kiniro-za diri, avantang dot it ongoonulung muli, supaya otibang ioti do monodia di dau do tagad 1961-62. Kagi i kopurimanan dit ongoonulung om ioku kondiri, mad ohuzan om abasan monuduk om mokituduk, lobi-po it otuo-tuo it molohing dit amu oubas do bai mogom-ogom dot asadapan mamasa om monurat. Mad miuma i tudukan di didiri sampai osusa do mongus-ongus-po. I dohon dot umba, amu momongo dot ongourusus do labaan do songtoun koledo, inoi nga bai psikuron dioti om i vokon i hiza sid pialatan do kapangan mongomot om i kotimpuunan rumilik di tagad do toun vagu. Tu ong iadino, amu apagon do mansahari do balanja ko mokikirim sid Basel Mission, inoi nga ikid ongkob varo tagad ko ranau sampai kibalanja. Ong bai duvo vulan o sikul, amu kovoza i savo anganak sampai i pongonovan do kakanan, ino parai do rukut miuma dot akanon dit ongoonulung sid sikul sid saralom dinot duvo ko tolu vulan di sontoun.

Ontok di vulan Julai 1961, minongolumpatos i kommittee do Basel Mission do mongimbulai do **Farm School** sampai minanahak di Haeusermann om dohon di tugas do manantu di tempat di farm school. Manjadi i Haesermann, tu ulion dahai iosido, minangaplai sid porinta om ioku minangahatul dit a-ko piro ongoulun do mangarantis di tana bahagi di farm school sid Bavang Gazo. Ong otopot, iokoi di Haeusermann ogolivong, tu nelaan-za do varo duvo Farm school project di Basel Mission sid Kalimantan om sid Cameroon di sompi amu sumurut om amu songkuro, notutup-no vagu. Rontob i Kommittee lobipo minongining sid di Sigris, tu ka di Sigris, ong ioku suvai miguli vagu sid Sabah ong koho-kou do momuka-oku do Farm School, ka dau. I hiza diri kagi, varo ogumu ot siin noumpug sid ongopiumpugan do Protestant bahagi di komojuan dit ongopomogunan sid Afrika am Asia. Na hiza di kakali ioti sid Basel miniupakat, varo surat antad sid Basel di mindamo dahai do mamalang di dahai do pongitungan kanangan i kogunaan do farm school. Ino-no i timpa di

Haeusermann om ioku: Ong momuka do sikul dot i murid nga ongosolumpak vagu, varo kapaganan. Tu it koubasan sid Rungus ino-no, Sabap i kodori diri asarok matai it anganak dot amu-po osukod, banalko aso gazadan ko tudukan dit anganak, lobipo ong kusai, tu rumosi dot amu opud. Manjadi hiza di momodsukod i anak kusai, mad ulun dit aso bahazan, mirimpanau om amu tumabang sid valai, moling-nopo om aso tantu-tantu o gama dau. Kodung emot di molohing i iadino, mogihim ioti dot ondu, to popusavo dit anak sid ondu dino, dot iti-no i vaza, miupakat di molohing dit ondu di kogofoo do buru. Kodung varo kapangan, gazadon- no i kusai sid valai om ongekob dit ondu, vokon-no it ondu amu-po elaan do varo kusai korikot. Asarok it ondu kakali anak-po do bai momodsunii. Ino-no i kogunaan: it ivanon di kusai o monuduk dit savo dit anak dau do kuran it atag o gama momiara dot ongekob. Vokon-no i kusai mad uripon dit ongekob dit ondu. Sid ivanon misingilo iosido manatas do kazu om mokibabaal ko rumilik om managad sampai mangasok om mutanom. Otoliban do duvo, tolu toun, iri-ogi mongoho i molohing dit ondu do tumanid dot ongekob i kusai dino. Manjadi, ka di surat dahai diri sid Basel, Minsanko it anganak sid farm school misingilo di tanid o vaza mutanom, kodung kouli ioti antad sid farm school, pononsovoon-no ioti do molohing sampai mokiuripon ioti sid ivanon. Topot okonko it ivanon misingilo sid tumokin, inoi nga it ivanon monuhu di gama dit omulok-po i kusai, minsanko nokosikul-no iosido sid farm school. Iti-no i dahai do sadangan: okonko sid sikul dit osodu antad sid kampong o tempat do monimban di vaza mananom, inoi nga sid a-ko piro kampong monuduk om mangagazad di pananaman vagu, supaya it ongekampong vokon ong kodung kemot i suntuan, sumusui-nopo . Ong iadino, i guru mutanom pengrikot di sikul sid ongekampong om it ongootuo it ulun tumorima di tudukan om kopihiza mamakai di tudukan sid dau om dau do tana, ka di surat pangambat dahai diri. Gam minanarang-oku-po sid komitee do kuran i dohon do kotulungan ponong sid komujuan do kampong Kumbatang i minangagama do alun-alun kumaa sid kampong dot longon om palad dot ulun minangagama dot bai i horogo dit ongodila do sangkul ot osusa omungan. Suka rela kavi isuhut di koubasan do mirogop i songbinatang. Iri-ogi kodung varo tomodon-ku kumaa sid Kumbatang, mongovit-oku no do sampai 150 bibit do nizuw sid isai-nopo it ulun di nokendamo sid dohon om nosodia-no laid i horogo dot hopod siin sompuun. Gam varo-po upakat do suvai noukad-no laid it ongoluvang bahagi di pananaman do miuma i kogofoo do luvang, iri-ogi yatod-no i bibit. (Nakaharati-oku-no dot suvai agazo i luvang, om oruhai ogi i gamut do bibit sumurut om tumongkop di luvang sampai oduruk om monguva. Iti-no o sabap dot minongohodtol-oku banal dot pagazo banal dit ongoluvang bahagi di bibit do nizuw di nemot-ku-no do varo Rungus dit ong mananom do nizuw bai minongukad di tana dot i dangol ot pakakas dau mongukad do bai ngaran -noko agazo mantadko i nizuw i luvang.) Om i kagama dot iadino i dohon do gama mongoriat do nizu sid ongoulun do Kumbatang, ino-no, nening-ku-no dot om i Rungus mindamo sid Kina do bibit, banalko amahal i bibit antad sid Kina. Osusa iosido gumaji do sangadau sid kabun di Kina, iri-ogi kadapat iosido do sampai apat ko limo bibit. Nagaratan-oku dit ulun Kumbatang do mogihim do bibit dit omura. It a- ko piro bibit antad sid nizu sid Sikuati amu miuma. Nemot-ku-no sid Batu kohopod i kabun do Kina dit amu-no oula banal sampai i Kina minangakun do moniwa- oku di kabun dau. Sino dino rinibuvan i nizuw di nokosuni. Sori minongoi-oku di bibit om minangatod sid Kumbatang. I hiza di minuli-okoi sid Germany toun 1963, mad notongkop-no do tanom i tana sid Kumbatang, tu minisusui-susui no it ongoulun vokon di gama dit a-ko piro Rungus, di nokotimpun-no momuka do kabun do nizuw. (Ong i hiza di 1978, i minintarabang-oku antad sid KK kumaa sid Kudat, nemot-ku-no dot otongkop-no banal i vatas Kumbatang do noponu do nizu di monguva-no.)

Rontob-nopo, tu ogumu o sumbangan bahagi di komojuan, i kinapangan do Basel amu sinumuhut di dahai do pangalaman. Inot ongosumbangan do retanko komojuan do Dunia kotolu om i ginabatan di Sigrist o pinaratu di janji do momuka di kabun do Bavang Gazo di hatas om tolu nopod tinikiran kogofoo.

Sabap ioku sid Sikuati, ioku-no nokotugas-no do mangahatul di gama mangarantis di tana Bavang Gazo sampai mogihim dit ongoulun om miupakat dioti do gaji. Ino gama dino, nga hiza dot it ongoulun vokon kakali rumilik di tagad vagu. I harati, bai it ulun dit navi-no laid i parai sampai osusa gumaji om mogihim do koposizon, nga koho mamampang di rantis dot amu omura o gaji: Suvai labaan do tolu ringgit om koho-ogi ioti mangarantis. Nopongon-no mangarantis, sinumori-oku sid Tinangol om pinotorima dioti mangarantis di gaji. I mandul dioti, nga kinumavid di siin om

minamahagi-po sid koruhang dau.

I sodop diri, talib do tanga sodop varo kurita tumoronong sid station Sikuati do muni-uni i horn dau. Manjadi linumamas-oku om minongoduat do nunu o habal. I Kina, i minongenjin do kurita minangagazad dohon sid likud di Toyota Kruiser. Sinod palampag di kurita mili-gili it mandul dit ongoulun di minamampang di rantis. i nokotorima di gaji dioti, supaya iosido mamahagi. I monitiu-oku sid dau diri, nemot-ku-no dot nalaas-no it ulu sampai mad rumidi it utok dau sid laas dit ulu dau di maha-raha. I Kina antad sid Angkob, minongogorot dohon do patod dit ulun sid rumah sakit, tu retanko amu miuma i minyak dau kumudat om muli sid valai dau. Ong tanga sodop a-kadapat manganu do minyak, ka dau. Na engin-oku ko amu, aso tinganan tanidko poudan di Mozong sid kurita-ku om patod sid rumah sakit om manarang-po sid naas di tuturan di Mozong, di mihad-ihad om migigizak-no mongusul iosido sid dohon, retanko, Miguli-no vagu iosido sid rantis, tu varo a-ko piro kazu dit amu-po navi mangarantis. I minanatas iosido dot iso raan sid savat, tigogi, ino lavis do raan nokosondot sid ulu dau sampai novunusan iosido. Iri-ogi i kinoruhangan dau minangatod dau sid alun-alun sampai minongoi di Kina, tu mokiadot sid Kudat. Ino tuturan dau dino nilombus-ku-no sid di naas sid Rumah Sakit.

Amu-oku opiduvo do ginavo dot ino tuturan dau mad otopot-no, tu ong mangarantis do iadino kanaru o rantis om apanggol i govuton, oruhai do varo kopunovot do iadino. Iti-no o sabap dot amu-oku monginsosok vagu, inoi nga pinolombus dit tuturan dino sid di naas sid Rumah Sakit. (Suvai i toun 1985 di minagandaha-oku sid Sabah om nening- ku-ogi it otopot i najadi si Tinangol i hiza dot i Mozong minamahagi di gaji do mamampang di rantis do Farm school. Sabap amu atag i gama dau mamahagi di gaji diri, varo kopigogutan sid dioti ongomampang. Nokenum-no laid do kinomol, tigogi iosido kondiri kinumavid di dangol om monibas dara, nga iosido o notibas dot ulun sampai it ulu dau ot nonong).

Na minonurat-nopo vagu i Sigrist di kakal-po sid Switzerland om minindamo dohon do monodia do rilik bahagi do tagad, supaya kodung kotuhun iosido sid Sabah, kadapat iosido monutud di norilik i tana om mananom do dalai om mangasok do parai kopihiza dit ongoulun vokon, ka di surat dau. Na miniguli-oku vagu sid Tinangol om miupakat dot ulun do rumilik do sampapas do tana sid izan, i ponong sid Hobut om osoomok sid alun-alun do porinta. Manjadi di gama mogihim dot ulun di mangakun do rumilik, lobipo apagon, tu ensanan it ongoulun kigamaon kavi monodia do tagad. Suvai agazono vagu i gaji do sampai apat ringgit sangadau om varo mangakun. I minangaraun-okoi di tana bahagi di rilik dino, nemot-ku-no dot iso kazu di banalko agazo om mad osundu, tu otopuan do orkid om tasantanid-tanid o vusak om tatanman iadko it Andahau do banalko onom kaki i kosongoho. Ino kazu dino, nga NUNUK ARAGANG.. Bai iso nunuk aragang nemot-ku-no laid, dot iti sid Bavang gazo, lobipo avantang om mad masa dila monguji miuma do manarang di kobuatrano dau. Nemot-ku-po ino, minongitung-oku-no dot, ino kazu dino, tantu amu kavasa do rungozon. A-milo milo toudon-no banal ino Nunuk dino.

Iti-no o sabap minongonimuhun-oku dit ongogumaji rumilik dot, kadan-kou-no minsomok sid kazu dino rumilik, gam ong opongo-po rumilik, monodia dot rantis dot osongou, supaya amu kadapat it apui humandab sid Nunuk Aragang, kangku. Mad koho ioti, tu ino gama dino pinagazo di gaji dioti. Ong otopot, i hiza diri sid ensanan i daerah Kudat asot iso Nunuk Aragang di iadino kavasih. Nokorikot-po i Sigrist om minizon vagu sid Batu Dua, amu songkuro sinumori sid Tinangol dot minsanko mapit-po sid Sikuati, nga amui. Dot amu songkuro, varo't orongou-ku sid Sikuati do nokosori sid Tinangol i Sigrist sampai nopongo-no monutud di rilik, ka di habal. A-ko piro adau nakatalib, minapit-no i Sigrist sid dahai do tomod pentahan di nokouli-no iosido. Turus minongoduat-oku di kumuro di Nunuk Aragang. Ino-no i timpa dau, Ai, ino kazu dot olombon dino nahaba-no om novuvu-no. Sabap osodu i kazu antad sid rilik om varo-po osongou it noluvasan, i mula-ula, nga aso nunu-nunu. Dot alaid-nopo, tigogi tinumimpak it apui om iri-ogi hinumandab i sunsud di kazu do kotoluvan mikit-sikit. Iri-ogi hinumaba i kazu dino sampai navi-no sumorob, ka dau. Mad aso pongitungan do mad orubat dot orungoi i Nunuk Aragang dino.

I savo-ku om ioku di nokening di boros dau diri, mad minogihadi, tu nokoponuturan-oku sid savo-ku laid di kinavantangan di Nunuk Aragang, sampai iosido nokelo di Nunuk Aragang i sid Merebau, tu sori asarok-okoi mitalib, gam vokon-no om mongus-ongus-po sid sahau dit oluhung sampai mongo-vongo di kavantangan di vusak dit aso kerad..

Na varo-po tasantanid-tanid o gama minud-inud dot osuruton-no dino; sid ongokampong minud-inud it ongoulun di nokosuvang do Kristian do varo tudukan do kosipan om i vaza sumuhut di Tuhan Yesus. Tu iadino i gama monodia di kopomodsuan dioti. Iti-no o sabap pengavi minggu rumikot-oku sid ongokampong diino ponong do sodop om minanahak do tudukan. Vokon bai tanga sodop om kouli ogi. Kagi it ongoonulung di sid sikul, mozo om minongontok dohon sid tudukan dino.

Ong i gulu banal it osusa mangahatul, ino-no i koturugan do **panambayanan vagu** sid **Kumbatang**. Bai sombulan-oku-ogi vagu sid Sabah, ontok dit adau do mongohormat di Kinogulianan di Tuhan Yesus, miniumpug-okoi sid gorija laid di bai pagong o ginama. Kakali mindolongoi-okoi om manarang-oku di tuturan di kinogulianan, tigogi, banalko ologod o barat nokembulai sampai muzu-guzu i panambayanan mad tihaba-no. A-ko piro it ongokusai hinumago-no lumabus om minanatas dot ongokazu dit osomok di miuma do sungkod sampai minonungkod mintutuk do gorija . Iri-po i kavantangan diri, nosodia-po i poginakanan, a-ko piro it ongosukod minongovit-no do dangol, tu mangalaas do kazu bahagi dit apui di mangalasu di vaig dot inumon. Nosungkod-po i gorija, minomongo-okoi-no di sambayang om iri-ogi miniirung-okoi makan do roti om minum do kopi om tii.

Nopongo neno om songuli-uli-no it ongondou om anganak, miniumpug- no it ongosukod do tomod miupakat di kumuro di gorija dioti. Tu atarang- no dot aso guna do bai monungkod di panambayanan. Inot ongosungkod dino bai pongodumparan, ka dit ongosukod. Ino-no it atalahas, aso vaza vokon tanid-ko tumoguvang do mangaganti di gorija, ka bo. Ensan an i noumpug, minongoho di iadino kiroon. Topot ino dino okonko i kinapangan dit umpug diri. Gam varo iso sid tanga dioti di minomoros, ioku diti, nokosori sid Popot i toun it minomuka ioti do gorija di banalko apapag. Banal opihot om otiru it ongoorigi. Papan i pongorinding sampai taap do jing. Ong i dohon do kenginan, iadino i gorija vagu, ka dau. Na minamanal i vokon dit umba dino, rontob-nopo, ka dau, ong ioti sid Popot, keso varo-po himbaan sori do pongonovan do kazu. Kagi sid dioti, varo't ulun dit elo mamapan. Topot ong sid Kumbatang, navi-no laid i himbaan om iso nga aso sid di tokou elo mamapan, minsanko varo dara pongonovan do kazu dot olombon, ka dau. Varo-no minomoros dot, It noumpug i persembaan-za miuma dati do dumagang do papan sid sawmill. Lorry kadapat mangatod di babaal rontob sid simpangan di ralan sid Parapat. Bai it apagon, kuran mongoi dit ongokosukupan do valai antad sid Parapat, ka dau. Banal-no, i hiza diri gam nopongo no it alun-alun do porinta sampai sid Parapat om it ongokurita kadapat lumombus-po sampai sid Angkob. Na tanid-no o minansadang dot, Kananganko i gama mongoi dit ongobabaal om kosukupan do gorija vagu antad sid simpangan do Parapat, varo duvo vaza, ino-no i tokou miguli-guli manaan om monompuzung, ko mangagama-po laid dot osongou o ralan di miuma dot maza i lorry, iri-ogi i lorry mangakut di babaal sampai siti, ka dau. Alaid-po minuog-uog-no it umpug dino sadangan diri dot amu songkuro, mad enizo i ginavo dioti do banal-no ino, tu ka dioti, Ong maan-saan-tokou dit ongobabaal misoguli mongoi sid Parapat, iri-no ko iri. Kagi i ralan sid Parapat ohubang om apansung banal. Topot ong varo dara alun-alun, okonko bai oruhai pengrikot di babaal siti, inoi nga sera ong varo kosusaan, kiguna it alun-alun do mangatod dot ulun dit ahali sid Rumah sakit, ko bai i tuan om vokon, oruhai rumikot sid dahai, tu mamakai do kurita rumikot sid tanga tokou, ka dau. Na it umpug dioti diri okonko bai miniupakat do iadino, gam minongolumbatos ioti do kodung hari tiga, tumimpun tokou mamampang om manangkul di alun-alun pakaa siti di tokou, ka.

Sampai nopongo it upakat dino nga aso bongut ong ioku. Iri-ogi minamanal-oku dit upakat dino, gam minamalang-oku-no dot, Ong iadino, ioku nga mozo dikou mangagama. Ong apakai, monodia-oku-po dit ongodila do cangkul, supaya ipat ipat it ulun, varo pakakas di kiguna. Nemot-ku-no kagi laid dot siombo-nopo varo cangkul, i basi pupud-po dot amu atarom. Kodung nasalasai iadino, minitongkizad-okoi no om misamung vagu ontok di hari tiga sid simpangan do ralan laid sid Parapat. Iki dioti nosodia-no laid i tangkai do cangkul om ioku minongovit do 28 dila do cangkul.

Nakapasang-po it ongotangkai do cangkul, minangagazad i Oduzan om i Atajau do monodiri di vazaan di alun-alun kumaa sid Kumbatang om minananda ioti di kosongoho dot i vokon minozo om minongoluvas sampai minangarantai-no di tana dino. Ong varo okubong ko atakad, pinapalan-no it okubong om pinoritan ponong sid pansung. Amu-po nasadapan, minongitung-oku dot avantang ong pemot-ku dioti di kogunaan di nagama it adau diri. Minudan-oku sid Landrover sampai minozo-oku

di nagama it alun-alun. Mad avangaan dioti di kakali manangkul om mamampang ko mongukad do tuod, do songkuro nokosurut-no i nagama dot turu raintai, inono i nagama di bai sangadau.

Manjadi isuhut dit upakat laid, minitongkizad-okoi dot ino-no i boros, I hari tiga di minggu vagu, siti-no vagu o gama posurut dit alun-alun kumaa sid Kumbatang.

Na monikid hari tiga di minamung-okoi sid dioti, minangatod-oku dot a- ko piro papan om boruti rontob sid pompod di nasangkul-no it alun-alun dit adau dino. Antad sino oruhai ioti kadapat manaan dit a-ko piro babaal di muli ioti di minosodop. I harati, menurut-surut it alun-alun monikid minggu om mihiza minongogumu i babaal sid nataad do gorija. Ikiid pinanahan-ku om i dioti, nga nogunaani. Avi-no i vulan June, nokorikot i Landrover-ku sampai sid tana do gorija.

Iri-ogi kotoguvang-po i koturugan di gorija vagu. Minongovit-oku sid kurita-ku di kosukupan do pakakas, ino-no a-ko piro kapag, garagai, dunsul, boribud, katam sampai paku om sikurup.

Nosodia-no vagu it ongoulun do tumabang pengkakat dit ongoorigi.

Na i hiza diri koubasan dit ongotukang di poturug do valai, inukad-no laid di luvang bahagi dit tori-iso origi om pinonu i luvang do simen, supaya opihot it origi. Rontob- nopo, ong amu atahan banal i origi, kakali rumobuk, gima i vaig kadapat sumuvang sid luvang. Na netung-ku- no laid sampai minongimbulai-oku do tanid o vaaza, ino-no varo nosimen di napasagi-no di varo basi sid tanga di kiluvang, supaya posikurup dit origi sid basi dino. I harati, i vatu do simen, nitanom-no sid tana do bai ongoduvo insi sid soribau, iri-ogi itimpak-no it origi di nopihot-no sid basi dino. Ino vaza dino napakai-ku-no laid sid dundung di kurita sid Sikuati. Nokoponuhu-oku dit ulun di minangagama dino vatu dino sid Sikuati, o nokoponodia dot valu vatu di iadino bahagi di gorija sid Kumbatang. Manjadi kodung nosukung-no i konoruvo om kosongoho di panambayanan, varo mongukad di luvang dino vatu sampai pinapalan-no di vatu. Vokon minonodia dit origi sampai pengkakat om popihot sid basi dinot ongoorigi. Iadino kosurut di kobongunan do bai tolu i minggu, nopongo-no i gorija sampai minomuka-okoi di panambayanan vagu. Ino kinopomukaan dino, adau dot agazo sid piumpugan do Kumbatang. Iningutan it ongopiumpugan vokon do sumasi dit adau dino di mad ganavari. ??

I sumbangan dit iso gorija sid Stuttgart, di nakatahak-no sid dohon di kakal-oku i sid Germani, retan dioti, i nobi di siin di noumpug dioti bahagi di pangatagan di dioti do gorija sid Stuttgart, miuma do monobus di taap dot aragang, i retan dot taap Lundun. Ino taap simen-no i nagama. Kagi sid taap varo nitorindak i valai dot lusing di kadapat pendongou dit ongoulun di hiza do sumambayang. Sokovia i horogo do babaal, inanu-no sid persembaan di piumpugan Kumbatang. I-po longon dit ongoulun di minonurug di panambayanan, nga suka rela ko gotong royong miabal dit alun-alun di banalko kiguna sid tohudi't adau.

Na it tolu it ulun di minangagazad di kengkakatan do gorija jinumadi do mad tukang gorija, tu antad diri, a-ko piro it ongopiumpugan mindindamo dioti do mangagazad om monulung dioti do muvalai do gorija vagu isuhut di suntuan di gorija do Kumbatang. Ino-no i dioti do kohuntungan, i sokovia i ongopakakas niopung-ku-no, tu ino-no i kiroon-ku, ino papakas lobipo kiguna sid kampung mantadko sid dohon do palad.

Na varo kampung vokon di mongo-vongo di kogunaan do varo **alun-alun** di rumikot sid kampung do tomod mangatod ko mongoi do barang ko pangatod dot ulun di ahali sid rumah sakit. Ong i kampung **Merebau om Rampai** nokopiupakat laid do mangagama dot alun-alun, ino-no it ongoulun di dang SDA om Kristian om i-po sid binatang (sid Labus, ka dahai diri). Alaid-nopo nokotimpuun do mangagama di vazaan do kurita, do gotongroyong o gama. Kasalaan-nopo, tinumimpuun-no ioti sid Merebau, tu i kiniro dioti diri, tumimpuun sid somok om iri-ogi posurut di panahon do kurita ponong sid alun-alun do porinta sid Sikuati. I konoruvo diri, apat o vatu. I mula-mula, opompon it ongoulun dino duvo kampung tinumuhun do mangarantai om mongoluvang, ko mongukad di tuod do kazu. Dot amu songkuro, varo-nopo i toriso iso it ulun retanko amu otibang, ko varo sangkut ko varo sumakit, dot alaid-nopo, bai duvo ko tolu it ulun sino, di kakali minomongo ponoruvon di vazaan do kurita. Iri-ogi, nengkod-no banal, tu mad porosuma i sokovia i gama. I sakot om i govuton miniguli-no sumurut sampai ohubang-no vagu ino vazaan di nigama-no.

Iri-ogi i **panambayanan do Merebau** di bai pagong o pongorinding om panaap, norungoi dit ongokarabau sampai tihaba-no. Suvai iadino, varo upakat dit ongosukod do Kristian sid Merebau dot,

Ong sukul opongo dara i panahon do kurita iadko i sid Kumbatang, minsanko iokoi kadapat do pengkakat do gorija dit apapag om otiru, sampai i babaal om kosukupu bahagi di puvavalazan, oruhai pengrikot di lorry, ka dioti. I kiniro dioti, banalko apagon do bai guvas dot ulun saanon it ongobabaal antad sid enjin do papan sid Sikuati. Nolumbatos-no ioti tinumimpunon vagu ioti mongoluvus om mangarantai di vazaan do kurita. Topot ong biano, antad sid Sikuati o kinotimpunon. Atatap hari dua do monikid minggu ioti tinumuhun om minongonsug dit ongokoruhang di natatak diri do miguli vagu sid gotong royong, nga banalko alangkas kinapangan dit alun-alun di dang kampong sampai amu songkuro antad diri, nopongo-no i gorija sid isan dit alun-alun dino sampai nobuka-no. Gam oruhai o gama-ku monuduk di tudukan bahagi kopomoduan sampai nokokristian banal, ombo it ongoulun di nokenud do tinounan antad dit upakat dioti do sumuvang sambayang.

Na okonko bai i Merebau sinumuhut di suntuan do Kumbatang, inoi nga sid Barambangun, Masangkung om Kimihang varo gotong royong do momuka dot alun-alun di rumikot sid kampong om it ongopiumpungan do Kristian sinumusui do paganti di gorija di mad bai dundung do pagong o pongorinding do apapag om alanut o puvalazon. Inot ongogorija vagu, enizo kadapat do varo lunsing antad sid Singapura do tomod pendongou dit ongoulun supaya oruhai mihiza miumpug sumambayang.

It ongogagamaan sid ongokampong

Tanidko i koponulungan-ku do mangahatul di koturugan dit ongopanambayanan om it alun-alun, lopi-po ot ginavo-ku minoniim-oku do mangagazad dit ongopiumpungan di sid dohon do tinaud, supaya varo kosurutan sid kosipan om i kelaan om kohorotizan do Kitab sampai otongkop-nopo i tudukan do kopomoduan.. Kodung varo alun-alun, oruhai-no do sodop o kopisosomungon dot ulun sid ongokampong.

Varo-po hal di nokembulai dit okonko nakamung sid tugas-ku do missionari, ino-no: Kodung nokolombus-no it alun-alun do porinta antad sid Kuati sampai sid Kota Belud di toun 1961, dot ino alun-alun kadapat pakazon hiza dot aso darun, varo habal dot i porinta mongumba, gam pazazad dot, isai-nopo om ombo o kumpani engin do tana sid siring dit alun-alun miampaping do limo vatu, nga obuli mangaplai sampai manganu di tana di kenginan dau, ong sukul osukup i siin dau dumagang. Topot, ino tana dit osomok sid alun-alun dino, okonko kosong o tana, inoi nga tana dit a-ko piro it ongokampong, gam ombo it ongoulun di nokosuvang do Kristian alaid-no nokotimpunon momuka di dau om dau do tana, isuhut di kopibohogizan sid kampong. Tu ino tana kagi tinungkusan dit angaki. Tigogi, banalko rinumosi it ongoulun dot i dau do tana, onuvon dot ulun vokon ko kumpani. Ioti kondiri, iso nga aso di varo kosukupu do ringgit do mangaplai di tana dino om iponobus-po i tana. Kavi-avi ino tana dino, nga dang dit ongopiumpungan-za. Kuran-ka it ongoulun sid Lajong, Handal, Parapat, Angkob om Tinangol? ka di pongitungan-ku.

Manjadi kakali muog-uog-okoi-po do kumuro ino dino, varo ombuvoi di minapit sid dahai sid Sikuati, ino-no i Mr Willie, Kadazan iosido di sinuhu di Sharikat COOP antad sid Jesselton. I tinomod dau, mangaraun di daerah Kudat om mongonsug dit ongoulun do kampong do momuka do syarikat midagang, supaya oruhai it ulun do kampong kadagang do kosukupu sid kampong kondiri dot amu osusa do kumadai sid Kina di sid sodu om it amahal o barang. Tu ong oula i barang sid kampong, i kohuntungan nga iopungi sid kampong. Isai-nopo it ajadi dot ahli di syarikat, nga amaju sid syarikat, ka dit onsug di Sharikat COOP. Sid Lajong, varo-no laid i syarikat midagang, gam ino syarikat dino minonobus-po do gilingan do parai, ko i sid Barambangun nakadagang- no do sawmill om varo laisin di sharikat dioti do pongonuvan do kazu sid himbaan.

I minanarang-oku sid di Mr Willie it umba di porinta do mongojuval di tana sid siring dit alun-alun i kaka sid Kota Belud, varo kovosihan dau, ino-no, Varo-po hoturan do porinta bahagi dit ongosyarikat COOP di pengkaa dino. Ong ensanan i kampong mangaplai di tana dau do iadko tana syarikat dioti, amu osusa do pogilizon laid i horogo di tana, inoi nga suvai oula i nokobunan i tana dino di kitanom do nizu ko kolopioi ong nakatalib i hopod om limo toun, iri-ogi monobus om monukoi di tana, ka di hoturan dino. Kagi, ong apajak mangaplai do totonomon ko bibit do kolopioi, a- milo-milo i agricultural department manahak di bibit, gam mangahatul-po di kapananaman om kapamajaan.

Kodung nokening-ku ino undung-undang bahagi di syarikat dino, minangagazad-oku di Mr Willie sid ongokampong do tomod minsamung dit razat sino om manarang sid dioti di kogunaan do syarikat mutanom. Mad ensanan it ongoulun banalko otomon di nokening-no ino habal sampai miniupakat do pengkakat di syarikat dit ipat-ipat i kampong Lajong, Rampai, Merebau, Handal, Parapat, Angkob, Kumbatang om Barambangun om minangaplai sid agricultural department di bibit do kolopioi. Tu i hiza diri, amahal i vonod do kolopioi. Iri-ogi i Mr Durray minangahatul dit ongokoperasi komojuan kananganko i gama mangaplai do tana om iri-ogi i vaza mamarit om mongoluvang sampai mananom dit ongobibit do minirogop-no it ongoulun do kampong. Banalko avantangan- oku dot it oduruk o gama-ku popisamung di Willie om it ongokampong, nga minongimbulai do iadino kagazo o katagan om komojuan it ontok do mad nokohongkob-no it ongoulun, tu rumosi dot oporosuma i gama dioti mananom om momuka do kabun.

Siti omungan-ku-po dot i hiza diri banalko alangkas mimban-simban i hoturan do porinta British. Sabap ong i hiza di toun 1960 amu-po kavasa it ongoSabahan do mangarait di kapamarasan do Merdeka antawa i nunu- nopo pulitik. Topot i vulan August 1963 jinumadi i Sabah do pomogunan kondiri om minamung sid Malaysia. Iti-no o sabap do minsanko inot umba di British do pojuval di tana miampaping-paping dit alun alun om it putatanaman do kolopioi amu enizo jumadi.

Toun 1960, oduruk antad di kinulian-ku antad sid Germanyi, rinumikot i **Donald Stephens**, it ulion di **Kadazan Society** sid Sikuati. Ino Society dino retanko bai Rombongan do Kobudayaan, tu kakali amu kavasa do mimpulitik. Na minapit iosido sid dahai. I Abbah, i ponulung sid valai, o pengrikot dialo diri. I tinomod di Stephens, minsamung dit Ongorongus, gam popiumpug di Rungus sid station do Basel Mission sid Sikuati. Minanarang iosido dot it ongoMomogun sid Penampang om sid tanid o tempat sid Sabah, ong otopot, iseso o bansa om iseso ot inantadon om tinungkusan. Ino pamarasan di iadino, kakali amu kopionong di kovosihan do British. Topot ong sid Afrika a-ko piro koloni do British nobebas-no. I pomogunan dot India om Pakistan, nga nokengkakat-no, tu nakalabus-no sid hoturan do British. Ino- no i tinomod di Stephens, mongingud dit ongoRungus do mamung sid kumpulan dot agazo, ino-no it Ongokadazan sid Api-Api dit amu songkuro diri miumpug-no. Nopongo-no i kumpulan sid nataad di valai-za, iningutan-ku i Stephens sampai minamalang-oku sid dau dot iso kosusaan kananganko i ngaran di rombongan do Kadazan. Kangku diri, Ioku diti banalko rumosi dot ino ngaran Kadazan okonko popezo dit ongomomogun, gamko popitongkizad dit Ongomomogun. Imatai, ong it ongokoruhang sid Ranau dit nigazad di Aki Sundang minomili di ngaran do Pasok Momogun, ino-no it orijinal di bansa Momogun, okonko Kadazan. Kagi i-no ngaran Kadazan bai ngaran di nokembulai iadko kamamazan. It ongomolohing misingngaran dit anganak di sumikul sid ApiApi om modop sid kadai do Kina - gam tumabang-po di Kina sid kadai hiza do nopongo i sikul, supaya kadapat modop om milang makan sid Kina. Asot intoronon vokon dit osomok sid sikul dioti. Alaid-nopo it ongosukod sid kampong minomungaran dinot anganak Kakadazan, i harati, it anganak di mintoron sid ongokadai.. Na inot anganak dino okonko bai nokosikul, gam nokolombus sid university do varo dokutul om varo lawyer om vokon o kitugas sid porinta. Ioti mad minomili-no dino ngaran, tu mad nolingan i dau dot inantadan om tinungkusan om kobudayaan, kangku di Stephens. Na it inambat dau, ino hal dino, oviton-ku sid koumpugan sid Api-api, tu ong ioku kondiri, suvai osukod-no om mininsomok-no vagu sid bansa dit idi-ku. Notoliban i kumpulan dino, minonurat i Stephens sid dohon dot, Ontok di kumpulan- za sid Api-api, pinogili-oku sid umpug di sadangan-nu kananganko i ngaran di kumpulan-za sampai minanarang-oku dot it agazo o tomodon, ino-no i kesaan do Momogun. Minanarang-oku dot it ongoulun antad sid Kudat di nakamung biano dit insan-ogi, tantu momungaran di kondiri dau do Rungus, ino suku di bansa do Momogun. Na minidadahava-okoi ombo-ka it atag di ngaran-za. Topot kodung monginsosok-oku dit umpug dot, nunu-ka it apatut o ngaran tokou diti, turus miningkakat-no i ulion di kampong Barambangun antad Kudat dot opuhod o gizak dau do, Kadazan tokou, Kadazan tokou, ka dau. Kodung iadino ino dolou antad sid Rungus do Kudat, mad nopongo-no i piupakatan dahai diri. Orubat ino, nga kuozon-po. Amu otinganan-po do monimban di ngaran Kadazan, ka di surat dau. Banal-no ong i Lagan dino, amu noketung iosido di panangan di gizak dau. Iosido bai nokemot di kinogumuai dot ulun di niumpug sino. A-insan kemot do kumpulan do Momogun di iadino, tu ong sid Kudat, i British om it ongosama kakali pakaso om, mongusiba dit Ongorongus. Iso-no ot agazo sid ginavo di Lagan: I tokou tokou nga kiguna ong osinggazung ot uog om gama, ka di pongitungan dau.

Na duvo toun antad diri, i kinopimilian dit32 YB do masarakat do Sabah, hopod i dang UPKO i nopili-no, onom di Pasok Momogun, hopod do USNO om onom-po di dang Kina. Manjadi napangkat-no i Stephens do Chiefminster ko Menteri besar dot amu-po avi i duvo toun, nihaba-no iosido di Sama om Kina om ogontian di LO do Menteri Besar. Antad diri minurang-kurang-nopo i hak om kuasa do Momogun sid Sabah.

Kosurutan om ongoumba di Mission

Hiza do nokosuvang-no it ongoulun sid sambayang, pinengkakat ioti do bangunan do gorija di bai pagong o nagama, supaya varo tampat dioti miuumpug sumambayang. Topot antad di kengkakaan di panambayanan dot apapag sid Popot (1959), toriso- iso piumpugan tinumoguvang do paganti ino dundung laid dino dot otiru o panambayanan do papan ipongorinding om jing o panaap. I kogumuai it ongoulun di nakadaftar sid mission do nakamung-no, nokosuhut-no di palajaran do kopomoduan om i kosipan dot ulun Kristian sampai nopodsu-no. I asrama sid Batu Dua varo agazo ot intoronon di miума bahagi dot apat nopod ot anganak. Inot anganak sinumikul sid GPS, Lok Yuk ko sid St. James. I Haeusermann minongimvagu di valai laid do Mission sid Batu dua, sinaatan-no dit ongorinding om ginontian it onogondila di bai kazu-o ginama. Ino valai dino nokengkakat-no laid di Muksu do Kina Schuele antad sid Germany di toun 1905. Iosido diri minanagad dit ongobansalangan sid Batu Dua om varo ongokina di misisingilo sid dau di gama mamapan om mamasagi dino kazu di banalko okodou. Sabap i Schuele diri nga tukang kayu gulu di sinumikul do missionari sid Basel. Iti-no o sabap dot iosido nokelo do monuduk dit ongokina di kotukangan kayu. Na hiza di mononjipun, i rumpak dunia koduvo diri, i Jipun minamakai di valai dino do rumah sakit do sojal, gam varo dati a-ko piro Jipun di minatai sid valai dino. Notoliban-po i hiza dino, amu no katama it ongokina do sumoruvang sid valai dino. Suvai i toun 1950 i Basel Mission pengrikot di Muksu Bienz antad sid Swiss, tu notutup-no i mission sid pomogunan do Kina, supaya iosido tumabang di gorija do BCCM (i ngaran laid I Borneo -Basel Selfestablished Church) do manaud om monulung dit ongopiumpugan Kina sid daerah Kudat, sid Pitas om sid Kota Marudu.

Manjadi iokoi missionari (Haeusermann, Sigrist om ioku) miniuumpug-no monikid duvo vulan do tomod mongitung om miupakat di kosurutan di gama do Basel Mission. Na amu-po navi-no i toun 1962 vinalang-no di Haeusermann i dau do umba muli sid Mar 1964 dot amu koguli vagu iosido sid Sabah, ka dau. Na i Sigrist, di nokotimpuun momuka di Farm School sid Bavang Gazo om kikoruhang sino, ino-no i John Staehelin pinavalang dot i dau do janji muli, ino-no sid tanga di toun1965. Natalahas-no i iadino, ino-no o minonorou-okoi-no; kuran posurut i gama do mission, ong kouli ioti dino. Bai iso o vaza manalasai di kohigangan dino, osuhul ioku nga sumodia koduruk muli, supaya koguli vagu sid Sabah it amu-po kapamanau i Haeusermann muli...

Na it ontok diri, mogontizan i savo-ku Kathryn sampai varo pongitungan dot osuhul muli do mozo do tarabang gulu-ko i kosinaan dit anak mantadko mozo do terebang dot varo ragang-po, ka di ginavo-za sampai minuli i savo-ku om i tolu it anganak-za Michael, Martin om Traugott ontok di vulan February. Ioku kondiri ,mad amu-po kadapat mozo dioti, tu varo upakat laid sid BEM sid Lawas om sid British and Foreign Bible Society London do kopiumpug sid Lawas do tomod mokitalahas om monodiri dit ongodila di dang Momogun ponong di kosolinan di Kitab sid Ongomomogun. Ino Language and Bible Conference sid Lawas ontok di 20 Mar sampai 3 April om i Haeusermann om ioku minamung sid miting diri..

Sid saralom dit a-ko piro toun antad di toun 1956 varo-no laid **kopiupakatan di BEM** (Borneo Evangelical Mission) ponong minizo sid gama manalin do Kitab. Kondiri-oku nokosori sid Ranau sampai sinumamung di Mr Wellings sid Tuaran, i missionari Wellings sid Ongosugud om i Asang White sid Taginampur, Kota Belud. A-ko piro ulun do BEM di nosikul-no do linguistics, nga nakandaha-no sid dahai sampai nakaharati dot banalko ogumu pamarasan om vaza mumbongut, nga miabali sid “Dusun” do Ranau om Rungus sid Kudat. Bai i dohon dot avangaan, ioti minamakai kondiri di pongoretan Dusun, minsanko i harati di pongoretan dino, nga Ulun do himbaan.

Banal-no varo hal dit amu oruhai o simbanan, ino-no sid sokovia i it ongosurat dioti dino, solinan do Kitab ko tuturan vokon, aso’t iso hurup dot “o” iadko sid hopod, inoi nga varo tanda torindak di hurup “é “ (hépéd). Iokoi ong sorid Ranau magandaha, tantu-nopo a-kening do pitonidan ong Rungus mamalang do “hopod” ko i Dusun nga mumbongut di “hépéd” dioti. Kagi ong mangamalazu ioti, nga

varo “orang” ko “Oktober sid surat dioti dino.

Na i tinomod di **conference Kitab**, ino-no mogihim do pizaan dit ongopamarasan ko pongoretan di banalko agazo o harati iadko, love, peace, judgement, righteousness, om i iadino. Gam 150 ongopongoretan- no di dang English nokogili-no, supaya ioti om iokoi pogili di dau om dau o pongohorotizan om kopolinan. Na it ulion antad sid London o minongolintanga dahai diri, om iosido kagi minanahak dit a-ko piro tudukan kananganko i kosolinan do Kitab.

Nokorikot-okoi (i Diyun om i Majimil nokovoza dahai diri) sid Lawas do i tarabang do BEM minongoi dahai sid Jesselton, minamasa-okoi do kuran ioti minanalin dit ongopongoretan do Kitab. Varo-no do banalko ogolivong-okoi, tu mad osodu-no ino pongoretan sid “Dusun” mantadko i harati sid English. Kokiraai, i Holy Spirit nosolinan dioti do rusod do tolidang, om peace nga kopiuludan. Ong iokoi sid Kudat nokelo-no dot i pongoretan rusod o harati, i ngaran di rogon di nokezon sid valai dot ulun. Ikid ongkob di varo bangau, nga sino dino mintoron i rusod do tomod monusa dit ongoulun dino. Na i pongoretan olidang, ino-no i harati, ong manatas do parai ko vagas sampai aso-no nagavul-po iadko harami ko kulit, ino-no o harati olidang, iadko nohugus-no, aalus-no. Kuran-ka dino, i house devil, songkuro-nopo inosusi, kakali devil ino dino, ka di ginavo- za, gam minongirak-no i Diyun, tu ka dau, mad obungou- no ioti do mangarait di kotolu bahagi do Kinoringan do rogon dot araat di nosusi-no. Pengkaa dino, ino pongoretan kopiuludan, ino-no nanu sid gama pogili do kazu do podsudu dot enizo mili-gili it ongopudung do kazu, supaya arantang o kobuatano, enizo oulud mili-gili i kazu, aso’t iso otimpadang ko ounang it umpug dit ongopudung do kazu, ka di harati.

Na minonginsosok-okoi di dioti do kopongohorotizan dit inantadon di pongoretan dino. Sid panarangan dioti diri avalang-no dot i dioti dot ulun di tumabang manalin, anak vagu dit alaid mamasi sid station do mission, gima usan-usan iosido om aso varis di minanaud dau. Kuran-ka dot iosido ot inanu sid gama mogihim do pongoretan dit kopionong di boros do Kitab? Kananganko ino rusod do tolidang minanarang ioti dot, ong i dahai do kohorotizan, i rusod, ino-no mad ulun ko iadko i bahagi kotolu di Trinita di kadapat mizon sid ongoulun, iadko i Holy Spirit nokezon sid ulun dit osundu. Ong otopot, ioti sinumusui di sadangan di Rev. Moulton antad sid London, tu ka dau, ikid pongoretan dot English sid Kitab osusa do paraliu sid iso pongoretan sid kosolinan: kata dengan kata, ka dau.

Manjadi ioti, tu amu nokelo di boros dit ongoulun sid Ranau (Dusun), pinogili-no sid anak vagu Dayan di pongoretan sid BM sampai iosido minanahak di pongoretan di nikiro dau dot nokonong di sid BM. Kata dengan kata, ROH i mad kuasa do Kinoringan ozi mizon sid ulun, iadko i rusod di mizon sid valai dit ongoulun. Iri-ogi, Holy ko KUDUS mad miabal dot aalus ko olidang i vagas ko parai. Nokopiamung-no ino duvo pongoretan, iri-ogi varo “Rusod do tolidang”.

Manjadi ogumu it ongopongoretan vokon, nga iadino oluvau ko oribau ko aso tantu o harati, di napakai-no laid dioti sid kosolinan di Surat di Paulus sid Korintus om Efesus. Sabap ino, banal-nopo amu-za nokemot dot kopiizaan do pongoretan, tu ka dioti,. Varo-no nopongo laid it a-ko piro bahagi di Kitab Vagu. Ozi-okoi dot oduruk kopirin i Kitab Vagu.

Ong i dohon do sadangan ponong sid kopupusan di conference, Osuhul do mintoron manalin sid saralom do tolu toun tu rumalom-tokou-po laid sid boros Momogun om it ongosuku do Momogun, supaya atalahas-no dot nunu banal i puun do Momogun om kuran-n o it ongodila dit ongosuku di tinumohiang-no antad sid Pasok Momogun, gima mamakai do pongoretan dit inolos sid boros vokon Suvai osodia-no i dictionary om Hoturan do boros Momogun, iri-ogi oruhai manalin di Kitab vagu sid saralom do tanga toun, kangku diri. Topot i minanalin sid BEM, ino-no i minisavo Gollan minongolumbatos dot, Iokoi pempongo di kosolinan do Kitab Vagu sid saralom dot onom vulan. Iri-ogi opirin ino Kitab dino, ka. Ong iadino, i sokoviai it piniupakatan sid saralom do duvo minggu mad porosuma. Tu ong i dahai do tomodon manalin do Kitab, okonko it ipat- ipat i pongoretan karaliu sid boros vagu, inoi nga i harati di kapamarasan di mangatod di sokoviai i pongitungan om panangan dino. Tu ino-no it otopot, ipat-ipat i boros ko dila dit ongobansa, varo tasantanid tanid o vaza mamalang om monuriban ko manarang om manalahas dit onsi do harati. Ino-no kagi mad avangaan-ku diri, ino hiza diri i Bible Society do sompomogunan nokotimpuun di project do GOOD NEWS Bible i kosolinan di retanko i daianamic o kosolinan. Ino kosolinan vagu dino, miabal di dahai do vazaan manalin di Kitab.

Nokouli-po sid Kudat, mad nopongo-no kavi i dohon do gama diri, gam turus minogihim-oku do

kuran rumikot sid penerbangan sid Jesselton, sabap tigogi, aso-no tarabang antad sid Kudat om i kapal, amu kapanau do mingkosup di tarabang sid Api- api pakaa sid Singapura. Kagi it alun- alun sid Jesselton kakali notutup, tu nozuzu i tana di minomopol-no di ralan. Suvai varo minangatod dohon sampai sid tempat do nozuzu i ompulongon om minintana-oku do tanga watu, maan-saan di barang-ku. Sid sampaping dit nozuzu i tana dino sinamung-oku do jeep antad sid Kota Belud di minongoi dohon rontob sid baas di kumaa sid Jesselton, do bai miuma do mudan om tumulud i tarabang. I kinulian-ku sid valai, bai koturuan gulu di kinosinaan di Hans Joachim ontok dit adau ko 20 April 1963.

I kinalatangan sid Germany 15.4.1963 - 17.3.1964

Varo hoturan di Basel Mission bahagi i kalatangan ko suti dot sid saralom dit iso o pangkal dit apat toun sid Sabah, ino-no, koho i Basel Mission do lumatang dot apat minggu sid sodu iadko sid Hongkong ko sid Semenanjung dot i mission pomuhorogo. Topot iokoi songongkob minongitung dot aso guna ino, tu lopipo avantang do mogot-logot gumama sid valai mantadko koling dot ogumu o kosusaan ko kohigangan sid tanga do ralan misoguli sid Hongkong ko sid Cameron Highlands do tomod sumuti sino. Tu ka di ginavo-za, minsanko sangsangkil vaig nga osusa dumagang. Oruhai monorundakai dit anganak sid valai mantadko sid sodu om sid tempat dit amu oubasan. It ongopanahon kumaa sid Hongkong, aso tantu-tantu i panahon do kapal, vokon-no osusa minud do iso duvo minggu, iri-ogi tumulak i kapal, dot banalko apagon poriat dot intoronon sid rikoton. It ongokoruhang kavi minamakai dino hoturan, nga kodungko kouli antad sid Hongkong, varo korualan do tizan ko vokon o sakit sampai osusa ioti mokiubat.

Tanid-no ong i kalatangan sid Germany sid saralom do hopod vulan. Sino varo kotibangan do mongus-ongus sampai magandaha di kovorisan om papahabal-po sid ongopiumpugan di monukung di gama dahai sid Sabah. It anganak-za di nokosino sid Sabah, kadapat mongintutun di varis om it ongopinsan dau. I Michael, gam kadapat-po do kasut di tumabang dit orukung o hakod dot oruhai mamantau. Tu minsanko bai onom toun it umul dau, i hakod dau dit orukung, nga tolu insi onibak mantadko i hakod dit osihat.

Sid valai di molohing-ku, kadapat-oku monodiri di sokovia i it ongopongoretan om i vaza do momoros sampai sinumamung-oku-po do Professor do Linguistic bahagi dit ongoboros sid Asia Selatan, tu mogkovosihan dialo di kogunaan om vazaan om hoturan di boros Momogun. Minagandaha-oku-po do labaan do limo nopod piumpugan do tomod mongusul di kosurutan di Habal do Kovosihan sid Sabah om kuran i gama dahai mamakai di kotulungan dioti, iadko it ongoponombiran ko it lusing ko i panaap di gorija sid Kumbatang om i iadino. Kakal-okoi sino, sinumanung-okoi dit ongkob Dilger di sinumodia mamung dahai sid Sabah. Duvo adau gulu di kinotuludan dahai miguli sid Sabah, ioti Dilger minudan do kapal di kumaa sid Singapura om sampai sid Kudat. I harati, apat minggu antad di korikatan-za vagu sid Sabah, iri-ogi kotindal-no ioti Dilger sid Kudat, dot iokoi songongkob, nakarangkat-no laid sid Batu Dua Kudat.

I Basel Mission nokopongduat dohon do tumoguvang di tugas do mongontok di Basel Mission ponong sid porinta om ponong sid ongokoruhang dot ioku-no i mangahatul di mission sid Sabah om momialatan-ku-po ponong sid Basel.

I kotolu hiza-okoi sid Sabah

Suvai nokotuhun-okoi antad sid terebang ko 18 Mar 1964 sid Api-Api, nening-za dot aso tarabang kaka sid Kudat om i kapal pakaa sid Kudat, amu-po nokorikot antad sid Labuan om bai lumombus susuvab dino, gima oboloti i panau mapit-apit sid ongobandar. Minsanko nokobuking-okoi sid kapal dino, mad banalko aso guna do minud di kapanahan di kapal om mogihim-po dot odopon sid hotel sid Api-Api. Kakal minsosodop iri, minogihim-oku di baas antad sid Kudat sampai minindamo-oku di doribal do patod dahai sid Sikuati. Minsanko apajak-okoi ponumbang di tambang di baas, kakali omura ino mantadko duvo sodop sid hotel dit onom-okoi om i-po tambang di kapal. Kodung nakakun i doribal do baas, minudan om linumombus-okoi sampai nokorikot sid Sikuati do pukul 8.30 Sodop. I naas di sid station do Sikuati mad nokoling, tu otuvong it valai. Minogihim-oku do vazaan sumuvang sid valai dot agazo. Minongogiang-oku do rongobon, gam minongizau-oku di generator, supaya varo lampu om kadapat-okoi monodia dahai ponong sid sodop diri. Amu-po duvo jaham-okoi sino,

nosodia-no it ongoodopon om nokodop it anganak. I nunu- nopo it ongokosukupu sid valai nosodia laid antad di hiza di nokezon-okoi-no laid sino. Suvai tanga sodop nokouli-no i naas dot avangaan iosido do varo lampu sid station sampai nokuli-no i Forscher.

Susuvab-po minamanau-oku sid Kudat do pahabal di Haeusermann do nokouli-okoi sampai miniupakat dau do kuran i gama miovoli di tugas, tu i kinalazagan di dioti do kapal antad Kudat notontuan dot hari enam ko 26 Mar. Iri-ogi dinumagang-oku-po di kosukupu do kakanan sid kadai. Inatagan-no kavi sid valai, gam varo poginakanan- za, gima mongohormat dit ulang toun di Martin adau ko 21. Mar dot apat toun it umul dau. Minogom-okoi sid apatddi valai dot agazo sampai iningvinantangan-za i Bunga Bouganville di banalko noponu do vusak dit aragang-nopo.

Manjadi ikid pinanahon-ku kumaa sid Kudat sid saralom di minggu, minangakut-oku di dahai do barang, iadko ongobuuk om it ongobarang vokon. Iri-ogi sasarap di hari enam, sinumamung-oku vagu di Haeusermann om kinumavid di kungsi om i tugas dot ulion-ku do Basel Mission sid Kudat sampai minangatod di ongkob di Haeusermann sid kapal ontok do tanga hari. Suvai nokudan-po sid kapal hiza, i minongonsuhak-oku dioti, pinentahan-oku di Haeusermann dot i persembaan dit ongopiumpungan di iosido- no nakahatul-no, varo nakatahu sid almari sid upis dau.

Kouli-po sid Batu Dua om inimatan-ku sid almari, banalko avangaan-oku, tu sino dino varo a-ko piro tuung di noponu do siin do toriso iso, ko limo-limo, om hopod-hopod siin sampai nopusok-no inot ongotuung dino, om varo-po kinis do keratas di manarang dot ombo i siin bahagi ombo i piumpungan. Ino siin dino mad i persembaan do labaan sontoun. Tau-ma amu otibang iosido do monukal di siin om posimban sid akaun dit ongopiumpungan ko kuran?.

Iaditi nokotimpun-okoi sid Batu Dua manaan-saan di tinaud di kogumuai do piumpungan, i ponong sid Utara om sid Selatan sampai sid Sikuati, tu bai i piumpungan sid Vingolon, Rondonom om Tinangol kakali sid tinaud di Sigris, i minitoron sid Bavang Gazo.do tomod monimpun di Farmschool antad di kinulian dau antad sid Swiss, dot i John Staehelin o koruhang dau mangahatul di sikul sino. Sid Batu Dua varo-po i asrama dit apat nopod anganak do kusai, i gama monorundakai dit ongoulun di kinumuruhang dot ulun di kisakit sid Rumah Sakit ko mogihim-po sid dioti do vazaan muli sid kampong, ong aso ponumbang dioti.

Ino-no o kinavantangan do gama, minsanko i panau kumaa sid Kumbatang, oruhai, tu i landrover korikot sid gorija sino om antad sino bai songjaham mintana, om korikot-ogi sid Lodung om kadapat lumombus mintana sid Kodungkung om Pituru. Mad kavi-avi it ongopiumpungan, oruhai-no magandaha iadko Popot, Merebau, Barambangun, Masangkung, Kimihang ko Tiga Papan, Suangpai, Gumandang om Loro tu mamakai do kurita. Asarok ioti Michael, Martin om Traugott mozo, tu ozi banal do minsamung dit ongoulun sid ongopiumpungan..

Turus minongodim-oku dit ongoponulung sid Batu dua, tu monodiri om miupakat di tugas do mangagazad dit ongopiumpungan. Duvo minggu-okoi miniumpugi. I tinomod keso, monodia dit ongotuturan bahagi do sombulan sumambayang om miupakat dot isai-nopo kakaa sid ombo i piumpungan sid saralom di vulan vagu. I miniumpug diri, osomok do duvo- nopod- okoi di minongusul sid dohon di dau do gama om dau do ririkoton. Antad di nokoling-oku i toun, varo no nobuka i station Nangko, gam i Majimil Tuorong minomuka do kadai sinod olungan om minongoinjil-no sino ponong Marabhai om Kodungkung. Varo ponulung di minonuturan do varo ulun antad a-ko piro kampong vokon di minongodim-no do porikot sid dioti i Habal do Kovosihan. Minsanko i Haeusermann nokopomoros-no do varo a-ko piro Orang Tua Kampong di sinumamung- no dau sid Batu Dua di nakapamalang-no dot ozi ioti sumuhut dit Ugama Kristian. I boros dau dri, Nening-ku-no i kodim dioti, topot amu-oku kogoos do tumimpa dioti, ka dau.

Nohorotizan-za-po di tugas dahai vagu, miniumpakat-okoi do papanau dot onom tumpuk do toduvo-duvo ko tolu ponulung, tu mangaraun dit ongokampong di mad osodia bahagi di ponginjilan. It iso tumupak linumombus antad sid Nangko, i koduvo antad sid Tinangol, i vokon ponong sid Matunggung, varo-po tumupak ponong sid Pitas, sid Baving om sid Konibungan. I Osingko, Awasang om Osuman nokosori-no laid sid Pantai. Ino-no i tinomod di kinapanahan, mongining do siombo mad ogiang-no it ongoginavo om songkuro openting do tumimpun dot magandaha sino.

I Diyun om i koruhang nokuli-no antad sid Baving, nga minomoros dot ong sori, suvai varo ponulung dit atatap sino. Na i Diyun minangakun do rumangkat sid Baving om muvalai sino. I Osingko om Awasang nokuli antad sid Pantai, nga minangahabal-no dot it ulun do Pantai amu nokenud-no do varo

kolumbatasan antad sid pusat Kudat, gam minongogorot di Osuman do mintoron sid tanga dioti do tomod monuduk dioti di vaza Koristian. Ka dioti, Amu-okoi minud-po do sangadau dot ohoturan dit ongorogon. Engin -okoi dot i Tuhan Yesus o mangalabus dahai, ka.

A-ko piro minggu antad diri, minagandaha-okoi sid Pantai, nga nemot-ku it iso't ondu di kikinavid do buuk do Longoi, it antad di Osuman do tomod misingilo mamasa. It OT Basang rinumikot sid Kudat, tu nening-no dau antad sid di Osingko dot varo hoturan laid di porinta British di minoniag dot i Basel Mission tumupak. I tinomod di Basang, tumoronong sid Tuan DIO do tontuon dau dot aso gama vagu di porinta mangamu di Basel Mission do tumupak di Lubok Marudu.

I Ohigan nokuli-no antad sid Dandun om SuangEloi, gam kikoruhang iosido, ino-no i OT sino. Kondiri di OT minamalang-no sid dohon dot i dau do binatang ogiang-no bahagi di Habal do Kovosihan. Minsanko it ongotumpuk di nakapanau ponong sid selatan, nga iadino o habal do kuran-kuran, engin it ongoulun di monoruvang-okoi sid dioti.

Ino-no i harati di sokoviai it ongolaporan: A-milo-milo suvai monodia ontok di kumpulan vagu dit ongoponulung sid Batu Dua, ino-no: a-milo-milo mamananu-nopo it ongoponulung sid ongotampat vagu om kuran ioti kadapat monuluk di dau om dau do tugas. Kagi a-milo-milo, osusa-po do mongitung di vaza do posuvang dit ongoulun om kampong sid piumpugan dot ulun Kristian.

I hiza dot i Honegger pinosuvang dot ulun, minamakai iosido di pongoretan dot masuk sembahyang ko **sumuvang sambayang**. Pengkaa dino o gama dau; iosido kondiri minanarang sid ongoulun, vokon-no i bai songsirang, vokon-no ong ensanan i binatang ko sampapas do binatang do nunu o harati ong ulun maliu antad sid kuasa do rogon sid tundaan do Kinoringan, it Ama di Tuhan Yesus. Koho-po it ongoulun ko bai i OT apajak bahagi di songbinatang, iri-ogi i Honegger minta dua sampai minangatod di Kitab sid ipat-ipat it ongakob dit ongoulun om minta dua sino sampai pedu di bangau antad sid ongakob om monutud di bangau ko pada sid govuton. Antad di gama di iadino mad varo kohorotizan dit ulun dot i Honegger iadko i susuhun di Kristus kikuasa iosido miabal di bobolizan di pinoginit-no laid di Bangau sid ipat-ipat it ongakob. Mad ino bobolizan diri ogontizan di susuhun di Yesus, ka di ginavo dot ulun. Ino koponghorotizon dino a-milo-milo osusa monimban. Tu ong kodung maliu it ulun antad sid kuasa do rogon sid toudan di Yesus, suvai atag, dot kondiri i sanganu dit ongakob mongitung dot i kuasa laid do rogon nengkod-no, gam obebasno iosido sid sunsud di Tinaud di Yesus. Ong iadino, kondiri dit ulun pedu di Bangau sid ongakob om pada ko monutud sid lamas, okonko i ponulung om i missionari. (Ino Bangau dino, nga opodok o bakul di ginama do sogo, do varo vagas sid saralom, retanko intoronon di RUSOD, i rogon di mizon sid ongakob dot ulun Ino-no, it ulun dit engin sumuvang sid piumpugan, suvai kaharati dot nengkod-no i kuasa do rogon, gima i Kinoringan pinalabus dot ulun antad sid kuasa dino, sid gama dau kumavid om pedu di Bangau sid ongakob dau dot amu rumosi-po iosido dot i rogon koponusa dau. I ponulung om i missionari okonko miabal di bobolizan. Pengkaa dino amu atag do posuvang di Kitab ko gambal di Tuhan Yesus sid ongakob iadko it ongovinsil di nisisip- no laid di bobolizan sid rinding dot ongakob do tomod monunsub dit araat o kuasa. Sabap ino, ino-no i tugas dit ongoponulung om iokoi, kopihiza posurut di gama sid ongopiumpugan monginjil om sumikul ko misingilo di tugas do ponulung sid tanga di kosurutan di mission lumapai dit ongovolit di nahatul-no laid di porinta do bai sid vatas do Kudat o kavasa posurut di Habal do Kovosihan.

Missionari vagu

Kovian di April 1964, rinumikot i Dilger om i savo dau sampai sinumuvang sid station Sikuati Ino hiza diri nosodia-ku-no i palajaran do Boros Momogun, supaya ulun di nokelo di boros German kadapat misingilo di boros Momogun antad sid buuk dino om i kotulungan-po dot iso Rungus di tumabang mongimbulai di buuk dino. Ino buuk dino nokembulai-no antad sid Palajaran do Mamasa om i dohon do pongumpugan do kapamarasan do Momogun. Ino buuk dino minonulung di Dilger om i savo dau dot oruhai om alangkas misingilo do boros Momomogun sampai otulungan-no ioti dit ulun sid Popot di suvab-suvab nga tumabang di Dilger sid palajaran dino.

I hiza di kinorikatan dit **OT Basang antad sid Pantai** om i Osuman diri do minongogorot dohon do magandaha sid Pantai, minongudal okoi di Dilger dot alud, tu rumili sid pompod tana Bengkoka rumikot sid olungan do Pantai. Iri pamanahan diri nga mad pangalaman vagu dit a-opitiiman laid. Banal-no tanid ino kinalazagan mantadko bai tumupak antad sid Kudat ponong sid Dialog ko

Lodung. Keso amu agazo it motol. Koduvo, varo ododos i rahat ngaran tumupak di lubok Marudu. Nokorikot-po sid sampaping do tupak, tigogi banalko ovongo okoi tumimpan sid sodu di Nabalu mad tumorindak ko monguasa di sokovia i pomogunan o buatan. Ino burul dino, retanko it inintonon dit ongohatod dit ongominatai.

Abarou-po, nokorikot-no sid tingkabangon dit olungan do Pantai, nga agazo i bolintang dot a-kosuvang sid olungan, tu agazo it asak do vaig. Suvai osomok do tanga sodop om miuma-ogi sumulok sampai orikot sid pangkalan do Pantai. Na kakali-okoi kogoos do mintana-po do tanga batu om rumikot-ogi sid binatang do Pantai. Sino dino nga kakali oposik it ongoulun minsamung dahai iadko koubasan laid dit nokorikot-no laid diri. Duvo tadau-okoi sid Pantai do kumihabal om miduduat-duat om mitatarang-nopo di sokovia it ongohal dit osusa miupakat, ino-no i kinapangaan dahai diri. I Dilger minangakun do maliu sid Pantai tu momuka do station do mission. I kampong manahak di Basel Mission do tana miuma do puvalazan bahagi dialo Dilger om monodia dot ongoorigi bahagi di valai dau. Om minangakun do tumabang di Dilger muvalai. I Dilger nokosikul-no laid do tukang kayu nga osodia iosido do kondiri poturug di valai dau. It intoronon dit onkob Dilger nga sid rinantai dit asavat, supaya sid sunsud varo onkob bahagi sikul ko gumorija. Atalahas kagi do kodung sino i Dilger, a-milo-milo masti tumimpun-no iosido do posikuron dot ongoonulung bahagi sid vatas do Konibungan. Nopongonopo it upakat di iadino, minuli-okoi sid Kudat, I Dilger minongumba di puvalazan dau. I dahai do kiroon, mad amu onong do monuhu do tukang Kina do mangagama di station sid Pantai, inoi nga mamakai di keloo om i onsug dit ongoulun muvalai di mad suntuan do varo kengkakatan kondiri sampai i valai dino, okonko valai isuhut di kolonial buatan iadko i station sid Sikwati di koluu di valai di Tuan DIO sid Kudat. Tu i hiza diri atalahas-no laid dot ako piro toun vagu, okonko ulun antad sid Europe mizon sid valai dino, inoi nga kondiri it Ongorongus mizon sino dino.

A-ko piro panahon do motol pengrikot sid Pantai di kosupakan do valai, papan, suluw, timburulu, ponikagang om ongoboruti om apasagi-po, di nagama-no sid sharikat do Barambangun, tanid-po i panaap om it ongonalad di palampag. Na i tana di puvalazan, suvai natagad-no laid it onkokazu sino. Iri-ogi nohorotizan-za dot ino tana nga puru di dang rogon. Iti-no o sabap it onkokazu dino oponu dit ongoorkid di mako-sako sid ongoraan di kazu om pinovongi-no sid mintutuk it avau di banalko oomisi.

I tinimpun, minsanko ioku tumabang di Dilger sid gama muvalai dot a-ko piro tadau. Sasarap-po kosodia-no it ongoulun do mongoi dit ongobabaal om mananan dit ongoorigi do bansalangan. Ino iadino tinumabang do mad osinggazung-nopo i gama om kiroon om pongitungan-za om ino dino minongonsug dit ongoulun antad sid ongakampong vokon. Amu songkuro antad di kinarangkatan di Dilger sid Pantai, ogumu it ongakampung mintutuk do Pantai minongodim di Dilger, minanarang dot osodia ioti sumuvang do Kristian sampai a-milo-milo osusa dot i Dilger monimpun do sikul do ponulung. Gam i toun 1966 i Dilger minangahatul vagu do sikul do ponulung dot okonko bai bahagi dit ongoulun sid Tupak, inoi nga antad ensanan it ongopiumpungan opili-no i ponulung do sumikul do Kitab sid Pantai. Sid kursus dino i Osingko Taganau kinumuruhang di Dilger mangajal do sampai sid Mar 1967.

Nitarang-no laid dot i British porinta a-koho dot i Basel Mission, momuka dot ongosikul sid ongakampong. Na i porinta vagu di dang Sabah mad tanid o hoturan. Nokoho i porinta vagu dot i Basel Mission mangahatul di kopomukaan do tolu sikul di retanko **Native Voluntary School sid Lajong, Tinangol om Lodung**. Ino tolu tempat dino mad nakatanga dit a-ko piro ongakampong vokon, supaya it anganak dioti kogoos do sumikul sino. Nokopiupkat-okoi di Education Department dot ino tolu school sid tunda dit ongakampong. I Basel Mission pengkakat dit ongobangunan om i horogo do kapangatagan sampai pagaji do guru antad sid Europe, supaya iosido mangajaga om mongumbasih dit ongosikul om it onogoguru. Topot ong i porinta pagaji dit onogoguru.

September 1964 rinumikot i Immanuel Stettler, tu monodia dit ongosikul sampai jumadi dot ulion dino sikul dino. Minemot-okoi dot onogoguru antad i kisikul laid. Minsanko i Manjil Madalag, i nokogulu sid asrama, jinumadi do guru sid Lodung. Om varo-po Kina, i Chong That Shung, i kakali kitugas sid ongosikul i hiza di toun 1993. I boros do tudukan, ino-no English, tu amu koho i porinta do mamakai do Momogun sid saralom do duvo toun om iri-ogi lomombus sid English. Na i Stettler

minintoron sid Lajong, nga oruhai iosido sumori sid Tinangol mamakai do kurita. Topot ong sid Lodung, suvai mintana iosido antad sid Kumbatang. Iti-no o sabap it ongoulun do Kumbatang ponoruvon it alun-alun sampai sid Dialog. Antad sino bai sangjaham mintana korikot iosido sid sikul do Lodung.

Kopihiza di Stettler om i savo, varo-po sumuni, ino-no i Inai Ernst, supaya varo guru bahagi do sikul dit ongomomodsuni dit a-nokosikul laid. Ino sikul bahagi di tudukan do mangahatul dot ongakob -Domestic Science, inumba-no laid di Honegger dot i dau do kenginan, sinod Sikuati o pengkakat do puvalazon. Kagi, i kakal-okoi sumuti sid Germany i toun 1963, i komitee do Basel Mission minamanggih di Inai Ernst sampai minonuhu di Staehelin om i Nickel, i koduvo guru sid Farmschool do monodiri sid Sikuati dot avantang i tempat sino bahagi di sikul, ko amu. Sabap noboros-ku-no laid sid Basel dot i tana do Sikuati banalko araat sampai i tempat Sikuati amu atag bahagi di sikul dino, tu osodu antad sid ongokampong om osomok kagi sid tuhanom dit mongutatang dit ongosumuni, kangku diri. Ino boros-ku diri minanarang do nokotiim-oku do mananom sid tana do station. Nizu nga amu minonguva, mampalam, nga amu sumurut, nunu songtotodukon, nga pengkaa dino. Minsanko it a-ko piro kazu do kopi di lumohing i nga mad asot ula. Topot amu songkuro varo habal antad sid farmschool dot nemot-no ioti dot i ponulung i Inai Wasser nakapananom do balatung sampai ino balatung dino, banalko orombung. Rontob-nopo, aso boros dioti dot ino batas di balatung diri, nga sid pogun do kandang vogok. Tu i hiza do kursus, minonumad-okoi dit ongovogok antad sid topod do kursus. Suvai i muli- okoi do lumatang 1993, minonutud-oku dino kandang, om i ponulung nga minananom do balatung sid osorob om orombung i tana antad di tai do vogok. I savo-ku om ioku, mad nokerak-no di nening-za ino laporan di farmschool di nokorikot sid Basel dit mimbulai dot inot ongoguru do Bavang Gazo amu kentutun dit inantadon di korombungan do balatung. Suvai magavi-oku moniag do muvalai koduruk di bangunan di sikul dino om koho-ogi i komitee do minud-inud sampai nokorikot i Inai Ernst, supaya iosido kondiri kadapat miupakat dahai ong kodung nokopurimon iosido dot nunu banal o kogunaan om tomodon dino sikul dino. Iti-no o sabap, mogulu i Inai Ernst misisingilo do boros Momogun sid Batu dua. Iri-ogi minamung iosido sid di Dilger sid Pantai, to sori oruhai iosido tumanga do kampong om momurimon ombo i keso kavantang do monuduk dit ongosumuni. Ino hiza dino kenginan-ku dot i Dilger om ioku mad iseso o ginavo, kananganko ino sikul dino, supaya kiguna banal i sikul om i gama di Inai Ernst. Suvai a-ko piro vulan iosido sid Pantai om nourug-ogi i sikul Domestic Science sid somok di Rumah Sakit sid Tinangol, i tempat dot orombung o tana om avantang o vaig sid talaga om osomok kagi sid bavang om sid kampong.

Na i Erich Gugger om i savo dau dit amu alaid sinumuhut dioti Stettler, mogulu minintoron sid Sikuati, tu misisingilo do boros Momogun iadko i Dilger om i Inai Ernst. Iri-ogi tinumiim i Gugger tumupak sid Pitas do kumuruhang di Ohigan. I Ohigan varo alud dot opodok, nga tumimpun- no iosido mingalud, minamakai iosido do seagull. Topot ino seagull outboard, keso minamakai dot ogumu o minyak om iri- ogi asarok orungoi it enjin. Na it piumpugan-ku sid Bernhausen, inot inantadon-ku, minanahak do kosukupan do dumagang dot in-board Diesel di banalko omura mamananu om alanut kagi it enjin. Minsanko mingalud muli-mantad sid Pantai, bai duvo gallon diesel apakai. Iosido osodia do mangagazad di Gugger dot amu songkuro i Gugger rinumangkat sid SuangEloi dot it inintoronon do pongodumparan dioti bai valai di nataapan om norindingan-no do pagong. Antad sino kadapat iosido monoruvang dit ongokampong sampai momili do siombo ot atag pengkakat do station do Basel Mission om iamung-po do rumah sakit.

Ino pangajaran do boros Momogun antad sid boros do German di nigama- ku bahagi di Dilger diri, inimbulitan om inomungan-ku sampai nokobuuk banal ino pangajaran dino bahagi dit isai-no-po di minamung sid dahai antad sid Europe.

Amu songkuro diri, i hiza di minuli-no ioti Sigrist June 1965, varo-no vagu duvo pondita nakamung sid dahai, ino-no i Rusterholz om i Rennstich. I Rusterholz turus minintoron sid valai di Sigrist sid Bavang Gazo om i Rennstich sid Sikuati, gumanti di Gugger. Ino hiza nahatul-za dot ombo i mamung sid dahai, suvai onom vulan iosido misisingilo do Momogun, iri- ogi tumimpun do varo tugas dau ponong di gama manaud dot a-ko piro piumpugan.

Na, nokorikot-po ioti duvo dino di bai nopongo-no ioti di practical sid dioti do gorija sid Swiss om

Germani, nga minongingut-oku dioti do manarang sid dioti di keso o tugas dioti, ino-no misingilo Momomogun, kangku. Tu antad di pangalaman di Haeusermann om Sigrist di sampai penguli nga apaganan momomogun sampai oruhai maliu vagu sid bahasa Melayu, tu amu kopiharati dit ongoaralom o pongoretan, minongohodtol- okoi dot suvai elo-no om humarati-no momomogun om atag-ogi do tumoguvang do tugas banal. Manjadi hiza di minanahak-oku dioti di pangajaran do boros Momogun, mad kogolivong it ambat dioti. Boros dioti, Iokoi diti nopongo- nopo sokoviai it ongotudukan sid universiti om college sampai nakamung-no sid ongotudukan di monodia di gama sid pomogunan vokon. Kuran-ka do sumikul-okoi vagu? Gam varo-po boros sid pangajaran dot kodung onom vulan katalib, varo poriksaan sid boros Momogun? Ino-no i dahai do gama, Onom vulan antad diti adau, sumiti- okoi vagu do manampakai do goun iadko sid poriksaan sid universiti do tomod mokiporiksa, ka dioti.

Nening-ku-po i iadino, aso bongut-ku, bai i pongitangan-ku dot ino iadino mad bai koubasan dot omulok-po ot ulun di mongitung dot nokosukod- no banal. Ong otopot, sampai adau biano, amu nokorikot ioti sid dohon mokiporisa.

Minurut-surut it ongokampong di varo piumpugan di monikid Minggu sumambayang ko minindamo dot asarok varo magandaha. Topot kakali varo kampong di mula-mula, minamung-no sid kampong vokon, nga ozi do sid dioti varo kumpulan ong adau do Minggu, minsanko kakali aso-po gorija dioti. Na i kampong Loro t'agazo iadinoi. Osomok do Kristmas 1964 it Orang tua dioti nokorikot sid Batu Dua do minongogorot dohon do rumikot sid dioti do binatang. Kagi a-insan-oku nokosori sid binatang Loro. Iti-no o sabap do minongoho-oku sid dialo diri do magandaha sid dioti ontok di hari enam gulu do Kristmas ponong talib tanga hari. Minangakun i OT do minsamung dohon sid alun-alun sid Tiga Papan, ontok do varo opiit it olungan di maza sid binatang dau, tu ka di OT iosido kadapat gumau dot mingalud dot oruhai- okoi sumori sid binatang dau.

Manjadi, ka di ginavo-ku, ong iadino tu oruhai sumori'd kampong Loro, osuhul do povozoon-ku i duvo it anak-ku, tu a-insan nokotiim ioti do mozo dot alud dot opodok di bai sangbatang o kazu o ginama. Kasalaan- nopo, nokorikot-okoi-po sid pompod dit olungan dino, sino-no i OT nga minanarang iosido dot aso tanganan mingalud lumombus, to agazo it asak do vaig. Suvai mintana rumili do burul om korikot-ogi, ka dau. Iti-no sabap, minintana-okoi linumombus, dot ong i Martin, avantangan iosido do mintak-tindak ong varo gamut sid ralan. Bai i Michael ot apaganan banal mamanan, tu okugui i hakod dau di nanangan iosido do Polio di hiza dot opodok-po iosido. Osomok do sanjaham-okoi mamanan om korikot- ogi sid binatang. Ino binatang diri, mad noruhak-no i rinding sid tanga do valai om i taap-po mad amu aratop. Kagi it adau diri tinumongus i barat antad sid rahat ponong minsosodop sampai minsanko sid rinuvang do binatang, mad osogit o kopurimanan.

Nokorikot-po, amu songkuro sinumombol-no it a-ko piro ulun di nokouli- no antad sid tagad, nga atalahas dot inot ongoulun sino amu-po oubas do miumpug koduruk ko osodia ioti tantu do miamung do sumambayang. I kiroon diri, mad bai i Orang Tua ot gumorot do varo piumpugan sid dioti do mad mongohormat do Kristmas sid dau do valai. Ong engat do kuran it ongopiumpugan vokon sinumodia dit adau do Kristmas sid dioti do piumpugan, do kuran ioti porongod di gorija do karatas dot tasantanid- tanid o warna ko varo-po rilin om vusak ko papa do nizuw di mad tanda do pohigak dot ulun, gam it ongoulun nga varo ongosulung vagu, dot mad ensanan orongod-nopo it umpug. Topot sinod binatang do Loro tantu aso nunu di pongimbulai do katamanan ko kohigakan di iadino.

Odorong i vuros dit anganak dot nokinis i banat om soval ko it ongotapi nga nohigilan no dot asakau. Amu songkuro i Orang Tua minumbongut sampai minamalang sid umpug di tomodon do mongingut dohon rumikot sid dioti dino om minindamo dohon do mangagazad sumambayang. Manjadi sid situasi di iadino di banalko tanid mantadko sid ongopiumpugan di toun-toun minongohormat do Krismas, varo kopurimanan-ku dot ong otopot, iadino dati i hiza di kinosinaan di Yesus sid kandang do Bethlehem. I molohing dau a-kemot dot intoronon sid guakap ko hotel, inoi nga bai popul o kandang do sapi ko kaladai o kinosusutan i hiza do hiningoton i Mariam. Topot iti kagi it agazo o habal om banalko Habal do Kovosihan, sid tanga dot ongokosusaan om komisikiman di sino dino, nokosino it Anak do Kinoringan om nokembulai i kolobusan do riniba antad sid kuasa do rogon, tu i titiu do kanavahan do Kinoringan sinumondot sid tanga do kosusaan. Inot anak, i Kristus o minangatod do kovosihan om barakat do Kinoringan di monimban dit ongoginavo dot ulun om

ensanan i kopolisan do riniba. Ino boros-ku di minoniim manarang di tomodon do Kristian okonko iadko khotbah sid gorija, inoi nga minamakai di kobuatano sino iadko suntuan do panarangan. Nopongo-po, gam i Orang Tua minomuka di juli dau om manamahagi dit a-ko piro ongokinulat di nadagang dau sid Kina sid Batu Sepuluh, tu ino dino nga i dau do gama pongohormat dit umpug-za diri. Minsanko ino dino, nga tanda dot okonko it ongoulun sino, inoi nga kondiri di Orang Tua madulun dit varo kokurangan.

Na nokorikot i hiza do muli, supaya amu okosupan do sodop. I kiniro do Orang Tua do miuma i vaig sampai mingalud kadapat muli. Na i Martin om i Michael minogom sid alud ponong sid dulung, ioku sid tanga om i OT sid komudi ginumau do mangagazad dit alud sid tanga do katangaran. Dot amu songkuro atalahas do kakali amu miuma i vaig sampai sid sarazo dit olungan, minsanko i alud banalko oribau. Tantu aso vazaan vokon mantadko mintana maza sid banalko opiit om oribau it olungan. Na i OT pinasako di Martin sid dau do kazab om ioku nga minanaan di Michael do tasanglaang-laang-okoi linumombus dot toriso iso laang sampai sid otud kotolong i hakod sid rapak dot olungan. Tigogi, naratu-po i paramato-ku sid vaig, lobipo osusa, tu osusa-okupoo do pogom di Michael sid vakau sid siring, supaya kadapat mogihim di paramato. Kiroon-ku tanga-jaham-okoi mamanan sid rapak om korikot-ogi sid intoronon di kurita. Otopuan do rapak minuli-okoi-ogi do kipangalaman-za dit amu olingan vagu.

Asrama Kudat

I hiza di kobuka it ongosikul sid kampung, varo a-ko piro anganak do Asrama di sid Secondary Tiga sumodia do poriksaan. Ino hiza diri i kogumuo dit anganak sid asrama nga 56 anganak, kusai-nopo. Na inot anganak di Sec. Three minamalang dot banalko apagon ioti misingilo ponong sid poriksaan, tu kogangau om outatang sid ongekob dot asrama, gima it ongopopodok i murid di misimomoi-nopo. I kenginan dioti, varo tampat dioti dot amu outatangan-po. Iti-no o sabap, minindamo-okupoo di tukang di minonulung-no laid dot tasantanid-tanid o gama sid valai ko i vokon, iadko monimen dit ongoparit sid mintutuk do valai om i iadino. Iosido minangagazad dit agazo it anak do mangamung do turu ongekob sid sunsud di asrama supaya hopod om apat anganak varo intoronon dot ongekob do toduvo-duvo ioti varo tampat misingilo om odopon-po. Sid koponimbangan di valai, kondiri dit anganak misingilo do mamakai do garagadi om dunsul om sangkap ko monimin sid gama pagazo dit intoronon sid asrama.

I hiza di rinumangkat-okoi sid Batu Dua (1964), minongodim-okoi di **Amai Asagong om i savo dau Onjirim** antad sid Dahi, supaya ioti monulung dahai sid Batu dua. Iosido mangahatul di ropuhan dit asrama om i Onjirim monulung dahai sid valai iadko i gama laid di Abbah. Ong it anak dioti, di nokosikul-no laid sid sikul Kina sid Dualog, nga linumombus sumikul sid Lok Yuk Kananganko i asrama, ioku-nopo minonodia di kosukupan dot kakanan om i Asagong minangahatul di gama magazau om mamahagi dit kakanon dino. Ong i sarapan, koubasan do varo kinulat antad sid kadai, tanga hari om sodop, varo ginazau om taduk om sada, vokon-no tahata om vokon okorop o sada it antad sid Motinggis sid Pantai, i minongojuval sid dahai di sada 'osin. Kadang-kadang varo-po ulun di mongimpori antad sid Lajong di mongojuval do bakas ko tambang. Ino dino mad avantang o ponimban-nimban dit pangavau do kakanan sid asrama torinsan-insan. I hiza diri nengkod-no laid i hoturan do poriat it ongomolohing dit anganak do asrama do monodia do sagantang vagas ipat-ipat i minggu do mintoron it anak sid asrama. Ino dino inupakat laid diri. Kagi i Kindernohtilfe Duisburg (KNH), ino kumpulan sid Germani di mongindukut do balanja bahagi dit anganak sid sodu, nga nokotimpuun di toun 1961 do pokirim do 30 German Mark bahagi ikid anak om vulan bahagi di kosukupan dot kopolison, kakanan, kosulungan, ongo buuk sid sikul om i ponumbang di sikul.

I toun 1965, kodung otoliban-no i kamatan, atalahas-no dot minsanko it ongoulun sid kampung, nga asot ula, tu noruzahan-no it ongotagad dit alaid-laid aso darun antad di EL NINO.

Banalko monombitil it ongoulun sid kampung dit aso ponsohorian tanidko i dau do tagad om dau do kabun di kakali amu-po noula i nizuw. Tigogi, varo habal do varo kotulungan antad sid sodu, ino-no i Catholic Welfare Organisation sid USA minongirim dot iso kapal dit oponu do **Bulgar Wheat** bahagi dit ongoulun di monombitil. Ino gandum dino oruta kadapat magazau iadko vagas do parai. Na minongontok-oku dit ongokampung mokibahagi dino kotulungan. Kodung nokodompil i kapal sid

Kudat, varo ongolori di minangatod do 2000 karong gandum sid Batu Dua, tu patahu-no sid iso ot ongkob dit agazo. Ino-no it upakat di Welfare, iokoi kondiri mangahatul do mamahagi om mangatod di gandum sid ongokampong isuhut di apalai dit ongokampong.

Ino-no it avantang diri, nokodim-ku-no laid i Osingko do tumabang dohon sid gama momirin dit ongotudukan, vokon-no mongontok dohon mangatod dot ulun di sumakit ko mongoi do barang sid kadai. Manjadi dinomagang-oku do trailer do Landrover. Susab-suvab dot osopung-no tinumimpun i Osingko mangatod di gandum sid toriso- iso kampong dot iosido kondiri minongudan dot ikid panau do sampai 30 karong, vokon-no sampai osomok tanga sodop pengrikot sid ongovalai di gandom ponong sid utara, selatan om barat isuhut di register di manarang di kogumuo dot ongoulun sid ipat-ipat i kampong om tampat. Minsanko sid alud di mangatod do gandum sid Pantai o tinandan di Osingko i gandum, Ongopat minggu iadino o gama di Osingko om navi-no ino 2000 karung gandum.

Ponong di kengkakatan di Gorija Protestant sid Sabah

I kinodjodan do pomogunan Malaysia antad sid Malaya, Singapura, Sarawak om Sabah nga mad oruhai-no kosunu, sabap it a-ko piro ongopomogunan di nakalabus-no laid sid hoturan do British. Topot i Singapura, amu songkuro antad dirit 31.8.1993 linumabus-no vagu sid kumpulan dit Federasi Malaysia, tu varo kopigogutan dot isai i monoruntud di vokon. Ong sid Sabah, i Menteri Besar Donald Stephens, paranakan Momogun iosido, mad amu oruhai posurut di dau do visi bahagi Sabah. It umba dau di retanko KKK kayu-kaya-kaum dot i harati, i kazu do himbaan ino-o i kolunduo do pomogunan Sabah, nga ino dino tantu dang razat. Topot o Gabunjal Harun Mustapha om it ongokina di mokilulundu sid himbaan amu minangakun sid umba di iadino. Gam amu- po oponu i duvo toun di hoturan di Stephens, naratu-no iosido sampai i Kina Lo ginumanti dau do menteri besar. Ong kodung noponu i apat toun di Mustapha do gabinal, minokiundi iosido do menteri besar om tumimpun-no do monguasa dit ongoYB do sumuhut di dau do kenginan, gam minamakai-po dit ugama do Islam do posurut di dau do parti om kuasa.

Kodung **nokomerdeka i Sabah** (31.8.1963), alanta-no dot i hiza dit ongoulun antad sid Europa di kitugas sid porinta mad mavi-no. Varo boros dot bai hopod- po toun kadapat ioti gumaji sid porinta vagu. Ino dino minanalahas sid dahai dot atagi mongitug ko mongoduat do kuran-ma ong iokoi ongomissionari it antad sid sodu? Sabap keso, kavi-avi it ongotana di varo valai do gorija ko i valai sid Batu dua, om i sid Sikuati, nga dang Basel Mission. Pengkaa dino, amu dahai elaan do kodung varo kopigontian i porinta, kaluto a-koho i porinta sid tohudi do kakal-okoi kavasa mintonon om gumama sid Sabah. Kagi ino-no it tinomod di gama do Basel Mission do pengkakat do gorija di pasok Sabah dit ong alaid, elo-no do mangahatul di kondiri om mamalanja di kondiri sampai pazasad kondiri dit Injil sid Sabah. Antad di pongitugan di iadino, minongoduat-okoi di kondiri do sera om kuran ot atag do pengkakat di gorija pasok sid Sabah.

Otoliban i kamatan do 1965, minanarang-oku sid umpug dit ongosukod do piumpugan dot a-milo-milo tokou mogihim do vaza di kengkakatan do gorija pasok. Minsanko it ongokoruhang missionari mad ogolivong, retanko amu-po osukod it ongopiumpugan bahagi di kengkakatan, ka . Bai i Dilger minonukung dit umba-ku dino.

Topot it umpug dit ongosukod minomili dit a-ko piro ahli di tumabang dahai do monodia do perlembagaan do gorija pasok. Inot kumpulan dino minamakai di hopod ayat di Hoturan dot Ulun Kristian, di notontuan-no di toun 1958 do iadko origi dino perlembagaan om minamung di panarangan dit panangan dino gorija om i-po ongopiumpugan dot oruhai o koduzaani. Ino-no i tinomod di iadino, amu engin okoi diri do mongimvagas di kengkakatan om kosurutan do gorija vagu. Sid umpug vagu dit ongosukod ontok dit adau ko 20.Julai 1965, ino pongodumparan do perlembagaan nga nokopiupakat-no om varo-po nakamung dot a-ko piro hal sampai nokoho it umpug diri. Nokikirim-po sid Basel ino perlembagaan, nga i komitee do Basel minangakun-no sampai minongoho dot sid umpug vagu kosunu i kengkakatan di Gorija Protestant sid Sabah dit antad sid gama laid di Basel Mission sid Ongorongus sid Sabah.

Na ino pongoretan Protestant inanu-no antad sid di reformasi do gorija hiza dit abad 16. Ong solinan sid Momogun, ino protestant ko reformasi , ino-no harati, o gorija di potorongotog. tu potorongotog o harati, ong varo origi di tihaba, nga atag i gama dot ipotulid vagu it origi .supaya avantang- no vagu.

(Engin-oku-po dot omungon it iso pangalaman-za dit umpug diri ko 20.7.1965,. Ino-no, tanga hari nokosino-no sid Rumah Sakit it anak-za i Hanna Julia do bai sangjaham gulu di kotimpunaan dit umpug.Kousu-po, hinumago-oku muli sid Batu Dua tu momuka dit umpug di miupakat di kengkakatan do PCS. Iri-ogi i kengkakatan do PCS nga kopihiza dit adau di kinosinaan dit anak dahai Hans Joachim, ino-no ko 20.April).

Na i minongingut-oku vagu dit umpug dit ongosukod ontok ko 20. April 1966. Ino kumpulan dino jinumadi do Sinoda keso di pinengkakat di Protestant Church in Sabah. Miniumpug- okoi diri sid gorija do BCCM Kina, sabap ong sid Batu Dua aso-po panambayanan. Iadino- no i sinoda keso dino: Inumpug-no iadko koubasan sid ongkob pangakanan dit Asrama. Nabasa-no vagu i perlembagaan do gorija. Iri-ogi i gama manantu isuhut di koubasan sid umpug dot Rungus, ino-no, ipat-ipat it ahli di numpug minamalang sid dau do boros do koho iosido sid gorija dino. Kagi i Diyun minanarang insan-po dino di harati di ngaran sid Inggeris om nunu i harati sid Momogun. Iriogi inokunan.nopo dit umpug . Nopongo-no i iadino, iri-ogi minanantu-oku-no dot itit umpug tokou dino, nga Sinoda Keso di Gorija Protestant sid Sabah, kangku diri.

Ino vaza do mongoduat ipat-ipat it ulun di noumpug sino, supaya iosido mangakun om mongoho dit upakat, ino-no o tinomod: i hiza dit insan-ogi miniumpug dot a-ko piro ongoulion dit ongopiumpugan ontok di toun 1955, om minanalasai kananganko it umul do miuma manansavo om mokisavo ko kuran it avantang o gama minum do kinomol, ensanan-no it umpug diri do, Oho, ka diri. Topot sid tohudi atalahas dot inot Oho dot sokovia i mad aso harati om aso guna ko panangan.

Na varo-po hal dot agenda di sinoda keso, ino-no momili dit ulion, i sakai dau, i sekretari umum om i bendahari. Nogili-po ino hal do kopomilihan dit ongokitugas, ioku kakali kinumavid dit upakat. Na varo duaton antad sid tanga dit umpug do, Nunu-ka i gama dikou ongomissionari ong suvab ko i minggu vagu? Muli-kou-no ka sid pomogunan dikou, ong momili- okoi bianco dot ulion sid tanga tokou? Antava obuli ka do momili antad sid pialatan dikou? Ka diri. Manjadi obohinut-oku diri tinumimpa, gam sinumuli-oku-nobo mongoduat do kuran i pongitungan dit umpug kananganko ino kopomilian dino. Mad ensanan murung- burung sampai avalangan-no i timpa dot, Ong iokoi ozi dot ikou momongo di gama dikou sid tanga dahai, sabap iokoi diti kakali misingilo do tumanggung jawab jumadi do gorija om mangahatul di gorija sid Sabah. Suvai nening-ku-no inot ambat dino, minamalang- oku dot, iokoi engin kakali momongo di tugas dahai, gam ong engin-kou dot iokoi opili sid ongotugas do gorija PCS, apakai-no iti. Topot kakali atag dot i sokovia i harta do Basel Mission maliu sid PCS, supaya ino dino kavi, valai, tana om vokon asanganau dit Ongokristian Rungus. Iri-ogi minomongo-okoi, isuhut di kadapatan do momili di pekerja do gorija. Iti-no it kogunaan banal diti adau dot antad bianco, it Ongorongus mangahatul om sumaan di tanggung Jawab di Gorija di Kristus sid Sabah. Topot iokoi ongomissionaries bai ponulung-po di gorija, okon-noko mad ponuhu, kangku diri.

Iri-ogi kosunu i kopomilian dit ongokitugas. Ioku nopili-no dot ulion di PCS om i Diyun Madalag i kumoduvo-ku. Varo-po duvo missionary om apat-po ongosukod nopili-no do jumadi do komiti do gorija om i-po bendahari om i sekretari umum.

Sid gama sumambayang sid gorija do BCCM do mongohormat di kengkakatan di PCS, ogumu it ongo Kristian do Kina nakamung-no do sumasi dot insan-ogi do varo- po gorija di mad obpinai di BCCM. Nopongo-nopo ino, minongirim-oku di apalai sid Registrar do Societies do mindamo dot i PCS kingaran om kihak sid porinta do Sabah. Suvai kovian di toun 1967 om nokotorima ogi i PCS di kabanaran di porinta.

Ontok di vulan June, varo habal di banalko pinosusa di ginavo-ku, ino-no. Duvo-no vulan antad sid sinoda, ino-no adau do hari lima ponong sid minsosodop, tigogi varo borizu tinumongus do banalko ologod sid Batu Dua sampai it ongapapa do nizuw iseso ponong sid timul isuhut di borizu dino. A-insan-oku nokemot do iadino o barat om buatan. Bai ongohopod om limo minit i iadino, iri-ogi minengkod-no vagu i barat sampai ozom-no do iadko aso nunu-nunu. Susuvab do tanga hari, rinumikot-no i O.T. Madalag, tu minangahabal dohon dot it anak dau, i Diyun, i kumoduvo-ku, i nokuli-no vagu sid Baving do tomod mangahatul dit ongopiumpugan sid Bengkoka Utara, nga natanus-no sid borizu. Ino borizu nakavaza-no sid Bengkoka Utara do lobi-po ologod, hiza dot i Diyun om it ama om a-ko piro koruhang sid lubok monginsada. Mingalud-no ioti sinod lubok dino di

banalko oribau, minanandon ioti do rambat dot amu- ko osodu banal antad sid alud, do tigogi, tinumongus i borizu sampai kigumbang. Ioti kavi, kakali sid vaig. Topot tu rinumosi i Diyun dot otilib it alud, hinumago iosido ponong sid alud, gam tinumozog tazonko korikot sid alud om monunda dit alud sid tanga di borizu, mad nemot-no dit ongoruhang dau dot i gumbang dot agazo minongovit di Diyun sid sodu. Ioti kakali sid amu aralom i vaig, mad aso nunu-nunu. Kodung nozom-no vagu oruhai-no ioti minuli sid alud, tu sino-no sino it alud. Topot aso siombo-nopo i Diyun. Sampai asadapan minogihim sid katangaran, amu nemot. Siombo-nopo pinogihiman, a-nemot dioti i Diyun.

Ino habal dino banalko pinosusa di ginavo-ku, tu ong i Diyun diri mad ulun di banal-ko aharap oku dot iosido dara i gumanti dohon sid tugas dot ulion do gorija. Iosido diri ulun di banalko tanggung jawab om kaharati di tugas do manaud di piumpugan om kisuntuan iosido do magavi sumuhut dit ralan di Yesus.

Koduvo Sinoda di PCS August 1966 om i kosurutan do mission

I minongodim-oku dit ongoahli do sinoda, di notontuan-no laid sid ipat- ipat i piumpugan, isuhut di perlebagaan do PCS sid sinoda koduvo, pinopiontok-oku dino sinoda kopihiza di sinoda do BCCM di kopiumpug- no sid Kudat dit insan-ogi. I tomodon-ku diri, engin-oku dot ino duvo gorija antad sid tradisi do Basel Mission kopisamung om kopitutun sid saralom sumambayang sid gorija Kina. Banalko avangaan dit ongoobpinai Kina i nemot-no di kinogumuo dit Ongorongus di kisigal no do tinohian ko tinogob. Bai ino hiza diri o kinohorotizan dit ongoKina dot nunu-nopo i najadi-no sid somok dioti, dot i Habal do Kovosihan minongimbulai di gorija di mad obpinai dioti sid tanga dit ongoulun di nokiro-no laid do bai kuli do Kina sid ongakabun.

Rontob-nopo osusa do mongitung do kuran i kolombusan do gama-za. Sabap it anak-za Michael a-insan-no nokosikul tanid mantadko it idi dau minangajal, varo umba dahai do muli sid Germani August di toun 1967, a-milo-milo i Dilger atag do gumanti dohon dot ulion. Varo-po pandita do Swiss nokorikot om kinumuruhang-no di Dilger sid Pantai. Ong maliu i Bible School antad sid Pantai sid Batu Dua ontok di April 1967, ioti Dilger kadapat lumatang sid Germany dot a-ko piro vulan, supaya osodia ioti maliu sid Batu dua om monoruntud di PCS, hiza di muli-okoi. Iokoi sid Batu dua minomongo di Bible School, gam i Inai minonuduk dit a-ko piro murid di bahasa dot English, ombo-nopo it ozi sampai oruhai misingilo. Ensan-oko minomongo-oko mamasa om manalin dot a-ko piro bahagi do Kitab, iadko it ongotudukan di Yesus sid Matius om i surat di Paulus pakaa sid piumpugan do Rom. Kopihiza tosongumpug- umpug di murid minonuduk di kopomoduan sid a-ko piro piumpugan om ginumavul sid gama sumambayang adau-adau sid asrama om magandaha sid ongopiumpugan ontok do minggu.

Kodung kouli i Dilger antad sid Germany, minongodim-oku dit ongoahli do sinoda misamung sid sinoda kotolu do tomod polombus di tugas-ku sid di Dilger. Na i sinoda minamangkat di Dilger dot ulion do PCS. Ioku kondiri minonginsuhut di sinoda sampai sinumodia do muli adau ko 25 August 1967.

Ino hiza diri turu-okoi-no songongkob. Elaan-za dot i sikul di Michael sid Secondary tumimpun adau keso September 1967. Mad humago-okoi muli, nga mongitung-okoi dot osuhul mintarabang laid antad sid Kudat kumaa sid Jesselton om turus lumombus sid tarabang dot agazo sid Singapura om iri-ogi sid tarabang vokon antad sid Singapura, maza sid Bangkok , Bombai, Beirut, Rom om Frankfurt-ogi

Ii hiza diri kakali osusa dot it tarabang tumulud do bai tolu ko apat jaham. Iri-ogi tumuhun do manganu vagu do minyak om lumombus tumulud. Torinsan-insan tumulud om tumuhun, varo purimon do guvas om i tolingo dot tanid o kobuatano.

Manjadi, adau ko-25. August, pukul sembilan-ogi, atarang it adau di kotulud it opodok i tarabang ponong sid Api-api. I tarabang minaza sinod Batu Dua do kakali osibak om iri-ogi sid Dialog om Kumatang. Gam sid natad do Rumah Sakit do Tinangol, emot-za it ongoulun di mananda sid dahai do monginsuhut, dot tigogi, varo mituvong di banalko etom sid tinoguvangon. Na sinumiro-oku sid tempat di monuduk di kasavato di tarabang di mad jaham, nga nemot-ku dot i kasavato dahai bai sizam natus kaki. Topot nokotoguvang-okoi sid Gumantong di labaan do 1500 kaki asavat dot i dohon

do kiro, mad sino-no i kotuludan. Turus minomoros-oku sid pilot dot ong momongo tumulud do iadino, bai a-ko piro saat kodumpau tokou sid Gumantong. Insani i pilot minonimban di panau, gam turus miguli sid Kudat, tu ka dau, a-insan-oku nokotulud sid Kudat om ino mituvong dino om i darun di kosondot, amu elaan do kuran rumili.

Nokotuhun-no vagu sid padang Kudat, iri-ogi kadapat i Pilot mokihabal dot Api Api do kuran i kobuatano do pomogunan. Suvai pukul 11 om koho i Pilot do maza di dohon do tudukan tumulud do mozo dit alun-alun sampai sid tungkang om iri-ogi mozo di timbang do rahat sampai sid Kota Belud. Tu kuran-kuran pukul satu minsosodop, kotuludan di tarabang kumaa sid Singapura. Manjadi minozo-okoi dit alun-alun sid Sikuati sampai sid rahat om tinumompik ponong selatan do bai ongoatus om limo nopod kaki kasavat. Na nemot-za it gumbang om varo-po gonit om korud dot ologod dot amu engkod sid saralom do tanga jaham. Minuzu- guzu-nopo i tarabang mindak-tindak do mad momurimon dot otilib-po do barat. (Kiroon-ku, antad di pangalaman diri, it anak dahai i Hanna, sampai biano amu ozi mozo do tarabang) Suvai sid Kota Belud varo-no vagu adau iadko i sasarap sid Kudat om oruhai-ogi tinumuhun- okoi sid Api-api. Mad nogulian-no vagu tinumuhun- okoi antad sid tarabang om minangalapor do lumombus sid terebang dot agazo ponong sid Singapura. Na sid tanga ralan, ikid ontok do manganu i tarabang do minyak, a-koho i porinta dot it ongoulun mogom sid tarabang. I harati, kodung kotuhun i tarabang sid iso tempat, tumuhun it ongoulun om mapit sid valai penerbangan. Suvai osukup i minyak om okodim-ogi vagu mudan. Ino iadino keso sid Bangkok, iri-ogi sid Bombai, iri-ogi sid Beirut om Rom-po. Topot ong sid Rom, alaid-nopo minud-inud sid penerbangan do varo-no kodim do mudan, gam varo habal dot i tarabang a-kadapat lumombus, tu kikavut sid Frankfurt do sampai tanga hari. Na minud-inud-okoi sino do sampai limo jaham dot ohuzan om tiodopon it anganak-za. Iri-ogi okodim om minudan-no vagu sampai kotulud lumapai dit ongoburul dot Alps gam minaza sid dahai do kampong om linumombus sid Frankfurt. Insan-po dino minudan-okoi do tarabang di kumaa sid dahai do penerbangan Stuttgart, i banalko osomok sid valai-za.

Iadino ino kinulian dahai antad sid Sabah di sampai 40 jaham koledo sid tanga ralan, nga rinumikot-okoi sid valai di molohing-ku, ino valai di dohon do kinosinaan di apat nopod toun nakatalib. It ama-ku minintoron- no sid obpinai-ku. tu it idi-ku minatai-no laid vulan April 1967 i kakal okoi i sid Sabah.

Bahagi kotolu: I tugas-ku sid Germani

Nokouli-po sid valai di molohing-ku, ozongou-no i valai, tu minatai-no laid it idi-ku om it ama-ku, nga minaliu okoi mamung sid obpinai-ku Theo di kivalai sid sampaping do kampong-za. Na varo a-ko piro ongohal dit osusa manalasai koduruk. Keso, i posikuran di **Michael**. Kopihiza di kinulian-za, kotimpun-ogi do varo secondary school sid dahai do kampong Bernhausen, nga osusa-no do manarang sid ulion do sikul di pangalaman di Michael dot a-nokosikul laid, do kakali kenginan-za do lumombus sid sikul di monodia bahagi di universiti. Tu ong sid Germany, kodung apat-no toun kinosikuran, osodiri it anganak kopionong di keloo, ino-no varo retanko sikul kobasan, varo-po sikul menengah om varo-po sikul dot asavat. Suvai kadapat sid savat ong apaas do poriksaan. Na i Michael dit a-kosikul tantu, kakali otorima iosido do iadko poniiman, ka dit ulion do sikul. Amu songkuro om kaharati it ulion, i monuduk di boros English, dot i Michael lopi-po nokelo dot English mantadko i guru om ogumu it ongokeloo di Michael kananganko i kobuatano do songpomogunan om vokon, mad sinumogulu i Michael sid tanga dit ongomurid vokon. Bai sid boros German, varo-not a-ko piro hal dit amu-po arantang banal, ong monurat i Michael do laporan.

Ong i **Martin**, nga turus nokosuvang sid tingkatan koduvo. Rontob-nopo ogumu i minisingilo iosido sid idi dau, mad amu tumorima i dau do guru. Iti-no o sabap i Martin banalko amu ozi sumikul sampai mad soumul mongkob-hongkob suvab- suvab. Amu songkuro diri i banalko osusa i ginavo dau, minogihad-no iosido sampai minongoduat dohon dot, Ama, sera ka koulian di tokou? Ka dau, dot i harati, ingin iosido vagu muli sid Sabah, tu ong sid Sabah osinang iosido. Sori varo ogumu it ongokoruhang dau om aso guru di bai mamajal om momoros dot: Martin, iti amu nokonong, ka, inoi nga araat, ka di guru dau. Suvai nokotoguvang-oku-po di guru om minanarang sid dau dit inantadon

di Martin, iri-ogi varo katagan. Ong i Traugott om i Hans, turus sinumuvang sid kindergarden dot aso nunu-nunu dioti sino diri.

Na kogulu-po minoniim-oku **mangatag di valai** dit antad sid molohing-ku, tu alaid-laid amu-no nasaat it ongorinding sampai osusa do papasang sid ipat-ipat it ongekob do pogomutan bahagi mangalasu dit ongekob hiza dot osogit banal. Iri-ogi nokodim-oku-no sid Basel mamung sid kursus dit ongoulun di matang-latang antad sid gama sid ongopomogunan vokon do tomod pahabal dit ongopangalaman sid mission di siombo-nopo om mangalapor-po sid komitee do Basel Mission. Ino hiza diri koduvaan-oku minamung sid umpug dit ongoulun di nokosodia-no kumaa sid Sabah do mamung sid staff do Basel Mission do tumabang di PCS, ino-no ioti Rytz, Zimmer om Rieker. Kenginan di Basel Mission do polombus-oku sid dioti di dohon do pangalaman om minansadang-oku sid dioti dit atag o vaza tumabang dit ongokoruhang sid Sabah om i kogunaan do misingilo di boros do Momogun. Varo-po piupakatan dit Rev. Maier, i mangahatul di Basel Mission ponong sid Kudat, dot manaip-oku dot iso buuk di kopirin sid Basel bahagi di PCS, ino-no **I Tukuran di Tuhan Yesus**. I hiza diri kakali mamakai di pomirinan di retanko Offset di pengkaa dino: I master kakali ataip-po sid panaip dot osongou dot apagon manaip, tu otimpadang i master, supaya duvo nalad kopihiza manaip rumusod sid iso master diri. Kiroon-ku songvulan amu-po navi i gama-ku manaip dino buuk dino, ino buuk dino gulu-no kopirin banal do buuk bahagi di PCS.

Tanid mantad dino, i Basel Mission di varo-po upis sid Stuttgart, Germany minangahatul dot okonko bai minggu minggu, inoi nga asarok-oku magandaha sid ongopoiumpungan sid somok om sid sodu do pahabal sid dioti di kosurutan di PCS sid Sabah. I tomodon diri, mongonsug dit ongopiumpungan do mongohondom om monukung di gama di kazazadan di Habal do Kovisihan sid pentongkop do pomogunan. Vokon-no songminggu-oku sid iso daerah do mintutuk dit ongopiumpungan hiza do sodop om adau do minggu om asadapan-po rumikot sid ongosikul do poromot sid anganak di gama muhabal dit Injil sid ongobansa vokon, ko ong minsosodop-po sid kumpulan dit ongokaum ibu om i vokon o rombongan.

Varo-po kotibangan-ku do momongo monodiri dit harta di boros Momogun do monuluk di Kamus om i Hoturan do boros Momogun. Songminggu antad diri sinumamung oku vagu di Professor di **University Hamburg** di nokelo dit ongoboros sid Asia Selatan, do mogkovosihan dialo kananganko i boros Momogun.

Ino hiza diri varo katarangan-ku antad sid Porinta do Malaysia do kadapat-oku miguli vagu kumaraja sid Sabah .Kakali-okoi mongitung do kodung otoliban i sontoun, kumaa-oku vagu sid Sabah. Iti-no o sabap, kodung tinumoronong it ulion di gorija Protestant sid Wuerttemberg sid dohon sampai mongonsug dohon do maliu sid tugas do mangahatul di 350 piumpungan ontok sid gama poromot sid dioti di hal do Mission om Ekumene, tinumimpa-oku sid dau dot, ioku diti, kakali-oku kitugas sid Basel Mission ponong sid PCS sid Sabah, kangku diri.

Bai ino hiza diri o nokotimpuun i dahai do gorija mongitung dot i panangan di gorija okonko rontob sid pomogunan dau kondiri do tomod manaud di domba di nokosuvang-no laid sid kandang, inoi nga i pentongkop do pomogunan nga vatas di gorija sampai atag dot osinggazung it ongorija mintutuk do sompomogunan mikunsi om mitatabang posurut di kenginan di Tuhan Yesus, supaya pentongkop do sompomogunan sumasi dot iso-no o Tuhan om Minananggung. Iti-no o sabap minonodia i gorija-ku do kosukupan do pengkakat dot apat o pondita di rumikot sid ongopiumpungan dit apat daerah di gorija-za do pengilo dit ongopiumpungan di kogunaan om tomodon do Mission om Ekumene. Topot ong i dohon do ginavo kakali osodia ponong sid PCS.

Suvai nokotimpuun-no i Mustapha do monunsub dit ongomissionari om atarang-no dot osuhul sid dahai do pomogunan o gama-ku sid saralom di Basel Mission. Sabap i Basel Mission, varo-no laid hoturan dot mogihim di vaza poromot sid ongopiumpungan di suhu di Yesus do pazasad dit Injil sid pomogunan vokon. Kodung varo missionari kouli antad sid gama dau sid sodu, iri-ogi mirimpanau iosido sid dahai do pomogunan do pendongou dit ongoulun Kristian di tugas do mission om manarang sid ongopiumpungan do kuran i kosurutan di Habal do Kovosihan sid ongopomogunan vokon.

Kitugas sid Basel Mission dang Germani do magandaha dit ongopiumpungan

Kodung atalahas-no dot amu-oku koguli vagu sid Sabah, miniupakat-oku di Basel Mission do mongontok-oku dau sid daerah Stuttgart sampai popiumpug dit ongoulun di mongorukut bahagi di Basel Mission di balanja do Mission. Tu ino rukut diri nga balanja-za sid Sabah pengkakat di PCS om i sokoviai it ongoalat dino. Vokon o koruhang-ku sid gama di iadino, nga missionari laid gulu di Rumpak Dunia koduvo sid India ko Afrika, nga lumohing banal. Ioti minizon-nopo sid valai do Basel Mission. Sabap i hiza di gulu diri, varo-po ulun di potungkus di Basel Mission di valai dau, ong aso't anak dioti di kadapat monungkus. Iti-no o sabap, varo -ako piro valai di Basel Mission dot kodung kouli i missionari antad sid sodu, kadapat iosido mizon sid valai dino. Topot iokoi, nga varo valai kondiri antad sid molohing-ku. Iti-no o sabap, sinod valai-ku ot inintoronon om upis bahagi di tugas vagu. Minsan hiza dot varo piupakatan dot ino tugas-ku dino kavaliu sid gorija sampai ioku nga ogojian-no di gorija, minomongo-oku di valai-ku sampai varo-po koriatan do pogom di sekretari-ku sid isot ongkob di valai-ku. Iti-no o sabap dot amu osusa dot i gorija monodia do valai om tempat do sekretari.

Sampai avi i toun 1972 iadino o gama-ku sid ngaran di Basel Mission sampai ogumu o pangalaman sid ongopiumpugan do Germany Selatan-Barat mongonsug do monodia do sumbangan bahagi di PCS om i Basel Mission. Topot nokotimpuun-no laid it upakat dit ongogorija sid Selatan do Germani di Basel Mission om i vokon o Mission, supaya osinggazun o gama posurut di tomodon Mission om Ekumeni sid saralom do kumpulan vagu, ino- no i **EMS - Association of Churches and Mission in Southwest Germany**. Ino upakat dino, bai it ongopusat dit ongogorija om mission nokopiupakat, nga tigogi, amu-po navi-no i toun 1972 varo no surat di Basel Mission di pentahan sid dohon dot, Antad di Januari 1973 okon-no ko i Basel Mission mamalanja dikau di mad gaji, inoi nga nakamung-ko no sid gorija Wuerttemberg dot i gorija dino ot ulion-nu bianco, ka di surat. I harati, tigogi, i gorija do Wuerttemberg ot ulion-ku.

I tugas-ku sid Gorija Protestant sid Wuerttemberg 1973-1991

Ong otopot, i nakavaliu-oku sid tunda di gorija, aso masala, gam nokosurut it allowance om i gamaon-ku, iri-no ko iri. Bai i ngaran dit upis-ku nga nogontian. Ino- no i ngaran vagu, Service ponong sid Mission om Ekumene (DIMOE) om i vatas di gamaon-ku, nga varo-po kinomungan antad sid tugas laid sid Basel Mission. Kagi varo- po duvo, tolu koruhang-ku di tinumabang dohon sid gama sid ongosikul om it ongopiumpugan di daerah do Stuttgart. inot ongokoruhang dino, ulun di kipangalaman sid ongopomogunan vokon, iadko sid Mexico, Tanzania om India. Iti- no o sabap okonko bai antad sid Sabah kadapat poromut do habal do kosurutan do mission sid sompomogunan. Varo-po tugas di nakamung sid dohon, ino-no ulion-oku di sokoviai it duvo nopod ongoulun di kipangalaman sid pomogunan vokon di miabal o tugas sid apat daerah di dahai do gorija Wuerttemberg. Monikid vulan popiumpug- oku di rombongan-za do tomod mongitung om miupakat di dahai do tugas ponong sid ongopiumpugan siti om popuhabal-okoi di dahai do pangalaman antad sid pentongkop do pomogunan sid saralom di gama-za pazasad dit Injil om tumabang dit ongogorija. Na kenginan di gorija-ku do tumabang-oku-po di **Kindernothilfe KNH** do posurut di tomodon dau, supaya kiguna banal i koponukungan di KNH sid anganak om i razat dit anganak. Antad diri ingapat sontoun mamung-oku sid kunsil di miupakat di hoturan di KNH. Na i pusat do KNH sid **Duisburg**, nga ikid mamana-oku sino, suvai minsusuvab po mamana no om otoliban do tanga sodop om kouli-oku-ogi antad sid kumpulan sino. Sid saralom dit upakat dioti dino, kadapat-oku momoros dot omungan i kotulungan bahagi di asrama do PCS om monimban di hoturan do ikid tanak varo sumbangan monikid vulan, inoi nga koviai varo kotulungan sid asrama dot amu osodiri it anganak. Iti-no o sabap dot osinang i PCS mamakai di sumbangan dino bahagi ensanan it anganak di sid asrama.

Sinod umpug DIMOE dino, varo-po kasampatan dot tarapat-apat toun magandaha sid pomogunan vokon do minsamung do gorija dit amu-po nokelo, supaya varo pangalaman sid ongogorija vokon do tomod poromut sid ongopiumpugan i tasantanid-tanid o habal antad sid ongogorija do sompomogunan dit oririkot dit ulun Kristian sid Germani. Sid saralom di panau di iadino, minongumba-oku di toun **1974 do magandaha sid Sabah** do duvo minggu, iri-ogi lumombus-po sid Indonesia dot onom minngu om miguli vagu sid Sabah dot insan-po vagu duvo minggu gulu-ko muli

sid dahai.

Na i hiza diri varo hoturan di immigrasi do Malaysia do duvo minggu kosuvang sid Malaysia dot amu osusa do varo katarangan. Suvai kotuhun sid tarabang, manganu do katarangan do duvo minggu ong rumikot iadko ulun di mirimpanau - (tourist). Rontob-nopo, kodung korikot-oku sid Kota Kinabalu, ginazad-oku sid upis do Imigrasi. Sori minanarang i Kina, i nokotokin di Wong Lok Kiam dot varo suhu di Mustapha do monunsub dohon. A-koho iosido do sumuvang-oku sid Sabah, ka dau.. Ino-no rontob i dau do kovosihan di minanarang iosido hiza di tinumuhun-oku sid tukad dit upis dau, Ong oduruk-ko sid Kudat, ombo-nopo, ong sukul amu kazazad ino dino, ka dau. Iti-no o sabap, minozo-oku di Manjil, it ulion do PCS, i nakasamung dohon sid Kudat do sangadau-oku sid Kudat om linumombus-oku susuvab sid Sibuh do magandaha-po di Gorija Iban Methodist sampai mininud sino sampai varo tarabang ponong sid Pontianak, i sid Kalimantan Barat.

Nokorikot-po sid Singkawang, minintoron-oku sid valai di Lothar Nickel, i guru laid sid Farmschool Bavang Gazo. Labaan do duvo minggu minozo-vozo-oku di Nickel sid dau do gama monuduk dit ongoulun sid ongokampong di tanid o vaza mutanom do cash crop. Sabap inot ongokampong banalko osodu antad sid bandar di dumagang dara di hasil dit ulun mukabun, ino-no it apagon banal, kuran mangatod dit uva sid pasar ko kilang sid bandar. It oruhai mangatod, it uva dit agaam iadko cengkih ko it umau do sakot sabun. Ino-no i gama di Nickel diri pemot dit ongoulun do mananom do cengkih ko magazau di sakot sabun, supaya kembulai it umau do sabun dit banalko ovongi. Ong bai duvo, tolu tirapus umau sabun ko limo kilo o cengkih dot oruhai pengrikot sid pasal ko kumpani, miabal o kohuntungan iadko hopod karong nizu ko kolopioi.

Sid saralom di kumoruhang-oku di Nickel, tigogi, varo boros dau sid dohon dot, Bianco-ogi nakaharati-oku di tinomod-nu diri momoros dot aso tontok i gama sid Bavang Gazo. Antad tinumimpun-oko sid Bavang Gazo, minongonsug-ko dahai do mangagazad dit ongoulun dit otuo sid kampong. Tu ong monuduk dit ongosuni vagu mad aso guna. Sabap it ongoosukod amu mongining sid anganak, inoi nga monuhu dit anganak di gama isuhut di dioti dot elaan om koubasan. Bianco elaan-ku-no dot mad porosuma i gama-za diri sid Bavang Gazo, ka dau. Avantangan-ku tu sid tohudi minangakun iosido di dau do vaza mogoduw dohon diri, gima nokotiim-oku do manarang sid dioti sid Bavang Gazo dot ombo i vaza lobipo kiguna mantadko i dioti do gama posuntu sid anganak do kuran mananom di nunu-nopo. Sabap i dohon do kinohorotizan laid diri, ino-no amu osusa monuduk di Rungus do kuran mananom do nizuw, inoi nga it osusa, amahal banal it ongobibit. Sokovia i it ongorungus nokovozo- no laid gumaji sid Kina do mananom do nizuw dot ovokou o gama mananom, supaya it ongopapa amu mongorongoi di vusak di puun vokon. I hiza dot i Nickel kitugas sid Sabah, minangahatul-oku dot i Nickel varo a-ko piro vulan iosido sid Semenanjung do mozo do agricultural school, supaya kaharati iosido di vaza mutanom sid tropics. Nakamung-po iosido sid ongoguru sid Bavang Gazo, sinumuhut iosido di programme di koruhang dau dot amu minamakai di pangalaman sid Semenanjung. Minonuduk ioti mananom do nizuw iadko kolopioi. I tumimpun dara monguva i nizuw diri, topot amu mopud it uva, tu orungoi di papa di nizuw vokon.

Sid tohudi, nemot-ku-no sid Bavang Gazo dot i Ratu (Durian) di nakatanom sino, nitanom-no sid apansung i tana. Topot ong sid Semenanjung ko sid Kalimantan Timor, nemot-ku-no it ongoratu sid timbang do bavang, nga minit-ginit it ongouva sid ongoraan iadko mimbaris o sojal. Ong sid Bavang Gazo minoniim i Poong do pengrikot it ongopaip di mangatod do vaig sid ratu di sid apansung i tana, nga kakali amu miuma i vaig do pongopud dit ongouva. Iti-no o sabap, kodung kivusak i ratu, minasa-no it vusak sampai amu minonguva. Suvai sid Kalimantan Barat om kaharati-ogi i Nickel do kuran it atag o gama monulung dit ongoulun mukabun do poguluvon mangaraun om monodiri ombo it kokurangan om ombo it atag simbanan, iri-ogi kadapat miupakat do mitatabang posurut do katagan. Sid Jawa-oku-ogi sinumamung-oku di Olav Schuman sampai minamung sid upis do ongorija Indonesia do minokituturan-oku di dioti di dioti do pangalaman hiza di kakali kolonial om iri-ogi nokomerdeka i Indonesia. Nakasamung-oku-po do guru sid sikul teologia tinggi sid Jakarta, ino-no i koubasan-ku laid Pandita Walter Lempp, i minonuduk laid sid gorija Batak sid Sumatera.

Minapit-oku-po sid gorija Pasundan. Ino gorija dino mad pintangaan do Kristian dioti nga antad sid Silam, tu sid dioti ong kodung varo koginavaan dot solumpak vagu dit enizo ot ugama, nga i Kristian manarik di Silam sid piumpugan dot ulun Kristian. Antad diri nokosurut-no banal i gorija do Pasundan. Avantangan-oku di nemot-ku-no om nakasasi-oku dinot tanid o vaza mitabang i duvo

ugama dot okonko mioduw-nopo ko oporintaan di vokon.

Ong sid puru Bali, nemot-ku-no do kuran it ongokristian Bali pamung di kobudayaan dit ugama do Kaling sid dioti do puvalazon om i vaza sumambayang do mamakai do wayang kulit om sumundai om mongigol do tomod mongohormat om mongindazou do Kinoringan.

Sid Kalimantan Selatan minintoron-oku sid a-ko piro piumpugan do mozo-vozo di pandita sid dau do tugas do magandaha dit ongoulun do sumakit ko varo kabaktian di miovoli-voli sid ongovalai dot ulun.. Ino-no reaksi dit ongopandita diri, a-insan varo ombuvoi nokorikot sid dahai di kotiim masi sid tanga dahai om momurimon di dahai dot gama om kosusaan ko kapagasan di dahai do tugas.

Vokon-no, bai a-ko piro jaham motibang do memot do projek do varo sumbangan antad sid dioti.

Vokon-no nga mamakai di pangagambaran om mangagambar dit ongohal dot amu-dahai ohorotizan do nunu i tomodon do mangagambal. Ino-no i tuturan di pandita diri: varo nokorikot i pandita antad sid German, anak do missionari sid Kalimantan gulu di Rumpak koduvo di koguli-no vagu dot a-ko piro vulan hiza di nakatalib ino rumpak do Jipun. Manjadi it anak dau banalko gumorot dot ozi rumikot sid tempat di gorija di nagama-no dit ama dau.diri. Boros-ku sid dialo diri, ino gorija alaid-no aso. Iti-no i gorija vagu sid tanga do kampong, Na kakali ginartan dau do rumikot sid tempat di gorija laid diri. Topot sino dino banalko ohubang i govuton ong kodung navi-no dot anai i gorija laid diri, gima amu avantang i kazu di bongunan diri. Kagi osodu-no om sid timpak dot ompulongon i tempat dino gorija antad sid kampong Manjadi minangagambal iosido dino govuton dit aso nunu-nunu. Mad mongo-vongo-oku do nunu i tinomod dioti do manganu gambar di iadino, ka dau.

(Amu songkuro antad di kinulian-ku antad sid Indonesia varo't umpug dit ongopandita do daerah om inot anak di missionari pinemot do gambar om minangalapor di dau do kinapanahan sid Indonesia, ka dit panggil diri. Na minamung- oku sid kumpulan dino, tu mongining di dau dot tuturan di minagandaha iosido sid ongokampong di ioku nga nokorikoti. Nening-ku-po om nemot-ku-po ino laporan diri, iri-ogi kaharati-oku di kogulivangan di pandita sid Kal-Selatan, gima i minangagambal ialo do govuton diri. Sabap ino-no i tuturan dit anak dimissionari laid diri, Imatai dikou ino kohubungan. Siti-no o kinengkakatan di gorija di ginama dit ama-ku. Ong bianco, govuton-nopo, ka dau. Songlinsou nga aso gama dau mamalang dot i piumpugan sid kampong siri pinoturug vagu do gorija sid tanga do kampong ontok do norungoi i gorija dit ama dau dit nengkakat-no sid sodu. Kagi sabap it ama dau nokopomili-no dot ongokazu do goroton di anai-anai mangakan, novuvu-no i gorija laid diri dot aso no tinganan mangatag. Nopongo-nopo iosido monuturan om varo kasampatan do mongoduat, minonuturan-oku di boros di pandita Dayak di songvongo-vongo, tu it ombuvoi minangagambal di govuton rontob, okonko i gorija vagu i sid tanga di kampong dioti. Gam inomungan-ku-po dot iso masala vagu dit ama dau, ino-no: Hiza dot otoliban i rumpak sampai ulun German kadapat vagu mangaraun sid ongopomogunan, miniguli-no vagu ino missionari di lumohing-no sid Kalimantan. Sabap banal nokorongou iosido sid ongopiumpugan dahai iadko missionari randavi, varo isot ulun di kikilang di minongoduat dit missionari do nunu o kenginan dau povit sid Kalimantan, supaya oruhai o panau. Sabap okurang it ongoalun-alun sid Kalimantan Selatan, topot ogumu it ongobavang om olungan, vokon-no do hatas Kilometer kakali olungan di varo nasak, minindamo iosido dot motol. Kasalaan-nopo, ino motol dit inovit dau, suvai varo labaan dot turu kaki vaig om kalantung-ogi. Kagi ensanan do basi o ginama i motol dino. Na tanid di panambang pengrikot sid Banjarmasin di motol dino, ino missionari diri bai alambat-no kadapat mamakai di motol tu amu osukup karalom it olungan om bavang. sampai oduruk ogi minomurimon iosido dot amu kogoos-po do mintoron sid Kalimantan. Iti-no o sabap, pinotungkus iosido di motol dino sid Gorija Kalimantan, supaya varo sakaan dioti. Rontob-nopo, ino motol dino bai kosusa di gorija, tu asarok amu miuma i vaig, ko ong nakasarazo, tigogi, a-kouli, tu nasak-no i vaig dot a-ko piro minggu. Vokon-no sabap i kipas nokonong sid batu, okilong-no i shaft sampai osusa do patod sid tukang di motol dot amahal i kaganti ko i pangatag. Alaid-nopo natagaran-no ino motol sid olungan dot aso-no kogunaan-po.)

Minapit-oku-po sid sikul do kotukangan do kazu Mandomai. Sori nosomungan-ku-no i Fredi Hirt, i sampai toun bianco mad mangahatul ko pangantara do Mission 21 om i PCS. Iosido kakali mangazagad dot a-ko piro rombongan antad sid Europe do mangaraun di PCS om i GKPI sid Tarakan.

I ogi linumombus-oku-no sid **Tarakan** do magandaha di **Gereja Kalimantan Permantar Injil**, rinumikot-oku sid a-ko piro kampong om piumpugan sid sarazo dit agazo o bavang sampai sinumasi-oku sino di dioti o vaza polombus di Habal di Kristus sid ongoulun pasok sino, ino-no i Penan, inot ongoulun di kakali mizon sid himbaan dot aso valai om aso tantu ot intoronon. I gorija minongumpug dinot ulun sid iso kampong vagu i kingaran dot HARAPAN sampai minonodia do sikul om tana, supaya inot ongoulun dino kaharati do varo-po vaza vokon do mamasi. Songsodop di nakamung-oku sid piumpugan, minindamo ioti do pahabal-oku dioti di dohon do tugas om pangalaman. Na minonuturan-oku do kuran-oku minisingilo di boros do Rungus. Mad mirak-irak-no ioti di nening it ongopongoretan do Rungus, tu, ka dioti, ino dino banalko osomok sid dahai do boros. Ong i Bahasa Indonesia bai bahasa do kabang om surat. Topot varo-po boros do ginavo dahai, ino-no ino boros di osomok di boros do Rungus, ka dioti. Sori nemot-ku-no dot vokon o ponsohorian dot ulun. Bai varo limo ko onom kazu cengkih, mad miuma do koposizon-ku, kagi oruhai-no pengrikot di hasil sid kadai sid Tarakan, ka dau. Ong i minamanau-okoi sid bavang dino sid alud di kioutboard, sinod timbang do vaig hinotusan do ratu di kiuva di miniginit sid ongoraan di nokosurut dot otimpadang antad sid puun. Banalko avangaan-ku di nemot-ku di iadino. Na ka di sarang, ong mansak-no i ratu, ponuon-ku it alud-ku do ratu sampai mangatod di ratu sid Tawau om Lahad Datu, tu agazo o horogo ong sori. Ong sid dahai sid Indonesia, omura banal i horogo do ratu. Iadino tinobus-ku i sawmill sid Tawau om sid sawmill dino, mamapan-okoi di kosukupan do pengkakat dit ongorija sid dahai do daerah, ka dau.

Minsanko bai hopod adau-oku sorid vatas do Tarakan om sid sarazo di bavang sino, banalko ogumu o pangalaman di adapat mongovit muli sid Germani om i gama-ku monuturan sid ongopiumpugan dahai do kuran i koposizon om kososizan dit ongoulun sid Indonesia.

Na it umbaku laid diri, antad sid Tarakan rumili sid Tawau om miguli vagu sid Kudat dot duvo-po minggu dara sid tanga do PCS. Topot, sabap nosunsub-no laid sid KK, mad aso tinganan do tumiim-po vagu sumuvang sid Sabah. Iti-no o sabap minogihim-oku dot panahon muli sid Singapura. Na i jadual do tarabang dara, antad Tarakan kumaa sid Balikpapan om iri-ogi sid Jakarta om lumombus-po sid Singapura. Na kakali minud-inud-oku sid Balikpapan do sera varo tarabang sid Jakarta, tigogi, varo't ulun di pinentahan sid dohon do varo tarabang di kumpani minyak di kumaa sid Singapura. Bai hatas US-Dollar ponumpang do cash. Amu-po sangjaham-oku sino, minogom-oku vagu sid tarabang di maza sid tanga do Kalimantan. Gam ponong sid Singkawang, nemot-ku-no it ongoralan om it ongokampong di norikot-ku-no laid di kinumoruhang-oku di Nickel, sampai oduruk-oku sid Singapura om motibang do mapit sid Trinita minsamung dioti Matius, Kololong om Inggol di sinumikul sino dino.

Nokouli-po sid Germani, sumodia-oku do magandaha dit labaan do tolu natus piumpugan sid dohon do daerah, tu poromot sid dioti di kavazao om kopudan dit ongoulun Kristian sid Indonesia di mad obpinai dit ongokristian sid Germani. Sabap iti-no it hal diti a-milo-milo kaharati it ongoulun Kristian sid dahai, i Gorija di Kristus nga pentongkop sampai siombo-nopo varo Kristian di nunu-nopo sangbansa, ioti kavi nga obpinai dahai om anganak tokou do Kinoringan.

Na i pandita om i savo dau antad sid **piumpugan do Korntal**, i minozo dohon do tomod kumoruhang dohon magandaha sid PCS, i hiza di nokorikot-okoi sid KK, aso nunu-nunu, obuli ioti do mamanao om magandaha di PCS sid saralom do duvo minggu. Antad diri minangahatul ino pandita Wittmann dot varo kopiobpinezan di dau do piumpugan om i PCS. Sampai biano, toun-toun varo sumbangan di piumpugan bahagi di PLA di PCS. Ong kodung varo ulun do PCS di rumikot sid Europe, asarok kadapat mapit-po sid piumpugan do Korntal.

Varo-po hasil vokon di kinapanahan-ku sid Indonesia, sid KNH kadapat-oku mongonsug do varo-po kotulungan-ku bahagi dit tolu asrama sid Singkawang, sid Bali om sid Tarakan. Otoliban-po do hopod toun, kakali varo habal antad sid Singkawang di minonorima kaseh sid dohon, gima, minongogiang-oku dino kotulungan di KNH.

Na sid saralom di gama-ku sid tanga dit ongopiumpugan, nakaharati-oku-no dot banalko okurang i keloo dit ongoulun Kristian it ongosituasi sid ongopomogunan. Mad monongkudau-nopo ioti, tu i tudukan sid gorija bai ponong di kosurutan di kosipan, nga amu engat it ongokosusaan dit ongoulun Kristian sid ongopomogunan vokon. I hiza diri varo duvo pomogunan di banalko agazo o kosusaan.

Sid Afrika Selatan it ongoulun do Belanda, di minonoruvang di pomogunan dino it abad 17, mad minanansanganu di sokovia i pomoguan sampai minonguripon-nopo dit ulun pasok sino dino, inot ongoulun dit etom etom o kulit. Ogumu o kosusaan sori. I kogumuo dit ulun etom mad inghopod dit Buur antad sid Belanda, kakali aso hak it ulun dot Etom. Nemot-po dit ulun Etom do varo ongopomogunan vokon sid Afrika nakalabus sid kuasa do kolonial, tinumiim-no ioti di mingkakat om lumabus sid kinuripanan dino. Ong ogumu it ulun Kristian sid Germani kakali minonukung dit ongoulun BUUR, tu ka dioti, ino pomogunan dot Afrika Selatan, nga tinahakan-no do Kinoringan di dioti do pomogunan, gam varo boros dioti dot ino pomogunan dino, antad di kovosihan do Kinoringan bahagi dioti. Kagi, tu varo boros sid Kitab dot i Ham, it opinai di Sem om Yafet nga uripon dioti, inanu dioti ino boros do Kitab iadko katarangan di kuasa dau. Nohorotizan-ku po i iadino, ogumu it ongotudukan sid ongopiumpungan minongohodtol di kobuatano sino om minononsug-no do tumabang dit ongoulun Kristian dit etom sid South Africa, minsanko amu dumagang-po di barang antad sori di polundu-po dit Buur dino. Supaya kogoos-oku do manarang dinot ongohal dino, a-milo-milo sinumaralom-oku-po sid usuran di pomogunan do Afrika, supaya kelo di sokovia i nongojadi sid Afrika, antad di gama mongoi sid Afrika do sampai 80 juta ulun dit etom do pojuval ioti sid inuripanan sid Amerika i hiza dit abad 16 sampai 19 om kuran it ongokolonial kuasa antad sid Europa minonoruvang om minanansanganu dit ongopomogunan sid Afrika om Asia. (Iadino i pomogunan do Sabah nitobus-no di kumpani antad sid England do bai 35,000 Doolar o bulavan sid toun 1880)

Tanid-no ong sid Amerika Selatan om Tanga. Tu ino pomogunan dino, ong kodung nokelo it ongoraja do Spaniol om Portugal do varo-po pomogunan di ponong sid Barat sid sampaping dot Atlantik, rinibuvan it ongoulun minonoruvang om minomuka do kabun sampai minamakai dit ulun pasok iadko uripon . Kagi i hiza dot i Kolombus nakalazag-no sid Barat om nokemumui sid pomogunan sino, minonuhu i Pope di raja do Spaniol om Portugal do manansanganu dinot ongopomogunan om patanom sori di kosipan do Kristian. Topot it ongoulun di minonoruvang, minomogos om minamatai di kogumuo dit ulun pasok sampai minomorinta dino pomogunan dot araat o vaza. Minsanko i nakalabus-no inot ongopomogunan antad sid hoturan do Spaniol om Portugal it abad 19, kakali varot agazo o pitonidan dit ulun pasok om i-po ongouripon dit etom antad Afrika om inot orang puteh antad sid Spaniol om Portugal. Sabap minsanko bai hopod peratus ioti, kakali manansanganu ioti di tana om i kuasa om mamakai dit 90 peratus di razat do bai kuli ko uripon. Na ensanan it ongoulun sino, nakamung sid Goriya Katholik antad di hoturan do Pope, nga nosiliu it okudik do lumundu banal ioti om i vokon, musikim banal dot bai ngaran-po-ko apasi.

Na sid saralom do goriya Katholik varo a-ko piro pandita om Bishop di kentutun di kobuatan di iadino ontok di tinumimpun it ongokristian katholik mamasa di Kitab. Sabab sid Kitab, sid boros di Yesus ko di Yesaiah varo boros dot i Kinoringan palabus dit ongoulun antad sid kinuripanan. Kinoringan pakan dit ulun dit ovitil om pahaba dit ongolumundu. Alaid-nopo mad mibuburung-burung it ongopiumpungan sino do mogihim do kolobusan antad sid kinosusaan di iadino. Iri-ogi minongimbulai do tudukan om teologia di kolobusan ko teologia di kemerdekaan sid tanga do goriya Katholik. Ino-no it onsi di tudukan dino, Kinoringan o minongurug di songpomogunan om minonodia di kosukupan bahagi di sokovia i ongoulun. Sabap it ongoulun nga anak do Kinoringan, aso bida om aso pitonidan dot ulun dit etom ko opurak. Enizo ioti masi sid saralom di kovosihan do Kinoringan. Ong varo hal dit amu onong, iri-ogi varo kenginan do Kinoringan dot kondiri dit ulun mangatag ino dino. Iadino i longoi di Mariam, it idi di Yesus om iadino it ongokhotbah dit ongonabi Amos, Mikha ko Yesaia. Ino teologia dino kinumambang om pinotomon dit ongoulun dit osibak om it pinokihi dit ulun di paranakan do Spaniol om Portugal om i vokon antad sid Europe. Minsanko ogumu German nakarangkat-no sid Amerika Selatan i hiza di rumpak sampai ioti, nga nakamaju-no sino.

Na sid dahai do goriya varo kagi organisasi di minonukung dinot ongoulun Kristian antad sid Germani, tu ioti nga Protestant, nga kakali monoruntud dit ulun pasok. Iti- no o sabap avantang o gama-ku monuduk-po dit ongopiumpungan-za dot ombo it atag sumuhut di Kitab kananganko i pialatan di lumundu om musikim, nga amu oruhai ino, tu mad kakali i kiroon dot ulun Kristian sid dahai dot lobipo osomok it ulun di mad varis ko iseso o bansa mantadko it ulun dit etom ko tanid o dila om boros. Mad apagon humarati dot i Raha di Tuhan Yesus lobipo popensomok dit ulun Kristian mantadko i raha di dau do varis om bansa. Gam varo ulun di pavalang dino kabanaran, i minomoros

iosido dot, Mad i dikou do raha alanut-po mantadko i raha di Yesus di mamalud di tokou sid kangkab do Kiningan, ka.

Na i toun 1975 varo agazo o kumpulan sid Nairobi, Afrika, ino-no o World Council of Churches Sompomogunan kolimo (WCC), dot i Manjil Madalag, it ulion do PCS sinumori mamung sid miting dino om minangaplai dot i PCS jumadi do ahli dino kumpulan di songpomogunan. Na minapit-no laid sid Germani i Manjil sampai nakasamung-oku di Manjil om minokihabal-oku dau do kuran i PCS sid Sabah. Minagandaha-po i Manjil sid piumpugan do Korntal, tu minsamung di pandita Wittmann om momuhabal di piumpugan. Na sid umpug diri, tigogi varo isot ulun di mongoduat di Manjil do kuran i PCS mamung sid WCC. Topot sid dahai varot ongoulun di mamajal di WCC, gima i kenginan dau do palabus dit ulun etom sid Soutu Afrika antad sid kinuripan. Gam varo a-ko piro di minonuhu di bishop dahai do lumabus antad sid WCC. Manjadi ino-no i timpa di Manjil: iokoi PCS, nga sabahagian di gorija di Kristus di sompomogunan. Kuran-ka dot amu osinggazun o gama om kopiamung tokou? Ong tumanid antad sid guvas di Kristus, iadko it unturu di notibas-no hiza do rumilik. Gam varo pangalaman-ku dot isot ulun minogolugas sid natad di valai-ku, nga nonong-no sid unturu sampai nedu-no i duvo voko dit unturu dau. Hinumago-no iosido sid dohon om mizak-gizak minomoros do varo-ka katagan ko pengkuro. Turus niatod-ku yalo sid Rumah sakit om i dokutul minonombil vagu di duvo voko dot unturu sid palad dau, gam apakai-no vagu inot unturu, ka di Manjil. Noboros-po i iadino, amu osusa-po di Manjil do posondot sid ulun dino di dau do suriban do guvas om it ongobahagi dau, ko i gorija sompomogunan om ipat-ipat i piumpugan om gorija di nosinggazun-no di guvas dino.

Ino hiza dino, tinuturanan-oku di Manjil do kuran varo parti vagu sid Sabah dit engin pahaba di Mustapha om pengkakat do tanid o hoturan do minsanko Kristian om Silam nga miupakat om nokopiamung-no monukung di parti dino.

I hiza diri minindamo-oku di Rev. Dumartheray, i mad bantaran do Basel Mission ponong sid PCS do pengkakat dot umpug di mongitung di koumbosihan do PCS antad sid sodu dot i Dilger om ioku antad sid Germani sampai i Honegger, i Zimmer om i Kachel nga nakamung sino dino. Sid iso miting, i nakamung-po i guru di Sigris di nokosikul laid iosido dot agricultural dit amu-po nokotraining sid Basel Mission, minangalapor i Voegeli do kuran i Farmschool tu notutup-no om kuran i vaza di Poong tumiim mangatag ombo it a-nokonong diri. Boros di Voegeli, ioti maangahatul di farmschool diri tumiim do mananom di bibit do nizuw iadko kolopioi, supaya oruhai mongumpug dit uva sid apansung i tana. Kasalaan-nopo, it ongonizuw ong kodung monguva dara rinumungoi-no i vusak sampai amu monguva i nizuw tu i papa dit ongonizuw korikot sid vusak di nizuw vokon om minongorongoi di vusak. Iti-no o sabap, sinuhu di Poong do managad di sokoviai i nizuw dit oholian kosomok. Sid saralom do 1300 nizuw, labaan do turu natus o nedu, ka dau. Nening-po di guru dot agricultural sid Swiss, minomoros iosido dot, I koubasan mananom do kazu, pogumuon-no mananom om iri-ogi momili ombo it avantang sampai managad di vokon, ka dau. Mad amu kaharati iosido do tanid i vaza mananom do nizuw ong momuka do kabun di nizuw mantadko mananom do himbaan. Iadko i noboros-ku-no laid diri dot, ipat-ipat i Rungus nokelo-no laid di vaza mananom do nizuw. Amu osusa do monuduk dit vaza mananom, inoi nga suvai monulung dit ongulun, supaya varo bibit dioti om varo tana bahagi di kabun dioti dino.

Tanid mantad dino, minongitung-okoi do kuran kadapatan monukung di PCS, hiza dot apagon magandaha om a-koho i porinta do varo-no vagu missionari di tumabang dit ulion do PCS.

Suvai toun 1978 varo-no vagu koriatan-ku do **mangaraun dit ongogorija sid Asia Selatan..** Sabap i EMS varo kopiobpinezan di gorija sid Jipun om sid Korea Selatan, ino-no i kenginan-ku pentutun dinot ongogorija, supaya kadapat-oku-ogi poilo dit ongopiumpugan sid dahai do varo-no ongoobpinai sid Jipun om sid Korea. I EMS minonodia di panahon-ku om pentahan dit ongoulion dinot gorija dino do varo ombuvoi di mokintutun di gorija om ongopiumpugan dioti dino, iri-ogi minongumba- oku do mapit-po laid sid Sabah sid saralom do duvo minggu, isuhut di hoturan do imigrasi do duvo minggu obuli sumuvang sid Sabah, sampai ong kosunu ino, kouli- po antad sid Korea, insan-po dino tiapit sid Sabah.

Nokorikot-po sid Api-Api, aso nunu-nunu nadapat-ku do katarangan do duvo minggu mirimpanau sid Sabah. Minotibang oku diri do magandaha sid a-ko piro piumpugan om kumiboros om kumiupakat di komite do PCS om mangaraun dit asrama. I hiza diri kakali poturug di valai Titiu bahagi dit anganak dot ondu, sampai i Thu En Yu minindamo dohon do monuduk sid TEE, ino kursus dit ongoonulung di koumpug diri.

Sid kolombusan kotoluvan-oku sid **Hongkong** do minagandaha sid a-ko piro projek di gorija Kina antad di Basel Mission, iadko i gama di Rev. Lutz di minonorundakai dit ongoulun di gumama sid ongokilang, supaya amu oholian o kopogos om ouripon ioti sid kerja dioti sid ongokilang. Iri-ogi linumombus-oku sid **Tokyo** do duvo minggu minangaraun dit a-ko piro piumpugan do momurimon-oku banal di dioti do vaza pasasi di kosipan do Kristian sid tanga dot ugama Jipun om i komojuan do Jipun di mad oholian i gama sumurut. Ong sid sarazo om koburulan, banalko tanid i koposizon dit Kristian mantad i sid tanga do bandar di banalko agazo. Tu ong sino, okonko bai asavat it ongokavavalazan sid soribau, minsanko sid saralom varo vokon duvo ko tolu om apat misasantak-santak i mad alun-alun om kadai, ko upis om kurita di mangatod dit ongoulun sid siombo-nopo. Iningutan-oku-po sid iso universiti do tomod manahak do tudukan kananganko it ulun Kristian di banalko atapat di napatai-no di Nazi sid Germani. Ino Dietrich Bonhoeffer nga ulun Kristian di minongonsug di Kristian di sompomognan ontok di toun 1934 dot osinggazun miupakat do moniag dit ongoulun dit ongopomogunan do mirumpak vagu. Labaan do limo natus murid do university minongining di kososizan-ku bahagi dinot atapat ot ulun Kristian ino. Ong sukul nokening-no it ongokristian om ongogorija di dolou dau diri, ogumu o kosusaan do rumpak, nga amu kosunu.

I duvo minggu vagu sori-oku sid **Korea Selatan**, hiza dot i gorija sino banalko nohovudan di porinta. Tu i gorija minanarang do kuran atag i kopomorintaan, supaya sokovia i it ongoulun, mosikim ko lumundu, gumaji ko pagaji, iseso o kabanaran om hoturan. Topot i porinta minoghiim di komojuan do pomogunan sid saralom do kapagasan dit ulun di gumaji dot oholian kokudik o gaji dot i gamaon kopogos om asadapan, tazon om kamaju i pomogunan sid saralom dot a-ko piro toun. Amu insan oku kopemot dit ongoulun di mogoduw di porinta. Sabap inot akaras o hoturan. Siombo-nopo, varo mata-mata mangajaga om mongontupat, gam momobog-po dit ulun sid ongokilang, ong minindamo ioti dot amu oholian i kapagasan di tugas dau. Na avantangan-no it ongopandita om it ongokristian di nakasamung-oku sid ongokabaktian om sambayang ko i kursus dit ongopandita dot nakatanga-oku sid dioti do momurimon di dioti do vaza pazazad dit Injil om posuntu di samod do Kinoringan sid tanga do korunggalan di pomogunan dioti.

Sid bandar do Kwangshu kenginan di pandita do manahak-oku do khotbah sid piumpugan. I sinumuvang-oku sid gorija diri, varo boros dau, Imatai-no ialo dino sid rinuvang. Iosido antad sid mata mata di mongontupat dit ongoulun do nunu o boros dau. Engat-no banal do nunu o boroson-nu diti, ka dau. Nopongo-po sumambayang, iningutan-oku-no sid restaurant do monginakan-okoi sino. Tigogi, sid meja sid somok dahai, varo-no vagu ulun di sekret service mongontupat mongining di dahai do gama miboboros di hiza monginakan, gam i minudan-oku vagu sid kurita api-api do muli sid Seoul, varo-no mongontupat do koudan-oku ko amu. Hiza di tinumindal-oku sid Seoul, siri-no vagu i jaga do porinta sampai minsanko i hiza di mudan-oku vagu sid tarabang, kakali varo songontupat-tupat di panahon-ku om rikoton-ku. A-ko piro minggu antad diri, varo korunggalan sid Kwangshu dot it ongokurita basi do sojal minangaladtak dit ongoulun di songingkakat, tu moniag di hoturan di porinta di iadino. Labaan do limo natus ot ulun naladtakan dit ongokurita do sojal do Korea. Na ino pangalaman-ku sori mad pakansang dohon sid tugas do monuduk dit ongoulun Kristian sid Germani do mongitug di kosusaan om kapagasan dot ulun Kristian sid Korea.

I minuli-oku antad sid Korea minaza-oku sid Hongkong, linumombus-po sid Kota Kinabalu om minodop sid valai di Manjil. Ino sodop diri i Televison minomuka di kinapangan dit undi do federal dot tigogi, natarang-no dot isai o nakamanang-no sid Matunggung. I boros diri, I Abbah Mongimbal, ka dau om nokembulai i gambar di Abbah sid TV. Banalko avangaan-ku dino, sabap iosido inanu-ku-no di toun 1956 dot ulun di kumuruhang dohon om tumabang dohon misingilo do Momogun om mangagazad dohon monoruvang sid ongobinatang do tomod minsomok-nopo sid

Ongorongus.

Sumarap-oku minozo di terbang sid Kudat, gam mongimot-oku-nopo di pomogunan antad sid tarabang, tu atarang o kinematan diri. Otutunan-ku it ongovalai sid Kumbatang om it ongoalun-alun do Garau om Kumbatang. Sid saralom do duvo minggu vagu kadapat-oku momongo mangaraun om magandaha sampai minsamung di kogumuai it ongoulun di koubasan-ku laid diri. Kovian di hiza-oku sid Kudat, varo- po kumpulan di komite do PCS. Ino-no i boros dit ulion Masandu Majupi sid dohon gulu di monginsuhat dohon; iokoi PCS diti, sid saralom di hiza do pensubaan di hoturan di Mustapha i minonunsub di sokovia i it ongomissionari do Basel, nakakansang-no i kosipan dahai sampai nokemot-okoi di vaza do masi om sumukod kondiri. Ong biano, tu obebas-okoi biano dot aso pangarantaban antad sid porinta, osinang-okoi-nopo. Bai iso-po nga indomoon-za sid dikau. Engin-okoi do varo kosolinan di Kitab Vagu dot alangkap i gama manalin. Mindamo-okoi di Basel Mission om i gorija-nu do potibang dikau do koguli vagu sid dahai pempongo manalin di Kitab, ka dau. Manjadi inot indomoon dino, inovit-ku muli om pengrikot sid Basel Mission om sid ulion di dohon do Gorija Protestant sid Wuerttemberg.

Mad opusok it utok di sokovia i pangalaman di nindukut-ku-no sid saralom di hopod minggu-oku sid Asia Selatan om oponu do katamanan i ginavo-ku di nokemot-no di kosurutan di PCS di sid tanga do pensubaan nakakambang om nakakansang-no mingkakat kondiri. Ino dino nga jinumadi do tema-ku sid ongotudukan om tuturan sid ongopiumpungan. Om i kogumuai dit ongogambal di nanu-ku nopemot it ongoobpinai sid Sabah, Jipun om Korea om i vaza dioti masi om mongopud, minamakai-oku do pembulai di kinososizan dioti dino. Supaya katandon sid surat om kalanta sid ulion di gorija-ku, minonurat-oku-po dot anaru o laporan dino kinapanahan-ku sampai minangamung-po dit inindamo di PCS kananganko i kosolinan do Kitab.

Kagi i Basel Mission tinumoronong sid gorija-ku do pavalang di kenginan di PCS do poriat dohon miguli vagu sid Sabah do pempongo di kosolinan di Kitab Vagu. Ontok di ko20 Desember 1978, varo timpa dau dot, Sabap kodung hiza do kalatangan dit ongokilang om kadai di tanga toun, i vulan Julai om August do sampai onom minggu sid Germani, oruhai-no do sumori-ko sid Sabah monuluk di kenginan do PCS. Ong omungan-po dot a-ko piro adau ko minggu gulu di kalatangan om tohudi, tiimai do mongumba-ko do tolu vulan sid Sabah-ko momongo manalin di Kitab ong toun 1979, ka dau. Nihabal-ku-no ino kinapangaan di gorija-ku sid PCS, minongohodtol-no vagu i Masandu dot, ino-no it openting banal o tugas-nu, posurut di kosolinan di Kitab Vagu.

Manjadi kodung nokorikot-po **sid Kudat adau ko 28. Mei 1979**, minogihim-oku di katarangan di Immigrasi di bai koho sampai sid ko-11.June do mintoron sid Sabah. Minindamo-oku do sampai tolu vulan. Suvai adau ko 4 di August om varo timpa di Immigrasi di minamalang-no dot sampai ko11.August koho i porinta do mintoron-oku sid Sabah. Minsanko i YB Abbah i tinumoronong-no sid Menteri Besar, supaya i Immigrasi monimban dit adau dit osusa-oku lumabus sid Sabah, nga amu minonimban dino katarangan diri.

Na gulu-ko di kinorikatan-ku, varo-no laid noturug-no i guesthouse do PCS dot ino dino nga inintoron-ku sid saralom di hopod om iso minggu-oku sid Sabah. Ino-no i keso o gama-ku, nisodiri-ku-no dot ombo i bahagi di Kitab Vagu nasalin-no laid humiza do varo Bible School ko varo kursus. Iri-ogi minindamo-oku di Osingko Taganau do moriat tumabang dohon sid gama manalin. Na tinumimpuun-okoi manalin di Kisah Rasul, ino-no it usuran dit ongorasul di pinolombus di Habal do Kovosihan sid ongopomogunan, rumbul satu it ongopanahan di Paulus. Songkuro-nopo nalad i nosodia, nitahak-no dahai ino sid ongomanaud Puruvan dot ipoporisa dioti di noumpug sid kursus TEE, supaya varo it ambat dioti dino. Kagi miniupakat-oku di Thu En Yu, supaya inot ongobahagian di nasalin apakai-no sid ongotuturan do minggu dit ongopiumpungan sid saralom di toun rumikot, supaya emot-no do kuran o kotorimaan dino solinan dino. Sid saralom di hiza sid Kudat diri, ino-no it avantangan- oku. I gulu diri sokovia i gama manalin do Kitab, nga kosunu sid saralom dit sokovia i tugas-ku vokon dot a-insan varo kotibangan do sangadau ko bai apat-po jaham dot aso gama om pongitungan vokon mantadko i manalin. Biano-ogi varo koriatan, tu aso tugas vokon om aso ombuvoi di mokitulung ko anak do asrama di mogihad ko varo nuko om i iadino. Asadapan om sampai tanga sodop, aso-nopo sangkut di minonusa dohon. Bai sid saralom dot apat adau, minamung-oku sid TEE sid Bavang Gazo do manahak do tudukan di Usuran do Gorija Sompomogunan om i PCS om

tinumanga-oku dit labaan do turu nopod ongoulun, di nakamung sid kurusus TEE dino, ino-no i Manaud Puruvan om ponulung om osukod do piumpugan di sokovia it 220 piumpugan do PCS. Tanid mantad dino, minagandaha-oku ontok dit adau minggu sid 23 piumpugan. A-insan oku pentahan laid sid piumpugan di rikoton-ku. Iti-no o sabap kadapat-oku momurimon di koubasan om situasi sid piumpugan om kuran it ongoponulung pinosurut di tugas. Ino-no i kenginan-ku: mongimot om minsamung dit ongoulun Kristian sampai mongining di Habal do Kivosihan antad sid kabang dit Ongorongus isuhut di gama dioti miuumpug-umpug monikid minggu..

Navi-no i hiza-ku sid Kudat, iningutan-oku-po sid komitee do PCS sampai kadapat-oku mangalapor sid dioti di kinosurutan di kosolinan do Kitab om kuran i dohon do pongitungan mongumba di kapangaan di gama dino ontok di toun rumikot. I PCS nokoponurat-no laid sid Bible Society do Malaysia om Singapura, tu mongoduat om mindamo do mangakun i Bible Society do momirin di Kitab Vagu do Momogun. Na i minaza-oku sid Singapura muli, minapit-oku-po sid Bible Society dot ino-no it timpa: ong sukul nokonong i gama manalin sid standard do Bible Society Sompomogunan, mangahatul ioti di kopirinan. Ino-no rontob, i budget bahagi di toun 1980 nopusok-no laid. Suvai 1981 om varo-ogi poriatan do balanja. Ong varo ogi sumbangan do tanid, minsanko i toun 1980 kadapat no momirin, ka dioti.

Iso-po hal o iamung-ku siti, Kodung navi-no i kursus TEE, minonurat-oku do laporan dino kursus sid ulion di mangahatul di kursus TEE sid dahai do gorija sid Wuerttemberg do tomod mongunsug dialo dino do pamung sid dau do kursus i tema Ekumene sid saralom do pendongou dit ongo pandita do kuran it ongokitugas dit ongorija sid sodu mogihim do vaza dot kopihiza misingilo om tumoraining sid tugas dau om posurut-po di tugas sid tanga dit piumpugan. Ino-no i hasil dino surat-ku dino, antad diri, sid ikid kursus di gorija-ku bahagi dit ongo pandita, iningutan-no it iso koruhang-ku sid DIMOE di kipangalaman sid gorija sid Asia ko Afrika, supaya ogiang-no i mato di kumurusus bahagi di kozoog di gorija di Kristus sompomogunan.

I kapangaan di kosolinan di Kitab Vagu (4.6.-4.9.1980 sid Sabah)

I toun 1980 varo-no vagu kotibangan-ku di mintoron sid Sabah sid saralom do tolu vulan, isuhut dit upakat di Basel Mission om i gorija-ku. Minapit-oku vagu sid Bible Society sid Singapura om minokitalahas di vaza ponong sid kopirinan di Kitab Vagu. Ino-no it niambat dioti, suvai oporisa no om okunan no di Dr. Suwito sid Semenanjung do pirinon, om turus kadapat ogi pogili sid dioti i manuscript di solinan. Kodung nataip- no, nikiran i proof sid Germani dot ipoporisa ino om pouli vagu sid Singapura. Suvai kenduvo om kentolu-no oporisa do nokonong kavi i nataip dino, iri-ogi pirinon i Kitab om ikirim-no sid PCS sid Kudat, ka dioti.

Nokorikot-oku-po sid Kudat, turus minonurat i president Masandu sid Dr. Suwito om pentahan sid dau di dahai dot tomodon. Sinumodia-no vagu it ongokoruhang di tumabang dohon sid kosolinan dit ongobahagian di Kitab Vagu, di kakali amu-po nasalin. Kopihiza-oku minongimpuras vagu di sokovia it ongobahagian vokon do mongontupat, supaya aso-no alazan ko amu atalang banal it ongohurup ko osusa-po do monimban dit a-ko piro it ongohurup. Sabap elaan-ku dot i panaip sid kilang do Printing sid Singapura dit amu nokelo do Rungus. Kagi osusa-nopo do momorisa dot ikid fasal om ikid tuturan do varo't ulu dit atag-no om iseso i vaza mongimbulai sid ulu dit onsi do fasal ko tuturan.

Na varo masala sid saralom dot a-ko piro minggu, tu asarok mutut- i karan. Vokon-no ong suvai varo karantantad sid pukul 11 sosodop sampai pukul lima minsusuvab. Bai ino hiza kadapat-oku mamakai di ponuratan di mamakai do karan.

Ponong sid August varo-ogi timpa di Dr. Suwito, gam minanansandang iosido do kumisamung dahai sid KK. Nokorikot-po inot adau dino, onom-okoi kavi sombozo minsamung di Dr. Suwito sid penerbangan om minilombus-okoi sid restaurant, tu manarang sid dialo di kosolinan om i vaza monodia di pirinon. Inumba-no laid dot a-milo-milo koduvaan miupakat om opongo-ogi, nokosodia-no do suvai muli ong tanga hari hari Minggu. Nintahan-za-no laid sid BCCM sid Likas dot engin-okoi modop sid guesthouse. Topot mad oduruk ogi i Suwito nokoho om minamanal di kosolinan-za dino, minonginsuhut-okoi di Suwito om linumbus-no sid guesthouse ontok di pukul sepuluh sodop. Sumodia no dara do modop sino, nga murung- burung di Opook om i Kololong do kuran-ka ong minsanko sodop, muli tokou dara, ka dioti, tu varo-po tomodon, ino-no, I Opook om it

obpinai Kololong, sompi minamalang-no dot it ongosavo dioti nga torousuvo-no. Sampai ino sodop dino, songlinsou do boros nga aso dioti di manarang di kobuatano dit ongosavo dioti. Rontob-nopo, mad amu katama ioti muli mongenjin di landrover, ka dioti. Aso boros dioti di nokokuro tu amu katama mongenjin ong sodop. Bai opian-no minongoduat ioti miduvo dohon dot, Ong sukul ikau katama mongenjin, agazo o ginavo-za muli turus, minsanko osuvaban tokou sid tanga do ralan, ka di duvo it miobpinai. Ong iadino, aso kiroon-ku vokon tanidko mangakun sampai dinumompipot-okoi om minudan sid landrover do duvo rinumompit dohon sid gulu om i vokon, nga sid tohudi mogom-ogom.

Na i tumimpun mongenjin sampai sid Tampuruli, tu arantai it alun-alun, aso nunu- nunu. Suvai nakatalib-no sid Tampuruli om atakad om oruhuk it alun-alun dot oholian kokilong i vazaan tumakad om rumuhuk, hinumarati-oku di korosizan di draiber laid. Sabap kodung minsiba i kurita, nga i gear linumabus sampai linumangkas-no i kurita. Suvai i palad kumavid di gear do banalko ologod, amu ogi kedu i gear. Ong i longon koduvo osusa do monurug di steering dot alangkas isuhut di kokilongo dit alun-alun.

Na ino duvo jaham antad sid Tampuruli sampai Kota Belud, noumasan-ku, tu songkudap do mato nga aso dot amu oontupat om ohodtol i gear sid palad do vanan om poturug di steering i gibang. Topot ong it ongonakasako sid tahudi, minsanko i sid rompit-ku, mad enizo moruk-goruk modop do bai toduruk-duruk, varo komen ko manalahas do siombo-no ontok i panau-za. Suvai nokorikot sid konopuan do Kota Belud om osinang-oku ogi papanau di Landrover. Rontob-nopo, it alun-alun i hiza diri asarok varo a-ko piro rantai dit nosimin dot tigogi, bai tana-no vagu it alun-alun. Tu i hiza di Mustapha toun-toun varo sumbangan bahagi dit a-ko piro batu dot alun-alun. Rontob-nopo, a-insan pempongo ino toriso-iso batu dino. Kodung toun vagu, sid tanid no o pangagamaan, dot iri-no ko iri, aso kapangaan. Iti-no sabap i panau sid alun-alun antad sid Kota Belud mad mundok-hundok-nopo do iadko mindakod do laang tukad.

Pukul lima do minsusuvab om nokorikot-okoi ogi sid Batu dua, dot sid apad minud-inud i Mongolizo do hingoton-po. Gam turus i Opook pinatod di savo dau sid rumah sakit om nokosino-ogi it anak ontok di pukul tuju sasarap. Om ontok di pukul tuju sodop, nga nosulakan-no i savo di Kololong, A-kopiro adau antad diri, minongodompipot- oku muli.

Topot iningutan-oku-po sid kumpulan di EXKO do PCS. Sid umpug dino, nipemot- ku-no ioti di manuscript di Kitab Vagu om minamalang-oku dot, Iti kosolinan diti nopongo-no. Suvab mangatod-oku no dino sid Bible Society sid Singapura om harapon- ku dot amu-po avi i toun, varo no Kitab Vagu bahagi di PCS, kangku. Na varo-po boros di Osingko, i nakatabang dohon sid saralom dinot tolu vulan dot, Ong i dohon do kiroon, biano-no tumimpun i gama-za manalin di Kitab. Sabap kodung kumavid i palad dahai di buuk do Kitab, osusa-okoi do pasalin ko patarang-okoi di kogosoo di samod do Kinoringan sid riniba sampai mongingut-okoi dit ulun dino do sumuhut di kenginan di Tuhan Yesus sid ongoulun vokon dot amu monodiri Momogun, Kina ko Sama.

Ong i Masandu minonorima kaseh dohon sampai minongumba dot, Avantang-no ong sumodia-ko magandaha sid dahai do tomod manalin-po di Kitab Laid, ka dau. Ino imahun dau dino inovit-ku muli sid Germany.

Nokouli-po, minomongo-oku di dohon do tugas sid ongopiumpungan, nga amu nolingan-ku do poromut sid ongopiumpungan di minonodia do sumbangan bahagi di kopirinan di Kitab di PCS di habal do nopongo-no i gama manalin dot amu songkuro, nga i PCS varo Kitab Vagu sid dau do boros. Na amu songkuro, nokorikot i **proof reading di Kitab** dit insan-ogi dot i surat dino, nga misusuputi dot amu-po nosodiri it ongonalad. Kagi bai ontok do sodop om varo ogi kotibangan-ku do mamasa om momorisa dot nokonong ko amu i nataip dit ulun sid Singapura. Tigogi, nemot-ku-no dot varo nimbilit vagu manaip di noporisa-ku-no laid do duvo, vokon-no nga onom nalad, om iri-ogi varo nalazan-no it apat nalad di manuscript, mad notindakan manaip. Alaid-nopo nohorotizan-ku no i masala do varo ninduvaan ko nalazan manaip, ino-no, mad nogiang-no i gondila sid upis dit ulun manaip,. Ong varo barat antad sid gibang, tigogi, nulit-no i nalad sampai tinumimpun vagu iosido do manaip di nataip-no laid, ko ong antad sid vanan i barat, otilibi i duvo nalad sampai apat nalad i nalazan. Iti iaditi o hal di banalko amu oruhai mangatag, to osusa do posiat vagu di koreksi om pokirim om manarang sid tukang manaip sid Singapura.

Kenduvo proof reading mad oruhai-no, tu bai momorisa ombo-no i nasala laid manaip diri. Kentolu i

proof reading, nga negative nokopi, ino-no i surat nga opurak sid nalad dit etom. Ino-dino lobipo apagon momorisa, kagi baiko sodop om varo ogi kotibangan mamasa. Iadino-no i tugas-ku monodia di **kopirinan di Kitab Vagu**. Ong i gorija-ku, kodung varo habal do nopongo i Kitab Vagu do Momogun sampai nokokirim-no sid Kudat, minongirim no di horogo di kopirinan sid Bible Society sid Singapura,

Ponong di kosolinan di Kitab Laid - tolu-no vulan vagu sid tanga do PCS 1981

Isuhut dit inindamo di PCS di nokoromut sid Basel Mission om i gorija-ku, minangakun i gorija-ku do manahak dohon vagu do kobebasan di gama-ku sid dahai do vatas do kopiamung-po i suti di toun, supaya miuma do tolu vulan vagu-oku sid Kudat kananganko i kosolinan di Kitab Laid. Nokorikot-po, miniumpug-no it ongoulun di engin tumabang sid kosolinan dino, ino-no i president, I Osingko, i Majaman, i Kololong, i Parasin, i Opook om a-ko piro vokon. Sid umpug dino minonuturan-oku do kuran i Martin Luther minanalin di Kitab sid boros do German ontok di toun 1521 sampai 1535. Ong i Kitab Vagu, tolu vulan iosido sid istana di dau dot ulion do pomogunan di sinumusut iosido sino, gima i Kaisar minoniim do potorongku di Luther, nga nopongo-po i gama manalin dino sampai oduruk-po nopirin-no dot okonko bai insan, inoi nga impiro-piro pirino, tu alaku banal i Kitab sid boros do German. Mad agazo i kenginan dot ulun mongining om mamasa di Kitab sid boros dau kondiri. Topot kodung tumoguvang i Luther di kosolinan di Kitab Laid, hopod om apat toun om opongo ogi i kosolinan sampai nopirin-no it ensanan i Kitab sid German. Manjadi ong iokoi sid PCS sid Sabah amu elaan-ku do kogoos tokou do posurut di kosolinan dit ensanan i Kitab Laid sampai minud i PCS do iadino kalaid om varo ogi Kitab sid Momogun, kangku, sampai minanarang-oku dot, Ong sid Germani, varo-po biano o kosolinan di Kitab di nopili-no antad sid Kitab Laid dit ongobahagi di mionong banal om kiharati bahagi hiza biano, dot i tinomod di Kitab dino, pavalang sid ongosolompok vagu dit apatong o boros om onsug do Kitab. Ong it ongobahagi sid Kitab di bai manarang dit adat dit ulun Yahudi ko ong varo induvo-no inusul iadko i Buuk Tawarikh, nga nalazan-no sid Kitab di retan Kitab Jeans, tu i kuhakub nga kulit do Jeans, supaya atarek-no it ongosuni vagu do dumagang om mamasa. Kagi sid Kitab dino varo-po ongoumpatod di pavalang-no di situasi dit ipat-ipat i buuk ko varo-po a-ko piro panarangan, ong varo inusul-no it amu oruhai mangaharati. Novit-ku-no i suntuan di Kitab Jeans om nipemot-ku-no ioti dot alaid-nopo miupakat om monodiri dot ombo it atag posuruton. Ino-no i kinapangaan, isuntu dinot onibak o Kitab Laid tumimpun tokou do manalin di Kitab dot i harapan, apat limo toun antad biano, varo kapangaan. Kodung nolumbatos do iadino, miupakat-okoi dot apat rombongan (team) om minibahagi-okoi di tugas dot ombo i buuk do Kitab ot toguvangon. Nakadagang-oku-no laid sid Singapura do limo ot English Good News Bible di kigambal om ogumu i panarangan iadko sid Jeans Bible, supaya ipat-ipat i team, varo iso Good News Bible di iadino. Ino Kitab dot English mad pakakas di kadapat pamung di Kitab Indonesia ko Melayu dot pongonovan do pongimatan om suntuan. Manjadi sid saralom di tolu vulan-oku sid Sabah, mingguli-guli-okoi misamung sid guesthouse do posurut di kosolinan isuhut dit upakat. Rontob-nopo, alaid-nopo nemot-za dot amu enizo it ongoteam koriat sid dau do tugas dot alaid, bai i Majaman om i Parasin varo kosurutan di dau do gama. Baai it atatap banal, ino-no i Osingko di suvab-suvab, nga tumabang dohon sid dohon do bahagi. Kodung varo opongo it iso bahagi, mongimbulit-okoi mamasa om mangatag sid guesthouse om manaip-po sid stensil, supaya kadapat mamakai di solinan sid ongopiumpungan ontok dit adau do Minggu. (Alaidnopo varo limo buuk di Kitab Laid di nagama sid printing do PCS bahagi dit ongoponulung om isai-nopo it ozi dumagang dinot ongobahagi dino. I Abui o tukang momirin sid Batu Dua)

I minuli-oku sid Germani, varo umba dot isai-nopo varo kapangaan di dau do bahagi, pokirim ino sid German, supaya oporisa-oku om atagan-po ko monginsosok-po ombo it amu atarang. Rontob-nopo, mad amu tantu nokosurut dino gama sid saralom di toun 1982. Suvai toun 1983 om varo-ogi kotibangan-ku do kumaa sid Sabah .

Totolu-no vulan vagu sid tanga do PCS i toun 1983, 1984 om 85, tu pempongo di kosolinan di Kitab Laid

I hiza dit kengapat-ku sid Sabah antad 1978, varo kenginan di Basel Mission dot i dohon do gama bai

iso-no tomodon, i kosolinan do Kitab. Rumosi dati i Basel Mission do mongunang-oku di gama dit wakil Basel, ino-no i guru do Basel sid Trinity sid Singapura di iadko bantaran do Basel sid PCS (I Rennstich om iri-ogi i Schaer).

Nokorikot-oku-po vagu sid Kudat, mongo-vongo-oku-no do kuran-oku vagu sid Taman Gorija PCS do bai tomod manalin di Kitab, nga monutup di mato-ku om tolingo-ku, supaya a-kemot ko kening do varo masala sid tanga do PCS. Apaganan-ku-no laid dot amu kobongut ong kemot dot aso tanggung jawab sid pialatan dit ongoulun di notugasan. Mad amu osinang banal i Varo murung-burung dot bai i pandita Poong kumavid di blockgrant di Basel Mission. Dot iosido guru di PLA sid Bavang Gazo, i minangahatul di koturugan do kobongunan vagu iadko i valai Titiu dit asrama dot Ongondu ko i asrama Geneva sid Kota Marudu. Inot ongovalai dino ong kobuatano avantang dara. Topot ong sumuvang om momorisa di kobuatano, mad ogumu it amu nokonong. Iadko sid Titiu, varo apat mundam do tandas bahagi 150 ongomododsuni sid tingkatan koduvo. Topot i paip di pengrikot do vaig, bai intanga insi kolombon. Kagi asarok nga aso vaig, tu kitogol-no i paip antad sid vaig do porinta, ko ong varo vaig dino, suvai sodop om varo-ogi. Na i luvang (septik tank) bahagi di tai om sobu bahagi dinot 150 momodsuni om it ongkob di Mariam Majaman, i jaga dit ongondou sid rinantai kotolu, bai tolu kaki persegi om apat kaki karalom, miuma bahagi iso ongkob. Iti-no o sabap, bai tanga toun mamakai om nopusok-no kavi inot ongoipaip sid polobusan sampai noponu-no i luvang. Antad diri, kodung sasarap, varo vaig di nogovulan do sobu sid palampag dit jamban. Om it anganak minomumuhau dit asakau i vaig sid tukad di miri-tiri sampai sid tana. Ino iadino nga labaan do duvo, tolu toun dot iso nga aso tumiim do mangatag dino kosusaan. Pengkaa dino it jamban sid Duisburg i nirompit sid pangakanan. Sino i luvang di nosodia bahagi di kolobusan do tai (septik tank) miabali kopodok iadko bahagi iso't ongkob, nga asavat i kolobusan di paip sid luvang dino mantadko i parit di pongorulunan dara. Topot i minangahatul di kinagamaan dino a-insan minomorisa ko minsomok sid tampat dit ovutong banal.

Varo-po vokon, ino-no, nohorotizan di tukang wang do Basel Mission dot mad amu nokelo banal i bendahari do PCS do mangahatul dit ongoakaun. Iti-no o sabap sinuhu-no it iso bendahari do Basel Mission do tumabang di bendahari PCS do mongiro om mongohongkos di akaun do PCS om i-po di Asrama. Noporisa-po dau, nokembulai- no do varot a-ko piro ribu ringgit mad natagak. Manjadi, ino-no i kinapangan dit suhu di Basel Mission om i Inggol, gam minonurat-no do rasi, i boros dau. Varo natagak do iadino kogumuo o siin dot okonko tinomod. Iti-no o sabap, notutup-no i akaun di toun katalib om nosoinan-no di Zumbrunnen om i bendari PCS.

Banal-no, it ulun antad sid Basel amu nokelo do Momogun ko Malazu sampai bai it ongorumbul ot otutunan. A-nemot dau dot ong i Inggol sinumain do cek bahagi di kadai, i minongojuval do vagas om sardine om vokon sid asrama, do kopionong di horogo di barang di noudal om minongoi di siin sid bank. Topot minangapus iosido bai iso bahagi dit utang di vulan. I vulan vagu, varo nobi antad sid vulan laid, nakamung sid utang di barang vagu. I harati, sid saralom dot bai tanga toun, oruhai i Inggol minanganu do hopod ribu ringgit dit asrama.

Antawa, insan-ogi sinumbayang-oku sid Tiga Papan. Nopongo-po sinumombol oku-no sid valai di OT Madalag, i ama di Manjil, nipemot-oku-no di Madalag i tuung, ino pongizanan di persembaan do piumpugan di nokunsi-no (ong i kungsi sid pusat sid Kudat) sampai minongoduat i Madalag dohon do, Kumuro-oku diti, tu nopusok-no laid i tuung do pisa. Tantu amu no kouma i persembaan dit adau bianco diti. Mad labaan do tanga toun, a-insan koongoi i persembaan do tomod kogunaan bahagi di PCS ko posuvang-po sid bank.

Ino-no mad apaganan-no it tukang wang do potukal dino siin do pisa om posuvang-po sid bank ko pakazon mamarai dit ongoutang do PCS, osuhulan-ogi do bai monurat do cek om mongoi sid bank di kogumuo do piro-piro nalad do tohopod-hopod ko tahatus-hatus ringgit. Ong sid piumpugan, tanid-no o masala, ong iadino kalaid it ongopersembaan mili-gili sid kampung, varo kogunaan vokon. It iso mindamo do molos di panambang kumaa sid rumah sakit, tu ahali i savo dau, nga sid tohudi amu poriat do mangapus vagu. Vokon-no ong tanid o kogunaan dau i minolos do persembaan, nga kasarakan dot amu okopusan vagu.

Alaid-nopo potoguvang i president dohon sid ongomasala di iadino om minindamo dot tumoguvang-oku dit ombo dit amu nokonong.

Na i gama manalin murut-surut-no sumuhut dit umbu. Vokon-no ong amu oruhai do momili do

pongoretan di mimbulai di harati sid Kitab, tu aso iadino sid Momogun. Suntuan dino, varo tuturan di nabi Elia i nokokozou sid buwatan, tu rumosi dot apatai di raja. Sino dino vitilon iosido do tigogi, varo roti mili-gili sino. Natarang-ku-po do kuran dati i kobuatano di roti dino, tu sid Kitab BM varo gambar di Elia mavid-kavid di roti dino, minomoros i Majaman dot, ino-no atag do manarang dot, varo mili gili sino sangkatul do roti, ka dau. Na minongoduat-oku dot, kuran-ka ong momili do pongoretan tinopis, it nagama antad sid runti di nogoreng-no, tu kuran-kuran ong it Ongorongus amu-po oubas do magazau do roti iadko i Kina. Topot minangamu i Majaman dino. Nening-po di Onjirim, di minagazau io hiza diri sid ropuhan, mirak-irak iosido sampai minomoros, ong katul, bai pongoretan dit apakai ong tana di mad watu noumpug . Alaid-nopo minomili-okoi do sangkazu o roti. Tanidko i kosolinan, nokodim-oku-no mamung sid duvo sinoda Wilaya om i kumpulan do Exko om iso-po kursus TEE, gam varo-po kotibangan do mamung miupakat dit ongowarden dit asrama do katagan dit ongoasrama, i bongunan om i ponsuran dit ongovalai, it ongopaip do vaig om i natad om pananaman do bunga om kouvaan.

Nokuli-po sid valai-ku, minonurat-oku do laporan ontokko i hiza sid Kudat bahagi di kumpulan dit Ex-Sabahan om i Zimmermann, i nokotimpuun-no do mad pegawai di Basel Mission ponong sid PCS. Iosido dino, alaid-no sid Kalimantan Selatan om Timor nga kipangalaman sid pananaman do kazu om totodukan sid tropics. Miniguli- oku sid kumpulan dino di dohon do kohorotizan dit ongomasala sid tanga do PCS, ino-no

1. I pusat di PCS mad oholian kagazo di kakali aso kogoos do manaan di tanggung jawab
2. Amu oruhai kopiopot i kopiobpinezan di Kina om Momogun. Varo mad duvo hoturan dit i Kina minangavid di kuasa do koringgitan.
3. It pegawai do Basel Mission kakali mad ama dit anak PCS. Kuran-ka jumadi do partnership dot miabal i hak om om tanggung jawab?
4. I nosikul sid Trinita, banalko apagon pouli sid hoturan do PCS

Ino-no it osusaan-oku-no diri, ong varo magandaha antad sid Basel Mission, iadko i Dumartheray, i nokelo om osomok sid Kina, asarok iosido mamung sid ongoKina. Topot ong sid PCS, ahago i gama dau pempongo dot upakat dot amu tantu minongining ko mongimpa dot nunu it atag do mogkovosihan ko monginsosok ko mangatag. Pengkaa dino i Dr. Schaer antad sid Trinity, i retanko bantaran do PCS om Basel Mission. Iosido lobipo humarap di boros di Thu En Yu ko i Poong mantadko monodiri om mongining om mongimot do varo kopigogutan sid pialatan do Kina om Momogun. Kagi i kobuatano dit Kina mad kaganti ioti dit ongomissionari di mad monoruntud di Momogun do iadko guru om tuan dioti, ko it Momogun kakali anak ko kuli. Andaman-ku i tuturan di Osingko, i minonulung dohon diri mangatod di 2000 karong gandum sid ongokampong. Ontok dot iso sinoda, minindamo iosido do kungsi do kurita di missionari do tomod dumagang do totodukan sid pasal bahagi di sinoda. Ambat di kuvo, ino dino amu obuli, tu i kurita diti, dang Mission, ka dau. Na sid sinoda di sinumuhut, iri-no kuvo tinumoronong sid di Osingko do monuhu do kumaa sid kadai do dumagang do sigaret bahagi di kuvo dino, gam minanahak sid di Osingko di kungsi di kurita dau. Ko, inot ongovalai di koingkakat iadko i Titu om i binatang dot apat onkob sid somok di valai laid sid Batu dua ko i Asrama Geneva. Sinuhu-nopo di Poong ko i Thu En Yu i tukang dot aso kinopiupakatan banal kananganko i kogunaan om i sokovia it ongokosukupan. Iri-ogi ombo i tukang minangagama, nga aso gama momorisa sid tohudi tadau ong varo masalah. Iti-no o sabap, sid ongoasrama Duisburg, Titu om Basel, nga banalko araat it ongoalad bahagi di tandas om i ponsuran di kolobusan antad sid ongotandas dino. Minsanko varo hoturan antad sid porinta dot i kogozoo di luvang do tandas (septic tank) isuhut di kogumuo dot ulun di mamakai di tandas, kavi-avi inot ongoluvang bai miuma bahagi isot onkob. Iti-no o sabap, ensanan it ongotandas, nga dot ovutong sampai amu asakapan.

Nening-po ino hal dino sid umpug sid Basel, minananid-no i komite Basel do sampai hopod ribu ringgit, supaya i hiza di vagu-oku sid Kudat, kapangahatul di gama mangatag dino kosusaan di mad tempat di kapanakit dot anganak.

Kodung nokorikot-oku vagu sid Taman Gorja PCS di toun 1984 do tomod momongo di kosolinan di Kitab Laid, miniupakat-oku dit ongowarden dit asrama do Duisburg, Titu om Basel do mangahatul do gotong royong o gama-za mongukad dit ongoluvang di miuma kopionong di kogumuo dit anganak

(sid Duisburg 60 ongokusai, Titiu 150 ongosumuni ko Basel 40 anganak).

Ondu om kusai tinumabang do mongukad dit ongoluvang, minangavul-no di simen, vatu om pantai bahagi di pongorinding om ponombol di septik tank sampai minonimban-no di totezon laid dit a-kopionong om o ponsuran di polombus di tai om sobu sid luvang (cess pit) Gam sid Titiu om Basel osusa-po do monimban di totezon. Isuhut di arkitekt, nga it ongkob di tandas sid rinantai sid savat varo ongoogomon sid Titiu, topot asarok aso vaig bahagi momoug di mundam. Sid Basel, nosimbanan-no it ongkob sid savat do ajadi dot ongkob bahagi dit murid sid Sekondari, supaya amu outatangan ioti dit ongopopodok-po it ongomurid. Topot i tandas nitimpak-no sid cesspit dot ataapan-po om orindingan-po.

Kiroon-ku sid saralom dino gotong royong, ogumu it anganak misingilo do mamaitong ko monimen om kaharati-ogi ombo i kogunaan do varo cesspit di kiguna, okonko bai cesspit ngaran iadko i gama dit ongokina di minongumpai-no di puvalazon diri.

Ontok di **kinandahaan-ku di toun 1985**, varo-no noumba laid do kodung korikot sid Kudat, varo korounan dit a-ko piro ahli do EXKO sid Bengkoka, sid Pitas om lumombus sid Tangkarason om Paitan sampai mapit-po sid Pantai om Sinukab do mintana muli sid Kudat, do ioku, nga iningutan-no do kumuruhang dioti dino. Ino-no i tinomod di panau dino, It Ulion do PCS Masandu Majupi om ioku ozi mononodiri sid saralom do duvo toun do kuran o kadapatan mangahatul dit ongopuruvan om i sokovia i it ongohal kananganko i Manaud Puruvan, i valai dau, it ongopiumpugan do puruvan, it ongopersembaan di piumpugan, it ongopanahon om sagu hati dit ongoponulung ko i tana do station om it kosukupu do station iadko meja, ogomon, odopon om i iadino. Pengkaa dino it ongobuuk di puruvan di manarang di kogumuo do piumpugan om ongoongkob om ongokristian, i kopomodsuan om kapagantangan om i iadino, i kogumuo do ponulung om ongoosukod dit ongopiumpugan. Sid panau dino, ino dino kavi kopongimatan ko koponantuan sampai varo- po kumpulan di sokovia i it ongopiumpugan dit ipat-ipat i puruvan di ninopitan.

Suvai minamanau-okoi ong nopongo-no laid it upakat di kolombusan om kapangaan di kosolinan om i kopirinan di kolimo buuk Kitab Laid bahagi dit ongoponulung om it ongotuturan sid saralom do tanga toun vagu. Kakali monguog-okoi di kapangaan di kosolinan, nasadaran ogi dot mad nolingan-no i SUU do mongirim sid Bible Society do habal di kapangaan di Kitab om it indomoon-no do monodia di kopirinan di Kitab Momogun. Minsanko i surat di monorima kaseh sid Bible Society bahagi dit 20,000 New Readers, nga nalazan-no mongirim.

Sid kinapanahan sid Bengkoka sampai sid Paitan nopurimanan-ku i kosoduo di rikoton di PCS om i tugas do potoguvang-po do boros sid ulun dit amu tantu kopiharati do Rungus sampai nemot-ku dot amilo-milo i PCS manalasai do hoturan bahagi d tugas di Manaud Puruvan, i gama manaud do station om i tanah ko it ongokosukupu do station, supaya varo katarangan do kuran-no mamakai om kuran-no polombus sid gumanti di puruvan, ong varo kopigontian. Nening-ku-no dot it iso Manaud Puruvan kodung minaliu sid puruvan vokon, tinagad dau laid i punti di tinanom dau.

Kouli-oku-po, iri-ogi mad makit-sakit-oku dot amu songkuro banalko okugui it guvas-ku do mogkikip-oku sodop adau. Noporisa-po sid Rumah sakit, mad ahali i Malaria-ku om kotoluvan a-nakakan om amu nokodop. Bai iri hiza diri nokotiim-oku do sumakit-oku sid Sabah sid saralom do salaid diri sid Sabah. Suvai ohijau-no vagu, om kadapat-oku ogi momongo di kosolinan do Kitab om mozo-po dit apat sinoda Wilaya. Minsanko i puruvan Bombong kaapat o rikoton-ku, ino-no tempat dit a-insan kemot laid. Tanid-po varo kursus dit Ongomanaud Puruvan do kotoluvan-okoi manarang om mokitarang di hoturan di Puruvan, nga varo a-ko piro kogolivangan dit toriso-iso manaud puruvan, tu i boros dau, Tau-ma diti, amu-ku koduzaan dot iti banal o tugas- ku, ka dau.

Kopihiza dinot ongopanau-za nokosurut i kosolinan sampai varo kapangaan. Adau ko 19. August inumpug-no i EXKO om nening-no i laporan-ku dot nopongo-no i Kitab Laid dit onibak isuhut di Jeans Good News Bible sampai miniupakat-okoi dot ino Kitab dino ipiamung-no di Kitab Vagu do pirinon sampai 5000 kaping. Minindamo- okoi do varot ongogambal iadko sid Good News Bible di dang English.

Varo-po umba om indomoon di EXKO dot it ongoasrama ong kodung toun 1986, mesti mongohormat dit ulang toun do kotolu nopod varo asrama PCS do pengkaa dino: mongingut di sokovia i it ongo-ex-hostelites mamung sid kumpulan dot Ulang Toun ontok ko 31. Mei 1986. Iti-no o sabap,

minindamo it ulion do PCS di kotibangan-ku mamung sid ulang toun dino om minumba dit a-ko piro ongokumpulan ko kursus vagu di manaud Puruvan, it ongo ponulung ko it ongosukod dit ongopiumpungan. Kondiri i Masandu minonurat sid Basel Mission om sid gorija-ku do manarang di tomodon om kogunaan dit inindamo dit EXKO dino.

Susuvab diri, nitahak-ku-no i Manuscript sid Bible Society sid Singapura. Ino-no i timpa dioti, Imat-imatan-po. A-insan pomirin-okoi do Kitab dit bai onibak do varo nalazan dit a-ko piro bahagi. Engin-okoi do varo kopi di Jeansbible sampai mongoduat- okoi di SU di Bible Society Sompomogunan, ka dioti.

23. August 1986 Adau dot ohormat sid Asrama PCS: Tolu nopod toun Asrama PCS

Isuhut dit inindamo di EXKO, minagandaha-oku vagu sid PCS, tu moduduk-oku sid PLA om mamung sid ongosinoda wilaya om it ongokursus do ponulung om manaud Puruvan, iadko it ongotoun di nakatalib.

Na inot ulang toun dit asrama PCS, ino-no mad adau dot agazo. I toun netung-no laid do kuran kadapatan mongonsug dit ongo-ex-hostelites minsamung om miirung/ko mirurukut monulung do monukung dit ongoasrama sid Kudat, Pinavantai, Pitas om Kota Marudu. Kagi adau do kumpulan di iadino, nga adau do mongimot do kuran varo kosurutan om panangan dit ongoasrama om i gama di PCS mangahatul dit ongoasrama. Manjadi i hiza do mongirim dara do panggil sid sokovia i it ongo exhostelites, tigogi, mad aso sino i laporan dit ongongaran. Mad nakada-no i rekod dit ongongaran di sokovia i it anganak di nokentoron sid asrama sid saralom dinot 30 toun. Ino-no rontob atalahas no dot labaan do tolu ribu ot anganak nokentoron sid asrama do PCS, nga nakazad-nobo sid pentongkop do Sabah, gam varo-po a-ko piro di nakavaliu sid Semenanjung, sumuhut di dau do ponsohorian. Osopung-po nokosodia-no it 280 hostelites sid Pusat PCS do minsamung dit isai-no i rumikot om mamung sid perayaan/karamazan do PCS, molohing ko obpinai ko varis om i-po hostelite laid. Ikid varo kotorima do bondira di kisurat: 30 toun asrama PCS Kudat. Nosodia it ongo parking dit ongokurita om baas, varo exhibition do gambar di manarang dit usuran dit ongoasrama, varo mongojuval do banat di kisurat bahagi dit adau dino. Varo puruvan di pinokirim do totodukon om kouvaan om tanid o barang di kadapat dumagang. Gam ikid puruvan nga nokorukut bahagi di kosukupu dit adau dino. Om sid simpangan do Batu dua varo bondira di pentahan di tinomod dit kumpulan sid Batu Dua dino.

Pukul 9.30 tinumimpun i gama sumambayang do mongoguna di asrama di notunda- no sid saralom do tolu nopod toun . Nopusok-no i gorija dot ulun, nga varo a-ko piro kuaya dit ongoasrama, gam it ulion dit asrama minongingut dit ex-hostelites do mingkuaya, nga sino dino, noumpug-no varo polis, varo Dio, varo guru besar, varo matron ko i-po jaga sid airport KK minamung mongindazou do Kinoringan, gima i barakat dau bahagi dit ongoasrama do PCS. Varo-po a-ko piro boros om kasalamatan antad sid gorija Kina om i porinta. Ioku-po pengrikot sid umpug di kovosihan di Basel Mission, EMS om KNH, i kakali minonukung dit ongoasrama. Iri- ogi varo miirung makan sid Titu om sid Duisburg, vokon-no mamakai do pinggan, vokon-no bai plastik i pongolopot do ginazau, tu aso roun do rungin ko punti.

Iri-ogi varo a-ko piro pertandingan do sepak raga ko mitarik do polihan om tasantanid-tanid i vokon o kamamazan om pertandingan, iadko mongigol om sumundai, ko isai it avantang banal o sulung do tradisi. Mad sampai tanga sodop om nopongo-ogi it adau dot agazo sid asrama PCS. Ino-no ot nokentalang: banalko osinang-no om ohigak it ongoulun di miumpug diri, tu nakaharati dot inot ongoasrama mad agazo-no o kogunaan ponong di kosurutan di bansa Momogun sid daerah Kudat. Gulu-ko inot adau sid Kudat, nobuka-no laid ontok di ko16 August it asrama Geneva sid Kota Marudu dot i sumbangan di asrama dino, nga antad sid World Council of Churches. Hiza dino varo ulun antad sid Tangkarason di poturug-po dot intoronon dit asrama Pitas antad sid bontuan di Basel Mission. Apat nopod ot anganak antad sid ongobinatang di sid sarazo do Bengkoka kadapat mintonon om sumikul sid Pitas. Ino asrama dino kagi mad piumpungan dit a-ko piro ongoulun di nazazad-no sid somok sino ontok dit adau Minggu.

22.7. - 6.9.1987 sid Sabah-oku vagu minangajal sid PLA om minozo dit ipat-ipat i sinoda wilaya om it ongokursus do ponulung om Manaud puruvan. Sid saralom dinot onom minggu nokotoguvang-oku

dit a-ko piro kosompitan, ino-no, sabap noruzahan- no it ongotagad, gima banalko aso darun om it amu navi rumuzou, navi-no di butu sampai banalko apagon it ongoulun sid kampong masi om mogihim do koposizon. Na sabap varo agazo it ongosumbangan di porinta di PBS bahagi dit ongororija, minsanko i PCS tinumomorima do grant bahagi pengkakat dit ongororija, vokon-no sid ongokampong om i-po sid pusat PCS sid Batu Dua. Ino panambayanan vagu dino, ong kobuatano, avasih o kematan. Rontob-nopo, mad amu kopionong di kogunaan om i ekonomi. Sid banalko agazo om asavat o taap, aso kolobusan di barat dit alasu, gam varo ongokipas di pensibak vagu di barat dot alasu. Iti-no o sabap mad garangan-no do nizuw i panambayanan dino, miabal di gorija sid Taginambur d SIB. I kobuatano di gorija laid diri minonulung dot minsanko banalko alasu it adau, it barat di sumuvang sid ongoparapad turus minsavat om lumabus sid tiningusan, supaya banalko ongis sid saralom di panambayanan, minsan banalko ohungos sid lamas. Gam varo-po lampu sid natad di kadapat manganavau di soribau do gorija ontok do sodop. Topot a-nokiro do mongoguna di vaig do darun sid banalko agazo o taap dot oruhai dara koumpungan om kogunaan sid pusat PCS. Ino hiza diri, nentaranan-no i projek do mananom do Safoda sid pentongkop do Bengkoka. Ino projek di porinta minanansanganu-no-po dit ongotana dit ongoulun sampai minanagad dit ongonizuw om kouvaan, supaya varo kohuntungan dara antad sid akasia, dot amu-po kolimo toun kosurut-no inot umba dino, nakaharati-no i porinta dot amu mionong ino akazsa sid tana do Sabah, gima novian-no do vaig sid saralom do tana. Tigogi, notutup-no i projek, topot it ongoulun di nakasain laid do gumama om masi antad sid Safoda dino, iniduanan-no do tana om kabun nga aso, ponsohorian nga aso-no. Minsanko it ongoulun sid ponong Matunggung di ponosuvang di dau do tana sid kabun do kelapa sawit, varo i kosusaan. Sabap tanid mantadko it upakat di kinobukaan di kabun dino, amu nokelang ioti sid gama mongumpug di kouvaan do iadko gumaji ioti , gima varo ongopilipin di mangakun dot omura o gaji mantadko it Ongorongus. Ong monobus dara vagu di dau do bahagi di kabun, oholian i horogo dit ongolot di sampai 120,000 RGT (sabap nokiro-no kavi-avi it ongogaji dit ongomanager om ongokomitee om ulion di kumpani di kabun dino, retanko iti-no i horogo di kinopomukaan di kabun dino).

Iso-po o hal di mad pinosusa di PCS. It a-kopo piro murid do teologia sid Trinita sid Singapura, kodung nokuli-no sampai sumuvang do tugas sid PCS diri, nengkod-no sid PCS om sinumuhut di dau do kenginan sid politik ko karaja vokon. Sino dino, i gama vokon agazo o koposizon mantadko i bai tumabang di PCS sid ongopiumpungan. I nokosuvang sid parti do PBS sampai napangkat-no do YB, tu kristian ioti di PCS, mad mangamalu ioti di PCS. Momuruvak dara ioti ong mamung sid sinoda om kumpulan do PCS, ko minanahak do surat sumbangan bahagi di gorija, nga iri-ogi kembulai dot aso siin sid bank di miuma do mongimbulai dino sumbangan. Vokon-no ong magavuk-nopo sampai norungoi i Mercedes dau, nga aso boros dau dot mad nakalandu iosido do sampai i koruhang dau nobolou-no antad sid aksiden dino. Ioti duvo dino i kakal-po manaud puruvan do PCS, minanganu-no ioti dit ongopersembaan dit puruvan dioti dot amu katama i gorija do poutang dioti dino.

I kakal-oku sid Sabah, nabasa-ku-po i surat dit iso manaud puruvan di vagu notugasan. Iosido minongogorot sid EXKO do varo kurita dau di dang puruvan, tu ka di surat dau dino, ioku diti okonko miabal di rasul Paulus ko it ongomisionari di Basel Mission di minintana rumikot sid ongopiumpungan. Ong aso sakaan-ku, a- mu-oku mamananau do sangjaham do tomod rumikot sid paanambayanan di puruvan do mangahatul di kasambayanan. Amu-oku kogoos do mintana magandaha dit ongopiumpungan, ka dau.

Tanid mantadko ino, nokening-oku do kuran it a-ko piro ulun do Lajong om Narandang suka rela mamananau sid Gana, i sid sarazo ponong sid Nabalau do monginjil sori do miovoli-voli mamananau om mintoron sino sampai monuduk-po dit anganak. Mad duvo nopod toun varo a-ko piro mission do Katolik, SDA om SIB nokoponoruvang sid Gana, topot amu kogoos ioti do tumatap sid Gana.

Tau-ma ong i PCS kogoos mangahatul di komojuan dit ongoulun sid Gana ko pengkuro.

Minsanko tasantanid-tanid ot ongoduatan om toguvangon dino hiza diri, opusok o gama-ku antad di kinorikatan sid Kudat sampai i kinulian-ku vagu.

Iri-ogi sid Sabah 25. Mei sampai 7. August 1988

Mad toun-toun i PCS minindamo di gorija-ku om i Basel Mission do potibang dohon pakaa sid Sabah

do mamung sid ongotugas di PCS, siombo-nopo varo hal dot avantangan dit ulion do PCS do paamung di palad-ku gumama. Ontok di vulan February nokorikot-no laid i jadual di EXKO do nunu i tugas-ku sino.

Noumba-no dot apat kursus sid ongowilaya do monikid iso minggu. Sid kurus dino, iningutan-no it ongoosukod di piumpugan, it ongoonulung om it onogoguru do sekola minggu. Varo-po kursus dit ongomanaud puruvan, it ongowarden dit asrama sampai varo-po sinoda umum di minomili dit ulion om it EXKO. Ino-no i dohon do tugas, mongusul om manarang di usuran do gorija sompomogunan om i-po di PCS sampai kuran kopiopud i PCS sid Gorija sompomogunan di kingaran do Ekumene. Sabap varo-po indamo dot mangajal-oku di teologia di retanko homiletik, tinumiim-oku do manarang di kogunaan do teologia bahagi di gorija om piumpugan. Tu nunu o kogunaan dot aralom o teologia sid ongoulun di kakali apaganan mamasa di Kitab sid kabaktian ko kumpulan sid valai. Iti-no o sabap minanarang- oku di teologia di retanko teologia do karabau. Ino-no, sid Thailand varo missionari antad sid Jipun. It inintoron dau nga sid bandar iadko Kudat ko Kota Marudu. Monikid minggu miuumpug-no it ongoulun antad sid ongokampung sino om iosido mingkhotbah sid dioti di dau do vaza manarang om poromut di tudukan di Tuhan Yesus om i-po't ongosurat di Paulus. Na iso-no o kogulivong dau, kodung tumimpuun iosido mingkhotbah, amu songkuro mad kumodom-no i mato dit ongoulun do mad modop ioti. Ong mongoduat iosido dit ongoulun do kuran i tudukan dau, aso tantu ambat dioti tanid mantadko avantang, ka bo. Alaid-nopo mad abasan iosido dot amu kopongimbulai sid tanga dioti dot onsug ko kohigakan om katamanan, minonguog-no iosido do kumuro banal inot ongoulun dino. Iri-ogi minonginsosok iosido dit inantadon dit ongoulun sampai minozo dioti muli sid ongokampung dioti di banalko osodu. Vokon-no mad duvo, tolu jaham mintana ioti om koumpug-ogi sid bandar. Iti-no bala, ka di ginavo, ohuzan ioti mamanan rumikot sid dohon. Tiiman-ku dot ioku rumikot sid kampung dioti, supaya elaan-ku di dioti do koposizon. Turus minagandaha iosido sid kampung sampai minongimot do kuran it ulun mukabun mangaranau dot asadapan iosido sid ranahon do mangaradu om mongolukor, dot it ulun asadapan bai kumiboros di karabau do hau om ho om hui ko oha om i iadino, i monuhu om moniag ko monuduk di karabau do panahon om pentaranan. Mad tigogi, mongitung iosido, Kuran-ka ot atag o tuturan-ku sid dialo dino ong asadapan iosido nga bai karabau o koruhang dau.

Manjadi antad diri miniupakat iosido dit ongoulun dot iosido mangahatul di sambayang sid tanga do kampung. Kagi hiza dot iosido mungkazut rumikot sid kampung do maza iosido sid ongotimbun do ranahon om kotupak sid ongobantaran, iri-no ko iri ot minongimbulit iosido moroboros dot, Ong monuduk-oku dioti di kuasa do Kinoringan, hondomon-nopo dot Asadapan-nopo i karabau o koruhang dau. Manjadi antad diri banalko mongining it ongomukabun, tu kaharati ioti dot i tudukan om i boros di Yesus nokenksomok sid dioti, gam mamalang di dioti do kosusaan om kosinangan, i katamanan om kopipitan. Sabap banal-no, i Yesus mongintutun dit ongoalan dit adat ko i hal dot ongekob, i minisavo ko kuran tumoguvang-po dot ulun di tanid ot ugama ko kosipan.

Avantangan-oku do sid sinoda varo apat adau dot toduvo-duvo jaham mamasa om midialog dot a-ko piro bahagi do Kitab sampai popiumpug dit ongohasil dit ongoupakat dino, guluko i pomilihan dit Ulion om it EXKO.

Tanid mantadko ino, kadapat-oku-po do monodiri om manalasai di kopirinan di Kitab. Sabap varo kohigangan do posuvang sid Malaysia do Kitab antad sid Indonesia di minamakai di pongoretan Allah bahagi Kinoringan, varo upakat sid Bible Society do pengkakat do Bible Society do Malaysia, supaya amu osusa do pavaza sid kastam dit ongokitab. Topot sid saralom di kopiupakatan di iadino, mad navantai-no it kopirinan di Kitab Momogun di nakatahu sid Singapura di toun 1985. Ioti sid Singapura minamalang-no dot i kopirinan dino, nga dang Bible Society sid KL do tugas. Topot i sid KL mad amu-po nokosodia do tumoguvang sid gama di iadino. Miduvo-duvo i Bible Society sid Singapura om Kuala Lumpur amu tinumimpa do surat dot sampai duvo toun. Kagi it Pandita Suwito, nga nengkod-no i tugas dau do momialatan.

Manjadi minonurat-oku-po sid SU do Bible Society Sompomogunan (UBS). Iosido minonuhu di Dr. Arichea sid Indonesia, supaya iosido momorisa do kiontok i kosolinan di Kitab isuhut di kenginan do UBS. Manjadi induvo-no i Dr. Arichea kakaa sid Sabah dot aso koriatan dau sumamung dot ulun do PCS. Kentolu nokorikot sid Kudat mininsamung iosido di Osingko om i Majaman sampai minangakun sampai minongudal di kopirinan di Kitab Momogun. Topot kakali i SU sid KL Ezra

Loke minongoduat sampai minongitung dot mad atagal ong varo kosolinan di Kitab sid Momogun, gima varo hoturan di porinta Malaysia do mamakai di Bahasa Malaysia, om retan do, Sokoviait it ongoulun sid Malaysia nga nokelo di BM, ka dau.

I hiza diri ontok dit ADAU Merdeka 31.08.88 nokoponurat i Christian Council of Malaysia do surat sid sokoviait it ongorija sid Malaysia dot i boros di surat diri, nga varo English, Mandarin om Tamil, topot aso BM. I timpa-ku sid Ezra Loke dot amu avantang do mongusiba ko mangalai di bansa do Rungus, retanko atagal do varo kitab sid boros dioti kondiri, mad a-inambat dau. Suvai varo guru sid STM sid KL di tinumabang dohon sid Bible Society om varo-ogi timpa, ino-no iosido minsamung dohon sid Penerbangan do KL, hiza di tumukal-oku do tarabang kumaa sid Kota Kinabalu.

Kasalaan-nopo, ino surat di pentahan di kopisomungan-za dino nikirim-no ko 15. Mei sid alamat-ku sid Germani, suvai nokorikot sid palad-ku ontokko 10 June sid Kudat.

Suvai nokoponurat-oku-no vagu sid KL om minangakun i Pandita Loke do minsamung dahai sid Kudat ontokko 16.-18. Julai. Inumpug-no kavi it ongokoruhang di nakatabang manalin di Kitab sampai nipening di Mr Loke di dioti do kinosukadan sid Kristian om i pangalaman do mozo di Tuhan Yesus. Inot adau diri minongining-oku dot a-ko piro tuturan om kososizan dinot ongokoruhang-ku di nakatabang dohon sid saralom di gama manalin di Kitab sid a-ko piro toun diri. Inot adau diri om kaharati-ogi di SU do Bible Society dot i gama dahai manalin do Kitab okonko bai gama dot ongosuni vagu, inoi nga gama po dot ongosukod di kipangalaman sid kosipan om i tugas do poromut di Habal do Kovosihan sid ongopiumpungan. Antad diri tinumimpun-no i gama monitak di kitab..... Sabap nokoho-no laid it ulion di gorija-ku sid Germani do mongimbulai di sumbangan bahagi di kopirinan di Kitab, mad oluvas-ogi i ralan di koponodiaan di Kitab Momogun.

6. Mei sampai 15.Julai 1989 sid Sabah

Insan-po vagu nokoriat-oku mamanan sid Sabah, apagon-oku rumikot, tu i tarabang di lumombus dara antad sid KL sid Manila om mapit-po sid KK, nga amu kotulud. Suvai tanga sodop om nokorikot-oku ogi sid KK, dot it ongoulun di minanamung dara dohon, nokouli-no sid Kudat. Na nemot-ku-no it iso Kina di mangakun do turus mangatod dohon sid Kudat dot i panambang miabal do modop-po sid hotel, minsusuvab-oku do pukul lima om nokorikot sid guesthouse do PCS.

Sid saralom di hiza sid Kudat, varo apat minggu kursus dit ongomanud puruvan om iri-ogi it ongotumpuk, dot i kenginan di mangahatul, ombo i tudukan-ku, nga suvai idalin-po sid surat, supaya sid tohudi kadapat mongimbulit mamasa om mongohondom, ka. Inindamo-oku dioti do monuduk dit Usuran di PCS antad sid kinotimpunan. Sid tanga dit apat nopod ulun di noumpug sid kursus, bai i Majimil ot ulun di nokogulu-ko yoku momurimon di kinojodizan di PCS antad di kinotimpunani. Ito-no o sabap yokoi miduvo kadapat pavalang om patarang dit a-ko piro laang ponong sid PCS, it ongo kohigangan dit antad sid porinta do British ko i kapaganan dit antad di koutatangan dit ongoKina di kakali mad monguripon dit ongoRungus ko mongusiba dit ongoulun sid himbaan om it ongobinatang. Minsanko tasantanid-tanid i tradisi dit ongobansa do mangasip sid Kinaringan om sumasi di kosipan sid dau do kiroon om kobudayaan, ino-no it otopot, iseso o puun om inantadon di kosipan om harapan tokou.

I tudukan koduvo, ino-no i kotongungan jawab kananganko i harta om tugas do PCS ponong di toun 2000 dot i PCS mogihim di kengkakatan kondiri kananganko i kosukupan om kawangan. Iri-ogi i gama mangahatul di gorija om it ongopiumpungan ko i vaza mongumbasih om mogkovosihan dit ongoulun dit osusa ko i nokotongkihal. Sabap i gulu ensanan it ongoulun sid binatang, nga nokelo di nunu- nopo i najadi sino, sampai alanta-no kavi it ongokobuatano dot ongoulun, ponong sid kavantango om korumaato, topot ong nokokristian, atag dot amu pazazad ko pavalang ong varo nokotohiang-no ko varo nakalandu-no. Tu ong Kristian amu monuli do karaatan om amu mongohondom di kinosilapan ong sukul oopus -no it ulun di kinolonduan dau dino. Ino dino mad hal dit amu oruhai poromut sampai monimban om mangatag.

Varo-po kotibangan-ku do mongumpug dit ongowarden dot asrama sampai mamung sid umpug dit anganak sid Titiu om sid Duisburg, om varo-po kursus di Kaum Wanita dit mokituduk dohon do nunu o harati i Minisavo ong Kristian. Gam varo-po umba dioti dot ino tudukan, nga pogili-po sid ongosumuni di tingkatan kotolu sampai kolimo sid Titiu. Tu ong osukod-no laid, mad otoliban i kogunaan di tudukan di iadino, ka dioti. Atag dot it ongomomodsuni kaharati dit atag o gama misavo,

supaya it onkob nohoturan di kosipan dot ulun Kristian.

Sid saralom do duvo minggu sid Bavang-gazo, minamung-oku sid ongotudukan dit onoguru om monuduk-po dot a-ko piro jaham. Na varo-po iso pangalaman, ino-no, Ontok dit adau minggu, varo sumambayang sid gorija PCS do sarap do pukul 8.30 dot anganak dot asrama o mangagazad sumambayang. Inglimo-oku otibang mamung sino, gulu-ko i panahon-ku sid ongokampong sid sodu do mamung sid a-ko piro piumpugan. Manjadi intolu-no do kodung nokosodia i piumpugan do mongining di khotbah do nopongo laid i liturgi isuhut di hoturan do PCS om minomoros-no i murid di tingkadan kolimo i mangagazad di liturgia dot, Sumodia tokou no t do mongining di tudukan dit adau diti, ka, nga mad aso sino it ulun di kitugas do mingkhotbah. Sid rongobon varo nokosokot i palan dit ongoulun di mingkothbah, topot aso sino it ulun diri. Mad ensanan i mato dit ongoulun, i kogumuai anganak sid asrama, nga sumirot sid dohon do minud-inud dot ioku mingkakat om mingkothbah. Mad aso kasangkut dohon dot sampai do mangamu oku. Ino pangalaman-ku dino nokosusa dohon, tu i kiroom-ku, okonko bai hiza dot sino oku o nakahajang ioti do iadino, inoi nga mad kakali amu miama i kotongungan jawab dit ongoulun di notugasan do poromot di Habal do Kovosihan, mad kakali it a-ko piro ongoulun sumuhut di dau do ginavo dit kadang- kadang ozi, om kadang-kadang nga pemozon di dau do tugas iadko it anak dot amu- po osukod.

Manjadi, nokouli-po sid Germani, minonurat-oku do laporan di hiza di sid Sabah-oku sampai minonurat-oku sid sokoviai i turu piumpugan dahai di minonukung-no di kopirinan di Kitab Momogun do tomod monorima kaseh sid dioti sid ngaran di PCS.

Korrektur bis hieher 31.12.09

Laporan di kinapanahan ko 25. Mei sampai 25. August 1990

Kopihiza di kinorikatan-ku sid Kudat, nobubal-no i Assembly Sabah om nahatul-no i piundian vagu ontok ko 16.-17. July. Siombo-nopo pengkakat-no it ongobondira om ongopapan di mongonsug dit razat do momili dit ongoparti. Manjadi nakamanang-no i PBS di 36 ogomon om i USNO nga 12 ogomon. Iri-ogi pinentahan-no i Menteri Besar Pairin Kitingan dot sumodia i porinta Sabah monukung dit ongougama do manahak do sumbangan bahagi dit ongopanambayangan dot amu osodiri Kristian, Silam ko i vokon.

Manjadi tinumimpuun i PCS do mongohuzas dit ongopanambayangan laid di mad sulap o kobuatano, i nengkakat-no do bai antad sid gama gotong royong do piumpugan. Kontraktor i poturug di bongunan vagu isuhut di kinopilian di EXKO. Ong i razat do piumpugan, sangpalad ko longon nga amu kopitabang pengkakat dinot ongogorija.

Na i dohon do gama, valu minggu-oku minonuduk dit ongomurid sid PLA . I kogumuai di murid nga osukod-no banal, vokon-no kisavo ko ulun di varo pangalaman do karaja sid sodu. Ioti kavi banalko onining dit ongotudukan om asapat-no humarati di dioti do tugas, ong muli-no vagu ioti sid kampong do mamung sid kazazadan di Habal do Kovosihan, ko lumombus sid toun koduvo do PLA. Ino-no i visi di PLA, toun-toun omungon i duvo nopod ponulung di mangagazad dit ongopiumpugan sid panambayangan.

Iri-ogi varo-po kursus dit ongosukod, ongononulung om guru sekolah Minggu sid a- ko piro puruvan. Minomurimon-oku dit agazo pitonidan sid ongopuruvan, i puruvan laid om i vagu. Suntuun: Sid kursus Pantai. Bai tolu jaham om intanga i panahon di Landrover antad sid Kudat dara. Nga norulun-no i jambatan di nagama di toun 1966 sid Konibungon, varo bai sambatang o kazu potimpadang sampai osusa-po mintana lumombus sid Pantai antad sid Sinukab. Na it ongoulun antad sid Paitan, di miningalud rumikot, suvai sumodop om korikot-ogi, tu alaid-nopo sid tanga rahat, gima nasak-no it olungan Pantai. Antad sid Puru Batu om Sugut, osomok dot limo nopod kinozuan ioti, tu nokovoza-no it ongosavo om anganak.

Sid saralom di kursus dino atalahas dot aso't ontok ong mamakai dit ongokertas kerja di nosodia-no laid sid Pusat kananganko i pastoral teologia om i hoturan sid piumpugan kanangan mangatag ong varo nakalandu ko varo kotongkihal om karanggal do undang-undang di gorija. Iti-no o sabap minogihim-okoi diri do kuran i Tudukan di Tuhan Yesus kadapat mangagazad dit ongopiumpugan vagu sid dioti do koposizon om koposizan, ontok sid ipat-ipat it onkob, i sid pialatan di minisavo om kuran mangahatul di kopitatabangan sid tanga do piumpugan. Iadko i gama di Yesus, i nakatarang sid Matius 4,23 sampai 9,38 o gama dahai diri miumpug sid Pantai.

Tanid-no ong i kursus sid Dandon. Sid station sino, varo lampu do karan sid gorija laid di banalko agazo, i nagama-no isuhut di sulap-stail, om i gorija vagu, it antad sid sumbangan do porinta. Varo a-ko piro tudukan, sinuhut dit ongokumpulan di midaialog di tema. Iri-ogi nokembulai it ongokosusaan sid daerah sino, ino-no, i porinta suvai manahak do katarangan do tana, ong varo tana di nobuka om natanaman- no laid. I harati, atag dot alangkas mananom do kabun, nizuw ko nunu-ka nopo. Topot i agrikultural suvai mamahagi do bibit, ong varo-no katarangan do tana. Iti-no o sabap, osusa do mogihim kondiri do bibit, gam minindamo-no it a-ko piro ulun dit agazo o ginavo momuka di dau do tana di pusat PCS do mogihim do 3000 bibit do nizuw bahagi it iso kampong. I minongoduat-oku do varo-ka sangkul ko aso, ino-no it ambat, aso-nopo, topot varo dangol di miuma do mongoluvang om mananom di nizuw, ka. Na ambato-ku nopo, ong bai dangol o pongoluvang bahagi mananom di nizuw, mad aso guna. Suvai osukup kagazo di luvang, supaya it onogamut dit opodok oruhai sumurut om momonu dit agazo i luvang, ino-no i harati, a-ko piro toun katanom i nizuw, nga monguva-no. Topot ong posuvang di bibit sid okubong i tana, labaan do hopod toun, kakali amu tantu monguva i nizuw dino.

Ino-no rontob, minsanko nokogili-no dot ombo it atag do mitatabang monulung dit ongoulun diri, mad iso nga aso katama mumbongut dot, mogihim tokou do 75 sangkul om 3000 bibit do nizuw, ka. (Topot ong i sumbangan do porinta bahagi dit ongorija vagu, talib-ko miuma i siin ong bahagi di pangamung-amung do ponodia nizuw om sangkul!)

Minsanko varo iso't ulun di minangakun do mongimbulai dara di 3000 bibit nizuw dot amu amahal o horogo. Rontob-nopo, mad iso nga aso pinosurut dit umba diri, gam varo boros antad sid EXKO: Ong monulung-okoi dit iso i kampong, tantu it ongokampong vokon nga sumusui-no mindamo om mokitulung. Mad ensanan it EXKO noponu-no do gama mangahatul dit ongokobongunan vagu antad sid sumbangan do Porinta..

I kursus sid Guomon bahagi di puruvan Tinangol, Langkon, Toburon nokosunu-no sid rinuvang di gorija vagu, i nokengkakat-no ontok sid ongovatu i retanko, It Anak Vagu om it ongoasu dau antad sid Linusuvon. Sino dino, varo-no laid panambayangan dit ongoRungus, nga i gorija sino mad tanda di manarang-nopo dot nakamanang-no i Habal do Kovosihan.

Nokouli-po sid Kudat, varo-po kursus bahagi dit ongomanaud om ongotukang masak dit ongoasrama, hiza do varo suti it ongosikul. Banalko avantangan-oku diri i tudukan di guru besar do Lok Yuk Kudat, ino-no i Stephen Yarangli, i minonuduk do kuran ot atag i gama mangagazad dit ongoginavo dit anganak. Amu-po kotolu toun nakatalib antad di hiza do varot a-ko piro ot anganak Momogun sumuvang di sikul Kina Lok Yuk, nga ong bianco, i guru besar do Lok Yuk, nga Momoguni di monuduk di vaza monunda dit ongosolompok vagu.

Bai i vulan Mei nopongo-ku-no i koreksi kentolu di Kitab Momogun. Nga ontokko August keso varo-no telepon antad sid Kuala Lumpur di minangahabal dot, Nopirin-no i Kitab Momogun, gam iso kopi nokokikirim-no kumaa sid Kudat, ka. Kakal-oku sinumodia muli, nokorikot-no i kopi dino sampai kadapat-oku patahak di **Kitab Momogun sid Ulion do PCS, i Masandu Majupi it adau ko 22 August** mihiza dot EXKO PCS.

I minuli-oku diri, minapit-oku-po sid Sharikat Kitab Malaysia om minonorima kaseh sid Pandita Ezra Loke bahagi di kinopirinan di Kitab dino. Nokouli-po, sinumamung-oku-no dit ulion di dohon do gorija Bishop Sorg om minanahak sid gorija-ku dot iso kopi di Kitab Momogun.

Turu minggu sid PCS ontokko 17 Mei sampai 5. July 1991.

Guluko i kinapanahan-ku vagu sid Sabah varo adau dot agazo bahagi di gorija Wuettemberg sid dohon do bandar Filderstadt. Ensanan i gorija nokodim do mongohormat dit Adau Mission om Ekumene isuhut di koubasan do toun-toun. Varo- po nokodim i duvo it ondu do PCS om i bishop do Tanzania do mamung om muhabal sid umpug dino. Ioti Kowoi, savo dit ulion do PCS om Rosia i savo di Ogodong minonuturan di kinosurutan do PCS om i kinosimbanan di razat Momogun, gima i Habal do Kovosihan di minanganavau dit ongokampong sid Sabah. Manjadi intanga i persembaan di piumpugan siri, niontok-no sid pustaka do PCS ponong di kopirinan dit a-ko piro ongobuuk iadko Kamus, Hoturan do boros Momogun, i Tangon do Rungus om a-ko piro panarangan di Kitab Laid om Kitab Vagu.

Nahatul-no laid i dohon do bahagi monuduk sid PLA, ino-no, apat jaham songminggu bahagi Usuran

do PCS toun keso om koduvo, apat jaham ugama Silam bahagi toun keso. Etika Kristian 3 jaham songminggu. Apat jaham Surat Rom sid toun koduvo om Teologia do Kitab 3 jaham songminggu. Na i gulu diri ong monuduk dit Usuran do gorija, a-nokosikul laid it ongomurid. I harati, i kiroon dioti kananganko i hiza di nakatalib sinumuhut di pongitungan do Momogun, ino-no antad di bianco mongiro ponong sid kodori. Kokiraai, sid vatas do Kumbatang hiza di toun 1956 kakali varo turu pogun di binatang Kumbatang, dot i pogun keso nga toun 1954 nohuzas-no, nga niturug-no i toun 1951. I pogun koduvo, nga 1951 < 1947, i kotolu 1947 < 1941 hiza do Mononjipun, i kaapat nga 1941 < 1936, i kolimo 1936 < 1933, i koonom nga 1933 < 1930 om i koturu, nga 1930 < 1928. Guluko ino pogun diri, mad iso nga aso-no kohondom-po do siombo ino kinengkakatan do binatang ko varo-po tanda di pogun iadko sombaris enggaton ko a-ko piro kouvaan iadko nangko ko mampalam ko kapok. I harati, mongiro do monulak dit ongotoun, antava ong ulun okiroon, nga iti bianco diti i Majimil, anak di Tuorong, i Tuorong anak di kuvo sampai alaid-nopoanak di aki Bantang, ka di kahandaman dit ongoulun.

Topot ong bianco, tu nokosikul-no it anganak misisingilo-no ioti do humarati dot usuran do pomogunan, nga mongiro-nopo ioti antad di Kinosinaan di Tuhan Yesus (AD 1-Anno Domini) iadko toun keso sampai bianco toun 1991. Rontob-nopo, minsanko nokening do varo porinta Rom hiza di Yesus om iri-ogi varo ongorinta vokon sid Europa om sid Kaling om Kina ko kuran it ongobansa do Europa minanansanganu dit ongopomogunan vokon do iadko koloni, mad aso tantu tudukan kananganko it inantadon om rikoton do Sabah ko i rurungan do Momogun om it ongoSama. Bai nokening-no sampai nokohondom it ongomurid dit ongotoun om ongopomogunan, supaya kajawap sid poriksaan, Topot mad aso guna bahagi di dau om dau do koposizan. Suvai nosodiri-no i kogunaan do mongohondom dit usuran ko it inantadon om nosodia-no do tumoguvang di kinosinaan di PCS antad sid ponginjilan di Basel Mission sid daerah Kudat. Sid kovian, ikid murid minonurat di dau dot usuran: Ioku om i PCS. Inot ongousuran dino kovongo-vongo dohon di nokouli-no, tu tasantanid o pangalaman dioti sumukod sampai nokosuvang-no sid PLA. It iso, hiza di mamung iosido sid asrama Duisburg, kakali ulun labus dot suvai alaid-laid sino, om katama ogi patarang dot okonko Kristian iosido. Iri-ogi sinumuvang iosido, gam iosido minangagazad di dau do kampong sid PCS iadko buka pintu iosido. Ko i vokon, kinumozou-no iosido dit anak vagu-po iosido, iri-ogi kumaraja sid kumpani do draiber iosido do bulldozer dot alaid-nopo mad matag-atag- no iosido gam sumuhut di piumpugan sampai minuli sid kampong dau om sumikul- ogi sid PLA.

Kananganko i tudukan Silam: I hiza di rumikot i Basel Mission sid Kudat, varo hoturan di British dot Kristian a-kavasa do mongonsug do Silam jumadi do Kristian. Tu varo piniupakatan laid di British om Arab di toun 1917: It ongosilam dot Arab tumabang di British mongorumpak di porinta Osman dit osinggazung-nopo di Germani rinumumpak di British. Iti-no o sabap i British minangakun dot moniag di kristian mission sid tanga dit Ongosilam. Banalko minongohodtol-no i Mutib Mustapha sid dahai missionari dot a-obuli do minsomok sid ongosama. Sabap ino, iokoi ongomissionari mad sino-no ko sinod Momogun o tugas-za. Minsanko mongimbulai ko mongusul sid ongopiumpugan di pitonidan do Silam om Kristian, nga nalazan-za no.

Suvai sid Kursus TEE di toun 1979 minindamo i Thu En Yu do monuduk-oku dinot usuran do Silam sampai minonurat-oku dot opodok o buuk di kingaran dot, **Anganak tokou di Ibrahim**. Sabap minsanko sid Europa om sid Germani, ogumu ot ongoulun do Silam nokentoron sampai kumaraja sid ongokilang, i gorija-ku minanahak sid dohon di tugas do monginsosok om manalahas dit usuran dino, antad di hiza di Parang Salib (1098 sampai 1450) om kuran i koporintaan do Silam sid Spaniol norunggal-no di toun 1492 sampai it ongosilam nagaratan-no sumuvang do Kristian ko napatai-no om nosunsub-no antad sori. Iti-no o nelaan-ku di kadapat ponsiat sid buuk dino om sid tudukan sid PLA. Iti-no it otopot, i Yesus retan-tokou dot iosido i puun do kopiondusan do riniba. Na i Silam momoros, i Silam nga it ugama do salam ko shalom. Minsanko i panangan di duvo kosipan mad miabali, topot antad di gama manarang dot isai i randavi om isai it amu nonong banal ko ombo i napalid, nokotimpuun-no i pioduhan di sampai miparang om misasana. Atarang-no sid Kitab om sid buuk Quran dot okonko i gama momuruvak o kiguna sid tinoguvangon do Kinoringan, inoi nga i vaza sumuhut di kenginan do Kinoringan (Matius 7,21), ko ong sid Qoran: Kinoringan minonodia dit a-ko piro ralan om vazaan di ponong sid Kinoringan. Suvai nokorikot it ulun sid dau sid Kinoringan om atalahas-ogi dot nokorikot iosido sid Kinoringan, ka.

Iti-no o sabap banalko kiguna dot it ongokristian do PCS mongitung dinot usul dino, minsanko i kodori banalko araat i kososizan do gorija ponong sid ongoulun di tanid ot ugama.

I hiza diri minomurimon-oku dot it upakat di PCS do mamakai di BM sid tudukan om sid khotbah mad amu nokonong. Mad i Momogun sinumusui di gama dit ongobansa sid Indonesia di kodung varo kemerdekaan Indonesia, niada dioti i dau om dau do boros do bai minamakai-po do bahasa Indonesia. Minsanko it ongokitab om ongobuuk do longoi, niada-no dioti diri, retanko bai Bahasa-po dot Indonesia o kiguna. Alaid-nopo om kaharati-ogi it ongoelo dot banalko a-nokonong inot upakat diri. Ka dioti, ino bahasa Indonesia mad bahasa dot utok. Topot it ongoboros vokon iadko Dayak, Bali, Pasundan, Batak om i duvo natus vokon o boros, nga boros do ginavo. Sid bahasa kadapat mongiro do siin ko manarang do teknik. Topot i hal do koginavaan om kopurimanan, bai sid boros dit idi om ama kadapat mamalang, ka dioti sampai minogihim-no vagu do minongukad-no dit ongobuuk di niada laid diri.

Biano diti om nokohondom-ogi it Ongorongus om Ongomomogun di tinungkusan antad sid ongomolohing om angaki om ongodu dot, ino-no i boros om i tradisi om i kobudayaan om kahandaman di mad titagak-no.... Kagi, ong biano, varo-po kopigogutan dit ongorodsit sid Silam, retanko i pongoretan Allah nga dang Silam, minsanko gulu di Muhammad, it ongokristian Arab minamakai laid dino ngaran bahagi do Kinoringan. Alaid-nopo mad mumpalad it a-ko piro ongoSilam dino pongoretan bahagi di harapan dioti dino, tu rumosi dot amu minaangani. Mad aso tinganan-po do pentalang sid dioti it inantadon di pongoretan dino, ino-no i Ibrahim o minangasip sid Elohim om ino pongoretan dino nasalin-no sid boros Arab dot Allah. Iti-no o sabap, lobipo oruhai do mantas dino kopigogutan, ong sid boros Momogun mamalang om pazazad di Habal do Kovosihan, okonko tumompik sid bahasa di retan dioti nga Bahasa Silam. Tu ino-no i kenginan di Sundu do Kinoringan antad sid Pentakosta: ipat-ipat i bansa mongining di Habal do Kovosihan sid dau do dila. (Usuran dit Ongorasul Fasal 2,1- 13)

Amu-po nokouli-oku, miniupakat-oku-po dit ongoasrama do kuran o katagan it ongoasrama hiza dot notutup-no i sumbangan di KNH antad sid Duisburg. Nokotiim- oku-po do tumabang mangahatul do kuran it ongovaig antad sid taap dit ongovalai kiguna bahagi dit asrama. Sabap i hiza diri banalko okudik o vaig antad sid paip do porinta, om ino vaig dino kagi amahal om osusa dumagang. Ong ahatul-no i vaig do taap, okurang i horogo do kakanan om inumon. Pengkaa dino minongumba-okoi-po do nunu o tugas-ku hiza do miguli vagu sid Sabah ontok di vulan Disember. Sabap kovian di toun 1991 mad mavi-no i karaja-ku sid gorija Wuerttemberg, tu notuluk-no i hiza-ku kumaraja sampai kotimpunaan i pension-ku dino. Kodung nening-no di EXKO i iadino, minindamo-no ioti do koguli-oku vagu hiza do kotimpunaan di sikul sid ko 2 Disember do tumabang sid PLA om monodia-po dot ongobuuk vokon bahagi di kopirinan.

24. November 1991 sampai 27. Februari 1992 sid Sabah

Ontok di panggah dino sinumodia-oku monuduk sid PLA om monodia dit ongobuuk bahagi kopimirinan sid TEP Kudat. Tanid mantodko ino, minongimbulai-oku do kursus kiriman bahagi isai-nopo it engin pamung do keloo, kananganko i kosipan om i sains ko korumbulan. Labaan do 450 ongoulun minongudal-no di kursus dino. Hiza di minuli-oku, varo hatas di nopongo-no i bahagi keso di kursus dino sampai nokotimpun di bahagi koduvo. Bai sid tohudi atalahas dot ong aso't ulun sid Pusat kitanggung jawab bahagi di gama momorisa dit ongotimpa sampai momongo do mongirim om mongontupat di katagan dino, mad aso panangan ino dino.

Ino hiza dino varo ongohabal antad sid president do Basel Mission. I kenginan dau monimban di vaza miupakat i Basel Mission om i PCS, ino-no, kavi-avi it ongorija di nakasako sid Basel Mission ponong sid Asia Selatan, jumadi dot iso rombongan dit osinggazung. Antad dinot hopod gorija varo toun-toun opili i kabang dioti ponong sid Basel Mission om tolingo di mongining dit onsug do Basel Mission do tomod polombus sid ongorija vokon.

Gam varo surat do kodim di president do Basel Mission sid kumpulan sid Indonesia do tomod miupakat om manarang di vaza vagu. Kasalaan-nopo, i surat do kodim suvai nokorikot sid Kudat i hiza do notoliban i kumpulan dino. Mad ogumu o gama di president do Basel Mission do bai mangahatul-nopo dit ongohoturan do tomod mangatag. Antad diri okurang i tonggungan di Basel Mission ponong sid PCS. Minsanko minongovit-oku dino kobuatano dino sid sinoda do Basel

Mission, banalko minogoduw i president dohon om i Sibal Zimmermann, gima amu tinumorima-okoi dino vaza vagu dot i komunikasi di Basel Mission om i PCS mapit-po laid sid Hongkong ko sid wakil sid Indonesia.

Sid Sabah-oku vagu ko 22 June sampai 18. September 1992

Ontok di kinapanahan-ku dino, oruhai-ogi tumulud i tarabang antad sid Frankfurt turus sid KL om iri-ogi sid KK do bai 15 jaham sid terebang mogom om modop. Sampai i hiza diri vokon-no sampai intolu ko ingapat mapit-apit i terebang sid tanga ralan do tomod manganu dot minyak dot osusa it ongoponumpang lumabus om miguli vagu sid terebang.

Bai i hiza diri di nopension-ku, varo koriatan om kosukupu-ku do dumagang do notebook om pomirinan, supaya ombo i nosurat, turus katahu sampai oruhai momirin om pobuuk. I harati, oruhai monodia dit ongotudukan bahagi dit ongomurid sid PLA, supaya ioti varo surat om kopi di tudukan om soalan, gam kadapat do monodia di master bahagi momirin do limo natus kaping bahagi di sokovia it ongoponulung om Manaud Puruvan ko it onoguru sekolah minggu.

Salaaid-oku sino, minonuduk-oku do 12 jaham songminggu sid PLA. Varo-po vagu kursus dit ongopekerja penoh om it ongoponulung sid Batu Dua ontok ko 13.-17. July om varo-po kotibangan do miupakat di TEP Kudat, i minomirin laid dit ongobuuk do **Longoi om i Liturgi** sampai i Hoturan sumambayang, i kopirinan di **duvo Kamus**, supaya osodia ino dino bahagi di sinoda ontok di vulan August. Kagi i EXKO om it ulion minonuhu dohoh do mangahatul di kopomilian dit EXKO om ulion vagu

Na ong sid tudukan sid PLA, mad varo kapaganan, tu varo murid di sizam-no toun nokosikul om varo-po murid dit a-insan kosikul. Minamasa-okoi dit a-ko piro bahagi di Kitab iadko i surat di Paulus sid Rom om surat di Yakub, ino duvo surat di mad amu enizo o panarangan. Sabap ong i Paulus apatong o boros kananganko i kogunaan do kosipan. Topot ong i Yakub, retanko suvai i gama sumuhut di kenginan do Kinoringan o kiontok. Minamasa-okoi-po di nabi Amos om Yesaia sampai minozo-okoi dit usuran di bansa dot Israel antad sid di Ibrahim sampai i kinorongazan di kuta Yerusalim. Ontok dit Usuran di gorija sompomogunan, minonimpuun-okoi sid tuturan do Pentakosta, ino kinosinaan di gorija sampai i kotimpuunan do mission dot onogorija protestant. Bahagi dit ongosapat milo minonuduk-oku-po do duvo jaham songminggu di boros Inggeris. Sabap it ongoulun di nokopisingilo laid dot Inggeris sid sikul, banalko apaganan dioti sumusui di boros Inggeris. Ino-no i kapaganan dino, kuran-ka kadapat i guru manarang di boros Inggeris sid Bahasa, sabap sid BM aso't panarangan di hal dot article ko it ongohiza do verb. Topot i boros Momogun mamakai dot article om it ongohiza iadko i boros Inggeris, ong sukul varo guru di nokelo manarang om popirompok di boros Inggeris om Momogun. Minsanko sid panarangan di iadino banalko kiguna i notebook om o pomirinan (printer). Kagi, okonko bai it ongomurid kadapat mamakai dinot ongoapanangan, inoi nga kadapat-po patahak sid isai-nopo it engin mongoguna.

90 tumpuk kopitatabangan minozo di kursus ko 13 sampai 17 July. Hiza di sumambayang-okoi di sasarap om sodop, minisingilo-okoi dot a-ko piro longoi vagu antad sid Ekumene. Iri-ogi varo kavi-avi 19 tudukan kananganko i tema Sumiombo-ko-ka PCS? Kodung nokogili-no sid umpug it toriso-iso tudukan, inovit-no ino sid ongorombongan dit opodok, supaya i hasil dit ongodialog om piupakatan kopiamung vagu sid umpug dot agazo. Gam ino hasil dino nopirin-no dot buuk it amu-po nehas- it umpug, supaya ovit-no sid ongopiumpungan om puruvan.

Kananganko i sinoda, varo nosodia laid i pongodumpanan di perlembagaan vagu do PCS, tu mad atalahas-no dot i perlembaan di toun 1966 amu miuma bahagi di hiza vagu. I gulu, ipat i piumpungan nga varo wakil sid sinoda. Topot biano, tu labaan do duvo natus om limo nopod piumpungan, mad oholian kogumu it ongowakil. Kagi varo piumpungan di bai hopod om limo kazu, vokon-no o piumpungan ong varo duvo ko tolu natus kinozuvan ot ulun. Iti-no o sabap dot suvai i puruvan o monodiri om momili dit ongowakil sid sinoda, ka di sadangan.

Ino-no i tema di sinoda dino: Posunuon-no i kenginan-nu (i pomintaan di Tuhan Yesus), ino-no Misi, piniizaan om kopiondusan. Ino tema dino, nogili-no laid sid Konvensyen di Solumpak vagu PCS sid Tinutudan, hiza di suti do sikul. Napanggih-no i pandita Poong do manahak di khotbah di monimpuun di sinoda, do tigogi, varo minongontok dau, ino-no i Asandul Mojihim, i manager do Bank sid KK. Iosido minamalang dit a-ko piro soalan om tugas dit openting sid PCS. Sid kopupusan di sinoda,

nopili-no it ulion, ino-no i Henri Ogodong Dangki om i Morunsai i kumoduvo dau.
Na i wakil di Gereja Evangelis Kalimantan minonginsuhat di PCS bahagi di sinoda sampai minangalapor-no dot ino panggil di president do Basel Mission di mad mongompus di Gwatt konsultasi sid Jakarta amu osunuan, tu amu nokorikot it a-ko piro it ongowakil, gima amu-po nokorikot i panggil diri. Nening-po di sinoda ino dino, minongonsug-no it umpug do mamanggil di president do Basel Mission sid Kudat, supaya kadapat iosido mongintutun di PCS.
Ino hiza dino avalang-no sid a-ko piro boros dot ino-no it apagon miupakat dit ongororija ponong sid Asia Selatan. Ioti kavi varo tradisi dot a-ko piro nopod ko hatas toun sampai oubas ioti monodia koduruk om onibak di dau do kenginan om panangan. Topot ong sid PCS, tu kakali omulok, suvai ouog-nopo banal it ongo hal, iri-ogi kakali amu humago pavalang di kenginan om tomodon ko i poniagan do nunu nopo o hal. Ino-no i mad kokuguzan di PCS ong didino. Topot, ong varo pongoretan dot bianco i PCS om it ongororija vokon sampai i Basel Mission nga partner ioti, ino-no o harati, enizo o kuasa om enizo o pongitungan om kovosihan dot aso gama mongodsit ko mangaladtak ko posimozo do koruhang, mad atag dot i vokon minud di PCS do mingkosup ioti ongororija vokon dot amu atag do mangamalu di PCS ong oboloti dara.
Hiza di tinomongkizad-oku sid Kudat, miirung-nopo i duvo nopod ongekob di Pusat PCS dot tomod monginsuhat dohon di muli-oku sid pomogunan-ku adau ko 18. September.

Tolu-no vulan vagu 11. Januari sampai ka- 4 April 1993 sid Sabah, isuhut di kodim di PCS.
Ino kinapanahan-ku dino, nga i koduvo nopod do kumaa sid Sabah. It insan-oku kapanau diri i toun 1955, nga onom minggu-oku sid tanga ralan. Ong bianco diti, i kouliau-ku, nga onom nopod jaham, tu duvo i terebang di nokosodia dara dot udanon, nga a-kotulud, tu varo mad osusa mangatag.

Sid saralom dino tolu vulan ino, bai i tudukan sid PLA o tugas-ku om i gama monodia vagu dot ongobuuk bahagi di kopirinan, iadko i Tangon do Rungus. I guru antad sid Bonduk Jaslin Okirim minongolukis-no dot a-ko piro gambar di kiontok dit ongotangon dino. (Ong toun 2009 nisuvang-no ino buuk sid facebook, supaya oruhai download isai-nopo it engin mamakai. Kodung nokembulai sid facebook, minangahabal-no it iso dot, nokodownload-oku sampai sodop, sodop mamasa-oku di tangon dino sid anak-ku gulu di modop iosido, ka dau). Minomongo-oku di tudukan dit a-ko piro bahagi di Kitab om posuvang dinot tudukan sid ongobuuk di Panarangan di Kitab.
Antad di sumbangan bahagi dit ongobuuk do PCS dit antad sid persembaan do gorija Wuerttemberg di 1991 diri varo koriatan do dumagang do komputer bahagi di PCS. Iri-ogi kopirin-no i palan dit ongotudukan do minggu sid TEP dot ikid 500 kopi bahagi dit ongoponulung om Manaud Puruvan dot ipat-ipat tanga toun. Ong i sokovia i ongotudukan-ku sid PLA om i kursus di kerja penoh do PCS humiza di Alfitri, nga isuvang-no sid ongobuuk di pinirin di TEP bahagi di pustaka do PCS. Antad sid persambaan di toun 1991 inanu-no i horogo di kopomirinan diri. Manjadi, nohoturanan-no dot ong varo dumagang dit ongobuuk dino, i horogo iuli sid puku di Akaun Pustaka do PCS.

Ino-no i nopirin it **ongobuuk diri i toun 1993**,

Panarangan di Kitab Laid: Tafsiran di Buuk Kinotimpunaan sampai 2.Raja, Nabi Yesaya, Amos om Mikha

Panarangan di Kitab Vagu Bahagi Keso: i panarangan dit ongobuuk di Kitab Vagu om i panarangan di Markus, i Tudukan di Yesus sid Burul Matius 5-7, i Tafsiran di urat di Paulus sid Rum om Galatia, i surat di Yakub

Panarangan di Kitab Vagu Bahagi koduvo: Injil di Lukas, 1. Tesalonika, Efesus om i. Timotius Usuran do Gorija Sompomogunan om Usuran do Gorija Protestan sid Sabah

Surat keliling sid ongokoubasan sid Europe ontok dit Advent 1993 (solinan antad sid German) (Sid Sabah-oku antad sid 15. 11.1993 sampai 12. 2.1994)

7.12.1993: Tolu-ogi minggu-oku sid Kudat, ino tampat do varo a-ko piro ulun dahai momoros, retanko i Kudat nga pomogunan om intoronon di Forschner, ka dioti. Ino pamarasan dino amu nokonong banal, tu ong sid Momogun, bai sino i pomogunan do varo niginit it inimpusadan dau. Ino-no it otopot, ong Kristian mad tanid o kopurimanan do siombo i dau do pomogunan. Kagi ong asarok-oku sid Sabah, ino dino, nga kenginan di PCS om it ongokristian do PCS di mongogorot

dohon do miguguli-guli mamung om tumabang di PCS sid kosukadan dau. Kagi, ong biano obebaskan-oku dot amu-oku-po kagavul ko akaza dit ongotugas sid goreja sid Germani, inoi nga ensanan ponong sid PCS kadapat-oku mamakai di dohon do keloo om goos, isuhut di kakal-oku osihat. Sid saralom di tolu minggu di katalib, nakamung-oku sid hopod sambayang dit ongopiumpungan do banalko tanid mantadko sid Germani. Tu sid dahai, nga osogit om otuvong i pomogunan om varo salji om ais. Topot ong siti, tigogi asadapan om osuvaban manampangi om iri-ogi alasu-no banal do labaan do 35 degree. Ogolivong dikou dati ong mongitung dot Adau do Kristmas, hiza do alasu banal. Konihab, Adau Advent, ino-no i tuturan do kuran i Yesus sinumuvang sid Yerusalim do mako-sako do keledai. Varo suntuan dino kinosuvangan do iadko raja iosido, tu i raja Malaysia minagandaha-nopo sid Sabah dit a-ko piro adau katalib nga minamakai do helikopter. Kodung kotuhun sid tana, varo nilapik-no i tikam dot aragang, okonko i papa do nizuw ko it ongosarong dit ongondou iadko sid Yerusalim diri. I hopod toun katalib, varo-no umba laid di raja Malaysia diri do rumikot sid Sabah, do tigogi nokembali-no i habal dot i raja dino amu obuli do rumikot sid Sabah, tu i dau do kuasa bai sid ongosultanat do Semenanjung, okonko sampai sid Sabah om Sarawak. Ino hiza diri, varo-no laid nagama dot a-ko piro ongopintu di mad tanda do kamanangan sid ongoalun-alun sid penerbangan do KK, nga a-noguna iri, topot kakali sinod alun-alun mad pogun dit a-insan-no kapakai.

I mamung-oku sid ongopiumpungan ontok di minggu, amu-oku pentahan laid do rumikot sid dioti. Na konihab, ontok dit koduvo Advent, minamakai-no i pengkhotbah dino kinorikatan , tu ka dau, isai-nopo it amu nokoumpug biano, amu kasamung dit ombuvoi di nokorikot siti, ino-no i Amai Forscher. Pengkaa dino i korikatan di Yesus sid di tokou, amu nintahan laid, tigogi, sino-no i Tuhan Yesus. Suvai osodia tokou-nopo do minsamung di Yesuska, ka dau.

Na sid ipat ipat i piumpungan, varo choir dot anganak om it kaum wanita om it ongolongoi, nga amu osusa do varo-po uunizon, ologod it ongodolou pavalang di harati dit ongolongoi. Inot ongolongoi kakali mamakai dot uni antad sid Barat. Topot i harati di longoi mamalang dit ongovaza do mangasip sid boros Momogun. Vagu-po varo-po ongolagu kondiri di sumusui dit ongolagu di kodori. I mula-mula o mission, a-koho it ongosukod do mamakai dinot ongolagu laid diri, to retanko ino lagu dino nga mad lagu di bobolizan bahagi mongohormat ko mongodim dit ongorogon. Na ino buuk Longoi di mula-mula bai duvo nopod longoi, okonko impiro-piro suputai do longoi vagu om pinirin-no sid pustaka di PCS. Topot ong biano, pinirin banal sid TEP om varo-po nakamung do longoi do ekumene antad sid Kina, Afrika, om Latin Amerika. Na i kogumuai dit ongokristian amu-no osusa do kumavid di buuk do longoi ko it ongozabur di nokosiat-no sid buuk dino, tu mad ahandaman-no kavi it ongolongoi om i Zabur dit papakazon sid sambayang.

Amu oruhai i kosurutan di PCS biano. Labaan do soribu ahli o nokezon sid Semenanjung do kumaraja ko sumikul sid universiti ko varo sojal. Vokon-no bai mad kuli dot opodok o gaji. Vokon-no varo pangkat sid bank ko administrasi. Pengkaa dino sid Kota Kinabalu, it ibu kota do Sabah, varo-no vagu labaan do soribu ahli PCS do varo karaja om valai sampai kisavo om kianak sino. Ioti nga tumiim do minsamung do sumambayang om i PCS nokotimpun do mangahatul do varo-po pandita di monunda dioti. Sid STS sid KK varo onom murid do teologia. Ioti kadapat monulung sid ongopiumpungan sino.

I hiza di nopili-no it ulion vagu di PCS, ino-no i Hendry Ogodong Dangki, iosido kakali kumaraja sid Rumah Sakit Kudat sampai i tugas sid PCS mad suka rela. Iosido diri banalko agazo o tugas do monunda om monorundakai dit ongoulun di kisakit om mokiubat sino. Alaid-nopo mad varo kiroon dot amu kovit iosido di duvo i tugas sid Rumah Sakit om sid PCS. Iti-no o sabap ong biano, kerja penoh iosido sid PCS, nga i PCS osusa do mongimbulai di dau do balanja. Na ino-no i dohon dot ikorosi, ong i kinotimpunan do PCS, i kogumuo do gama om hoturan om kopitatabangan, nga suka rela, okonko iadko gumaji. Bai hiza di kouli ioti murid teologia antad sid Trinita do Singapura, iri-ogi nokembali do hoturan do pongogojian dioti isuhut di sikul dit ongoulun. I hiza diri, tigogi i bai kopongo sumikul, nga agazo i dau do balanja mantadko it ulion di kisavo om a-ko piro anak, tu it ulion, a-insan kosikul do sikul koubasan. Antad diri isai-nopo i kumaraja sid PCS, abalanjaan isuhut di dau do sikul. Topot ong i kogumuai dit ongoulun Kristian di PCS, kakali mintoron om masi sid kampong antad sid gama mananom do parai ko nizuw ko manaud do manuk om vogok. Amu miuna inot ongohasil om i koposizon dioti dino do pensukup om poponu di kawangan do PCS bahagi dit

ongogaji di kogumuai di manaud puruvan om it ongopotugas vokon.

Manjadi bai ino a-ko piro ot pangalaman-ku siti hiza di Advent o vaza-ku manansalamat dikou om pavalang sid dikou di dohon do kopurimanan didino dit osodu-oku antad sid dikou mongohormat dit Adau di Kinosinaan di Tuhan Yesus. Pivavasih-kou diti, i T.Forschner

Nokouli-oku-po sid Germani ontok-ko 12 Februari 1994, minamung-oku sid **sinoda do Basel**

Mission om minangalapor do kuran i hasil di piundian sid Sabah om-i-po kosungguvo di kosurutan di PCS sid saralom di Gwatt-Prozess. Sabap varo kopurimanan di PCS do mad nalazan-no i PCS sid saralom dit ongupakat di **Gwatt sid Basel Mission**.

Ino hiza dino varo iso anak Sabah di sumikul sid universiti sid England nga minagandaha sid dahai ontok di suti di sikul dau. Nokouli-po vagu sid England, **nokopunovot-no i savo-ku**, tu naratu-i sid tukad sampai novunusan-no iosido dit a-ko piro tadau. Alaid- nopo, nobuka-no it ulu dau sid rumah sakit, tu pedu di raha di noumpug sino di mad minongorongoi dit utok dau. Apat vulan iosido sid rumah sakit om nokouli-ogi sid valai do bai ngaran-po-ko kapanau om amu kobongut dot avalang o dolou.

I kakali ahali iosido sid rumah sakit, mad mongohondom-oku dot hiza di kinulian-ku mozo di tarabang diri, varo opurimanan-ku do mad varo hal dit amu atag pemozoon. I minokiporisa-oku di dokutol, pahago iosido dohon sid rumah sakit do mokitobuk, tu i boros dau, varo kanser dit osusa do pedu koduruk. Notobukan-po om mad nolingasan-oku no vagu, varo pongobatan di tomod pedu do kanser. I mulu-mula, varo kopurimanan-ku do mad kiguna inot ubat dino, dot i toun vagu, hiza dot varo umba do mamung sid rombongan do Basel magandaha sid PCS, atalahas-no dot nogulian-no i kanser om a-milo-milo mokitobuk vagu. Minsanko nahatul-no laid dot it anganak-za monunda di Inai hiza di koling sid Sabah, amu nokosunu i panau- ku dino.

Suvai i toun **1996** om minoriat om ginumoos-oku vagu do **magandaha vagu sid Sabah**. Kakali varo kodim di PCS do mamung om tumabang dit ongokitugas sid PCS sampai pempongo dit umba dit ongobuuk.

Na sid tanga ralan kumaa sid Kudat nemot-ku-no i kuran i porinta moniim mangatag om monulid om mangarantag dit alun-alun. Ong sid Batu Dua, nosimbanan-no i valai laid dot upis di Pusat PCS. Ipat-ipat it opis dit ongopotugas do PCS varo aircon om i sid soribau, mad avantang o buatan di valai laid diri, tu nasaat-no om varo-po ongotanom do bunga. Bai hiza di miirung di mitongkizad muli, it ongekob di pongumpugan mad garangan do nizuw om gata, tu nopotut-no i karan. Oholian kotutup it intoronon dot aso tinganan pedu di kolosuo sid ongekob dino.

I sumambayang do minggu sid Batu dua, labaan do hopod kurita nokorikot sid Batu dua do patod dit ongoulun sumambayang sampai opusok-no i gorija. Varo a-ko piro choir di misusuhut mindolongoi, tanda dot ahatul-no i piumpugan sid Kudat. It noumpug sino antad sid ongoongkob dit ulun di gumaji sid Kudat, vokon sid porinta, sid ongupis om ongokilang ko kadai om i-po hinotusan it anganak dit tolu asrama Duisburg, Titiu om Binatang.

Osomok di kinulian-ku, ontok ko di adau di Kinendakadan di Tuhan Yesus sid surga, minsanko adau dit okonko hari Raya, varo-no vagu miniuumpug hiza do sodop do labaan dot apat natus kavi-avi sampai minongohormat di poginakanan di Tuhan Yesus. Pengkaa dino varo pangalaman sid piumpugan sid KK do miniuumpug-no it ulun sid rinantai kotolu dot upis dit agazo nga labaan do duvo jaham-okoi sino miovoli-voli mindolongoi, minta dua, mongining do tuturan antad sid Kitab ko varo- po kososizan dit a-kopiro ongokoruhang kanangan-ko i dau do pangalaman om i kosipan dau. I noumpug sino, ulun di mintoron sid KK. Varo-po nakamung molohing di minagandaha sid anak dau. I harati, minsanko nakazazad-no sid tongkop Sabah, kakali kohondom it ongoulun do miuumpug minsamung do mongoguna do Kiningan om mogihim do kengkakatan do piumpugan do PCS sid tempat vagu.

Insan-po vagu **sid tanga do PCS ontok di Mei 1997 (9.5.-9.6.1997)**, tu keso, panggil di PCS om varo koriatan dot i Inai nokosuvang sid valai di monorundakai dit ongoulun dit okugui sid saralom di kinolingan-ku.

Na sid saralom dinot apat minggu minamung-oku sid kursus dit ongomanaud puruvan om tumpuk kopitabangan i sid Bavang Gazo. Labaan do turu nopod nokorikot do minongining di tudukan om

panarangan di surat di Paulus pakaa sid piumpugan dot Efesus. Ong i dohon do tudukan inlimo-oku dot varo sangjaham intanga o nahatul bahagi di panarangan-ku. Antad di surat di Paulus di nokotoguvang dit ongosoalan sid piumpugan dot Efesus, kadapat-oku pavalang dot ombo it openting sid tanga do PCS, kananganko it ongomangahatul do piumpugan om i vaza dioti posuntu di kosipan om it atag o bahazan ko i hal dot ongakob om i minisavo.

Na sid ongotudukan dit ongapandita di PCS di nokosikul-no sid Malang om STS sid Kota Kinabalu, ino-no ot avangaan-ku, Mad bai mongimbulit ioti di tudukan om “kertas kerja” di nening-no sid seminar dau do iadko ombolog dit elo sumusui di boros do riniba. Okudik, nga amu popionong ioti di tudukan sid ongoulun di noumpug mongining. I kogumuai dioti okonko nokosikul do teologia tinggi iadko ioti dino sampai amu kengkosup di panangan di pinarangan dioti dino. I sala satu, ino-no seminar dioti minonuduk sid BM, sampai i gama polombus di tudukan, nga BM. Topot ong it ongoulun sid kampong a-kaharati dit ongoaralom o pongoretan. Topot i tugas poromot di Habal do Kovosihan sid ongotumpukan, nga sid dila dit ongomolohing do kampong. Ino-no o dinuat-ku, kuran mamakai it ongotumpuk dino tudukan dit bai teori om polombus sid kampong dinot ongotumpukan di teologia i sid Bahasa Malayu.

It iso pandita, i nokosikul-no sid STS, varo tugas om tema do Teologia Pedesaan. I minonuduk iosido dino tema, tumimpuan iosido do mangamalazu, dot alaid-nopo varo kopurimanan dau dot mad ogolivong i mogning. Iri-ogi minonimban iosido sid Momogun om mengkod-no mozo di surat dau, nga kakali amu kembulai i panangan di tudukan dau dino. Sid saralom di panarangan dau, minongusul-po iosido do varo pandita om Professor do Teologia antad sid Jipun di minongoimbuli di **Teologia Kerbau** di miabal di teologia pedesaan, nga kakali amu atalahas dot nunu ino teologia Pedesaan om nunu i kogunaan dino sid tanga do PCS om sid ongotumpukan sid kampong. Alaid-nopo tumiim-oku do paharati dino teologia di Kozuko Koyama di nakatarang-oku-no laid sid tanid o kurusus diri.

Ino-no: I Kosuko Koyama nga missionari sid Thailand, nga i pinahabal iosido di Habal do Kovosihan sid bandar, sinumuhut iosido di koubasan do teologia sid dau do pomogunan. Alaid-nopo, minomurimon iosido dot it ongoulun mukabun mangaranau mad amu mongining sid dau do tudukan, gam rumudop i mato mad ohuzan om tiadopon ko modop banal ioti kavi dino. Na i minonginsosok-no iosido di sabap dot mad aso timpa dit ulun sid umpug dino, varo pongitungan dot osuhul mongimpa-oku do siombo banal it intoronon dinot ongoulun om nunu o gagamaon dioti. Amu songkuro nelaan-no dau dot aso alun-alun ko ralan rumikot sid kampong dioti dit a-ko piro jaham kosodu. Suvai sid ongotumbun sid pialatan dit ongoranahon kadapat do tasanglaang-laang mamananau dot ontupat, supaya amu kotongkihal om rumatu sid vaig om butak. Nokorikot-po sino, nemot-no it ongoulun di mangagazad sid ongoranahon do kerabau di manarik di radu ko lukso. Asadapan-nopo i komunikasi di mukabun om i kerebau bai a-ko piro pongoretan di boros do kerbau, ino-no hui om hot ko oha om i iadino, ino-no i pamarasan di monuduk di kerebau do mamananau ponong sid gibang ko vanan ko mintoron om lumombus vagu mamananau. Antad dino pangalaman dino minonimban i pandita di dau do gama tumoguvang dit ongoulun mukabun.

Keso, iosido-no o pavalu di tempat sumambayang sid kampong. Iri-ogi iosido osusa do lumaang mintana sid timbun do ranahon kumaa sid kampong dot osidangan iosido dot adau sampai umasan-no laid di korikot iosido sid kampong. Manjadi minsanko netung-no laid om nosodia i tudukan dau ontok i kakali iosido sid valai dau di kiairkon, sid tanga ralan minongimbulit iosido sid ginavo di tudukan dau do murung-burung dot, Imatai-no om hondomo-no banal dot it ongoulun mukabun, bai kerebau o koruhang dot asadapan. Kadan-no olingan ino dino hiza do poromot sid dioti i kovosihan do Kinoringan, ka di murung-burung iosido sid tanga ralan. Suvai nokorikot, i dila dau pahabal di tuturan di Tuhan Yesus di iadko nokorikot-no sid kampong dino, nga banalnoko mongining i piumpugan sino dino. Sabap nening-no ioti di dioti do tuturan om kovosihan do Kinoringan.

Natarang-ku-po i iadino, minangamung-oku-po dot, ong engin tokou do mongohondom dino teologia dino, varot oruhai o vaza mongohondom, ino-no: Kozuko Koyama, bai kerebau o koruhang dit ulun mukabun, kanto di tokou mad longoi om pongoretan dit oruhai kohondom, kangku.

Nopongo-ku-po ino, varo iso tumpuk di labaan do 35 toun ponulung, nga a-insan kosikul. I boros dau, Imatai-no, Sid ongotuturan di Tuhan Yesus kembulai do kuran i Yesus tumanga dit ongoulun

mukabun sampai manarang di Habal do Kovosihan sid kobuatano sid kampong om sid ongokosusaan dit ongoulun sino. Iti-no o sabap i di tokou do gama pavalang di kovosihan do Kinoringan, oontupat tokou banal do siombo i gama tokou pazazad om pembulai di samod do Kinoringan

Om it ulun di notugasan do manarang di teologia pedesaan diri nga minangakun- no dot sampai bianco, amu-po nakaharati iosido di tinomod om panangan do mangarait di teologia dino teologia kerebau, ka dau, om vokon-no o minangamung-no dot, minsanko iokoi, nga bianco-ogi kaharati dino pongoretan pedesaan, ka dioti dino. I nakatarang-po ino dino, minongitung-oku-po dot osusa pamung do popiontupat dit ongotumpuk dot, Imatai dikou, minsanko sid ongokampong varo tradisi om karja iadko i kodori, nga tigogi mad orunggal-no i razat bianco dot it ongosolumpak vagu tumanid ko mantad di vaza om tradisi laid. Atarik-no it ongoginavo dit ongsuni vagu sid kolunduan om hal do ekonomi om kosurutan om kosinangan i sid tanga do ibu kuta ko bandar om i-po komojuan di sambahagi do razat. I pomogunan Malaysia mongitung om mongumba dot monoruntud dit ongobansa vokon sid ekonomi om kolunduan om i kasavato di kobongunan ko penerbangan om ibu kuta vagu, retanko i Malaysia bianco minongingkosup di komojuan do riniba, nga rumbul kohopod om onom bianco sid sokovia i it ongobansa do riniba. Iti-no o sabap osusa tokou monguog om minta dua, supaya varo vaza minsomok sid ginavo dit ongosolumpak vagu sid gama poromut sid dioti di kenginan di Tuhan Yesus popiandus om posinang di sokovia i riniba om sumodia pavalang sid ongopiumpungan sid ongokampong, do kuran i Tuhan Yesus posuntu sid di tokou dit atag o gama mikokoruhang om monunda om monulung dit okugui, kangku.

Na i sodop diri varo-po program, ino-no mongimot dot a-ko piro slides do mamakai do pangagambaran (projektor) Bai nokembulai-no it a-ko piro gambar di manarang di gorija sompomoungan, ino-no i gama di World Council of Churches (WCC), tigogi, minisok-no i lampu sampai norungoi-no banal o projektor, ino-no i kaapat projektor di PCS. (I hiza diri aso-po vaza vokon do pembulai do gambar sid rinding) Impiro-piro no pongovit-oku do projektor bahagi di PCS, mad amu atahan sid alasu o pomogunan.... I projektor keso i novit-ku i toun 1956, kakali minamakai do lampu pomp, tu aso-po ongokaran sid ongokampong.

Duvo-po i kopisomungan-ku iamung-ku siti, ino-no keso, i **minagandaha-oku sid Vingolon**. Nokopiupakat-okoi di Osingko dot iosido patod dohon sid kampong Vingolon ontok dit adau do minggu vagu. I minapit-oku sid badi sid Kudat ontok do hari enam, varo a-ko piro ongondu tinumoronong sid dohon om tinumabi dohon, i boros dioti. O Tuan, alaid om nokopimot-ogi dikau, ka dioti do mad osinang-no do nakasamung dohon. Nening-ku-po dot antad sid Vingolon ioti, minomoros-oku dot, varo't umba-ku do rumikot sid dikou suvab dot i Osingko kumuruhang dohon, kangku. Mad ohigak ioti di nokening di boros dino, do susuvab-po, minozo-oku di Osingko kumaa sid Vingolon. Rontob-nopo, okonko sid timpak do burul i gorija dioti iadko it andaman-ku, tu sino nakapamerkat-oku do minisavo di toun 1965. Iri diri bai insan-oku kakaa sid Vingolon, tu i hiza diri i Vingolon nokosuvang sid tugas dioti koruhang-ku sid Tinangol. Ong bianco apansung-no banal rumuhuk i alun-alun dot i ralan dino mad tukad, gima amu-po novotuvan.. Nokosondot-po sid konopuan, iri-ogi varo ompulongon sid tanga dit ongosulap dot sid timpak dino i gorija dioti. Nokorikot-po sid gorija, amu songkuro noponu i gorija dioti dot i ponulung di minangagazad di sambayang, nga ondu di nokokursus-no sid Bavang Gazo. Mad mongo-vongo-oku tu ahatul-no i gama dioti sumambayang do varo choir dit anganak om i Kaum Wanita om apatong o gama dioti mindolongoi om miambat di Zabur.

Kodung nopongo-no sumambayang, tigogi, varo nokosodia sid meja sid tinoguvangon-ku om i meja dino noponu di tasantanid-tanid ot ikana om varo-po ginazau di nolopot sid ongoroun do kazu, gam ensanan i piumpungan minongimbulai do kokorui om kakanaan sampai aramai it umpug-za sino. (varo gambar dino poginakanan sid Gorija Vingolon sid facebook album koduvo di pemot dino meja dot oponu dot ongokakanaan). Na tinumorong-no sid dohon it osukod do piumpungan di minanarang sid dohon dot iosido-no om i savo dau i nabarakatan diri ontok di toun 1965, i hiza do bai ioku varo katarangan do porinta do popisavo dot ulun PCS.

Na i minuli-oku sid Germani, varo upakat laid di **piumpungan sid Shah Alam** sid Semenanjung do mapit-po sid dioti om mamung sid kumpulan do weekend. Asadapan di hari enam nokopiumpug-okoi no sid gorija i sid rinantai do kilang, it inolos sid Gereja Methodist, dot i Pandita Morunsai ot ulion di

piumpugan sino dino. I hari enam diri, nga Hari Raya, tu adau di mohondom di kinosinaan di raja Malaysia, otutup-no it ongokilang om i-po workshop do Proton Saga, tu sino o kinumaraja it a-ko piro ahli di piumpugan. Banalko avantangan-oku di kuran dit ongosolumpak vagu di nakarangkat sid Semenanjung, tu mogihim do ponsohorian, nga atatap sid piumpugan dot amu ekum mamakai di dau do boros sid tuturan om sid ongolongoi. Gam nokelo- no ioti kavi dit ongolongoi di vagu i nakamung-no sid Buuk Longoi. Om i duvo nopod kopi dit Usuran do Gorija Sompomogunan om i PCS, di novit-ku sid dioti, nalaku- no kavi, gam amu-no miuma... I hiza di nokocek-in sid penerbangan, miningkosup-po dit a-ko piro ahli di piumpugan iadko it anak di Oduzan om i Alfred Osingko do patod-po dot iso tuung dit oponu do kouvaan do Malaysia. Kasalaan-nopo, nitahu- ku-no laid i dohon do bag dot aso tinganan dot pomungon-po ino. Bai intanga dit ongouva dino o nokouma sid bag dit opodok di novit-ku mandal-gandal iovit-no sid Inai om it anak-ku i sid valai.. Antad dino pangalaman sid piumpugan vagu sid Sha Alam, banalko osinang-oku mudan sid tarabang dot i ginavo-ku mad oponu dinot ongokosomungan sid kinandahaan-ku di kopupusan. Tu nokopurimon-oku diri dot mad amu kogoos-oku do magandaha vagu sid Malaysia.

Pongimuhunan

Nokouli-po sid valai-ku, minongoi-oku di Inai om minonuturan sid dau di sokoviai i pangalaman-ku sid Sabah, do mangarait sid dau di sokoviai it ongongaran dit ulun di nakasamung sampai pinemot-ku sid Inai om it anganak, sampai sid piumpugan sid Korntal it ongogambal dit nanu-ku sid saralom di sid Malaysia dino. Okonko impiro-oku minamung-no sid ongopiumpugan siti ponong do polombus sid dioti di tuturan di PCS.

Na varo iso piumpugan sid bandar-ku di minongodim dohon do mangagazad om mengkhotbah sid dioti do tomod pahabal di pangalaman sid Sabah. Boros di EXKO dioti, sokoviai i persembaan adau diti, nga bahagi di PCS, ka. Manjadi minonuturan- oku sid dioti do kuran i PCS nokotimpun do varo piumpugan dit ongoulun di kumaraja sid Proton Saga om vokon o kilang sid Shah Alam om kuran-oku sid tanga dioti. Ioti okonko bai miuumpug ong minggu, inoi-nga mad sodop-sodop varo kebaktian sid mintutuk dit ongovalai do vokon sampai tanga sodop, kakali ioti koumpug mamasa di Kitab om miirung di kesaan dioti sino dino. Iri-ogi a-milo milo it ulun di varo kurita osusa-po do patod di pandita sino sid valai dau, tu aso sakaan dau om ontok do tanga sodop, nga aso baas. It ongointoronon dioti amu osomok sid dau do valai. Rontob-nopo, it ulun di kikirita, a-milo-milo osusa kumaraja dot antad sid pukul enam do sasarap, mad osusa ong iosido sodop-sodop, nga draiber di pandita. Natalahas-ku-po ino, varo cadangan-ku sid piumpugan dot, Kuran-ka ong i tokou diti mirurukut di horogo do motosikal bahagi di pandita. Tu ka di pandita Morunsai, ong kimotosikal, amu-oku osusa do sodop-sodop mokiatod dit ulun muli, minsanko osopung i dau do karaja sid kilang. Minsanko amu miuma i persembaan dioti sid dahai bahagi di motosikal dino, nemot- ku-no i kosukupan sampai minongirim-oku di siin sid di pandita Morunsai sid Shah Alam.

Toun-toun, **i piumpugan Korntal** minongirim sid dohon di dioti do sumbangan bahagi di PLA PCS om minongingut dohon do mamung sid dioti do kumpulan, i retanko dioti: Kuposizon bahagi di vinangun (isusui di rombongan Bread for the World). Tiining-no ioti om mokihabal di kosurutan do PCS. Ioti toun-toun mongindukut do siin do tomod monukung dit a-ko piro projek iadko PCS sid Malaysia, sikul sid Cameroon, asrama sid Peru om vokon-po. Na i kenginan di bendahari dioti, ivaza sid dohon ino sumbangan bahagi di PCS. Kasalaan-nopo, vokon-no sampai duvo tolu vulan om varo-ogi rasit antad sid bendahari PCS om onibak o boros di pavalang do monorima kaseh sid piumpugan Korntal. Mad amu-po obas i PCS do monorima kaseh bahagi dit opodok o sumbangan. Ong it agazo di block grant mad automatik nokorikot sampai bianco antad sid bendahari do Basel. Na antad di toun 1991 varo tugas-ku do pongorusi-oku do rombongan di kingaran dot: One World. Limo nopod kavi it ulun antad sid bandar dahai ot agazo o ginavo bahagi dit ongoulun mosikim sid ongopomogunan vokon ko it orukung ot ulun sid dahai kondiri. Pinengkakat ioti do kadai di mongojuval do barang antad sid ongopomogunan iadko koko, kofi, tii om oginisan o kouvaan di nitanom sid sharikat do kampong om handikraft. I tomodon dino, it ongoulun di mananom dino barang kadapat mongojuval turus siti ponong dot aso kumpani manganu dit agazo o kohuntungan, dot i bahagi di maananom, bai okudik banal. Gam ong mongojuval dinot ongobarang ko handikraft sid kadai-za, agazo-gazo-no o horogo, supaya kadapat monukung-po di sharikat om kampong, okonko

bai i horogo do barang kiguna sid tempat dino, inoi nga varo-po nakamung ponong di kopudan di razat sino. Sid kadai dino varo ongoduvo nopod ot ongondu di suka rela miovolli-voli mongojuval dit ongobarang om manarang sid ongoulun di dumagang dit inantadon do barang om i kopudan dit ongoulun di mongimbulai dinot ongobarang ko handikraft. Suvai i toun 2005 om nilombus-ku-no ino tugas-ku mongotua di rombongan dino sid ulun dit omulok.

Hiza di toun 2002 om varo vagu opurimanan-ku dot rumaat vagu i kosihatan-ku do sampai intolu-oku kotobukai sid rumah sakit. It insan-ogi, retan di Professor dot aso kosusaan dino, ka, nga pinuli-no dohon sid valai-ku. Topot kakali iri-no ko iri o korualan. Sid rumah sakit koduvo, varo notobukan, nga retanko mad amu-po navi i sakit dino. Suvai sid rumah kotolu om ahatul-no o gama dioti mongidu di nunu-nopo sid guvas ku dit nojongkitan do kanser. Antad diri, mad nolingos-no banal i kanser sampai biano, aso-no kosusaan om korualan-ku vagu om kogoos-oku-po monorundakai di Inai di murut-surut kumugui dot amu kengkakat-po om osusa dot asadapan pavalu antad sid odopon sid ogomon om vokon-po. Monorima kaseh-oku-nobo sid Kinoringan do kakali-oku kogoos om akansang do momiara di savo-ku rontob sid valai.

Ong varo habal antad sid Sabah, ko varo ombuvoi antad Sabah, iadko i Mongolizo, i gam kandaha sid kadai dahai diri om minongjuval sino dot tinggol om rinugading, ko ioti Porodong om Ayun ko it anak dioti Paul om i Sopirid, banalko avantangan di Inai do kening iosido di boros dikou. Sabap ong i Inai, asarok, ong mumbongot iosido dot toriso-iso linsou do boros, varo-po kagavul dot, okudik, amu, om i iadino, mad amu-po nolingan dau i boros do Momogun.

Sabap antad di toun 1990, vulan-vulan mamasa-oku di majalah ALIRAN, elaan-ku do ombo i jumadi sid sagana Malaysia, minsanko okudik o habal sino di bai antad sid Sabah. Varo om varo dot a-ko piro di nokotiim mongirim dot email sid dohon dot amu songkuro, nga aso-no vagu. Ko varo i homepage di PCS do tigogi, nga atanus-no vagu sid internet. Suvai i vulan tiga 2009 varo email di Sopirid di poromot sid dohon di kinapangan di pomilihan sid sinoda PCS. Iri-ogi mindamo-oku do Sopirid, i SUU do pendongou sid dohon do kuran banal i vaza om panau di PCS sid saralom di hoturan do Mission 21. Sid timpa dau varo nakamung i alamat di homepage vagu do PCS. Turus mogihim-oku-ogi ino homepage dino sampai minamasa-oku di “History” do PCS, i nokosiat-no sid homepage dino. Mad avangaan-ku, tu ino usuran sino inanu-no sid Majalah do Silver Jubilee di toun 1977 di banalko amu nokonong. Varo boros sino, retanko *i Forschner kakali misisingilo do Rungus di toun 1961 dot amu kadapat banal iosido monulung di Haeusermann*, ka sino. I sokoviai i nisurat sino, i gama manalin om monodia do tudukan, ioku-nopo o minangagama sampai ioku minangahatul di kursus Kitab om i iadino. Minsanko nokopongonsug-oku di SUU do monimban dino “History PCS” do Inggeris ot pakazon, mad sampai biano, kakali sino dot amu-po nogontian. Iti-no o sabap do pinosuvang-oku sid facebook dit “Usuran di gorija sompomogunan om i PCS” i nopirin laid di toun 1993 sid TEP.

Manjadi nimpurasan-ku-po i homepage do PCS, nemot-ku-no do varo bahagi i retanko “shout”. Pongitungan-ku diri dot osuhul omungan-ku-po do kopivosihan bahagi dit ongoKristian do PCS antad sid Germani, om niamung-ku-no i dohon dot alamat. Okonko koduvaan om varo timpa sid facebook di mongumba do tomod mihahabal-habal, gam mogihim i kuvo dino do miubas kito, isuhut dit onsug do facebook “to become friends”. Gam i facebook dino minanarang dinot umba sid boros do German. Manjadi kananganko i hal dino, atag dot sodirizon-ku-no inot ongoumba dino, tu amu kopionong banal i pongoretan German Freund om English friend ko i Momogun koruhang ko anggai ko avit. Kavi-avi ino pongoretan Momogun amu miabal dit English friend, om sid German, osusa-po do monodiri kusai om ondu Freund om Freundin. Sid Momogun varo-po momoros do kobasan, simbol om vokon-po. Iti-no o sabap minoniim-oku do tumimpa dot, Nunu-ka it umba-nu di mokiangganai-ko dohon, ko miaangganai-kito, kangku. Na sid saralom dot apat vulan labaan do duvo natus solumpak vagu om a-ko piro osukod laid di nosomungan-oku diri, minongirim dot email sampai minuhabal sid dohon dot ogumu o pangalaman dioti sampai minanarang do kuran i kosurutan di dau om dau do piumpugan ko puruvan. Gam susuvab di Kristmas, varo mongirim do gambal di sumambayang ioti sid dau do gorija dot nemot-ku i choir dit anganak om i Manaud Puruvan om ensanan it ongoulun di noumpug sid gorija dit opusok-no banal dot ulun. Iadino tigogi, nokenksomok-no i Sabah sid dohon do valai om ongkob. Kadapat-oku pemot om pening di Inai do kuran it choir dot anganak Pinawantai mindolongoi do longoi Kristmas om i iadino. Varo-po Kimaragang om Tobilung ko Momogun sid

Kinabatangan di mongirim dot email sampai pinogili sid dohon dot ongoduatan dau kananganko i kosipan tokou om i vokon. I harati, tanid mantad di gama mongontupat om mangajaga di Inai, asadapan-oku sid komputer do mamasa om mangambat dit ongohabal, it onibak om it anaru. Sid saralom dit ongohabal varo minongoduat sampai minindamo dohon dot iposurat di dohon dot usuran sid dikou do boros, supaya ogumu kadapat mongohondom di kinotimpuunan di Habal do Kovosihan sid tanga do Rungus om linumombus-po i PCS sid ongoMomogun vokon.

Sid saralom di midialog dit a-ko piro koubasan vagu, tumiim-oku do mongohodtol do mongoguna banal di dikou do boros. Sabap isai it ulun dit amu elo ko kadapat mamalang di dau do pongitungan sid dila dit idi om ama dau mad alud di mantung-lantung sid ododos i rahat. Aso rikoton om aso panangan, ko iadko valai dit aso't origi. Varo hiza katalib i rumosi it ongomolohing dot it anak dau amu kengkosup di sikul di mamakai di BM, nga tinumimpuun ioti do mamakai do BM di dau do kelaan monuduk dit anak dau. Topot i BM nga boros di musikim o pongoretan om musikim i hoturan di boros dino. Topot ong Momogun, mad boros do pasok di banalko lumundu o boros di kadapat monodiri di nunu-nopo, gam varo a-ko piro hoturan di miabal sid English ko German.

Na sid saralom di hinotusan ot habal sid facebook dino, iso-no i banalko potomon dohon, ino-no, varo ongosuni Momogun di monorima kaseh dohon bahagi di gama-ku sid Sabah, minsanko a-nokemot ko kotoguvang dohon diri. Iti iadino pentahan sid dohon dot amu porosuma i gama-ku diri di sid saralom dot apat nopod toun tumabang-oku dit Ongorongus kananganko i Habal do Kovosihan dit a-milo-milo ihabal om izazad sid pentongkop do pomogunan.

Filderstadt, Januari 2010